

AMERICAN PHILOSOPHICAL SOCIETY
HELD AT PHILADELPHIA FOR PROMOTING USEFUL KNOWLEDGE

Edward C. Carter II, Librarian

March 8, 2002


Fe Susan T. Go
Head, Southeast Asia Division
Rm. 110-G HHGL-N
The University of Michigan Library
920 North University
Ann Arbor, MI 48109

Dear Ms. Susan Go,

The American Philosophical Society is pleased to grant permission to convert the microfilm copy of the Philippine titles in our H.H. Bartlett Collection into a digital format. The efforts of the University of Michigan Library and the National endowment of Humanities to preserve, conserve and digitize it's Philippine collection will provide scholars with valuable resources previously difficult to access.


Keep us apprised of the web project's progress, and of course, feel free to contact me should the need arise.

Sincerely,



Roy E. Goodman

Curator of Printed Materials



Class 499.211 No. B28
no. 189L
Presented by

T. H. WARTLETT COLLECTION
ON THE PHILIPPINES NO. 1

189L



Sol H. Gaudin

19631883

Ing Mariposang mutuling.

Ibat qñg malati cu, ecu balu baquet caluguran cuno
ing sampaga: ing tintiman dang cule, ing manene
pijican dang samiû at itang sagasaguli rang bie,
lamu macayaga ngan cacu, at pipilitan na cung ma-
masid qñg ecu balung lilijim da, balamu mo uari
ing balacu, atin la namang bie at panamdang á anti
ing qñg tau.

Uli na niti, pegaralan cula: ecu melilu qñg isipan cu
... bisa cong metung á uagâ? Oyan.

Abac nang maranun ning Abril, ning masamiung pri-
vera, ning primavera nang alang capupusan ning
inas... Ding sarî-saring bulacac, bubuclat dong
calale detang macaticum dang tampuc, balang
ang banglu qñg umâ nang malimadmad ning an-
miculayan noman qñg mapundat dang dangat ding
boradong aslag ning aldo paitas...

Busal ning metung á mulajan, ating aduang bulac-
ac: ing metung ROSA ya, at ing metung AZUCENA ya;
deting adua, malagu la: ing rosa quetang majinjinang
at ing azucena quetang pijicanang puti, ila ding
minu ra detang bulacac á magparangalan quetang
mulajan.

Deting adua, misale la qñg metung mung maceta
nung nula miagnan megambul at mesese. Uli na
nita, miacuanan lang samiû, miacuanan lang cule at
piraracayan da ngan itang anggang atiu carela. Qñg
malagu nang cule ning rosa, dirinane ing azucena,
di naman, quetang busilac nang puti, daraque ne ing
rosa. Caniting pamisamut na nitang aduang cule,

nitang aduang banglu, lalu lang ipusuc a mangung,
at itang masalimuyac dang samiû cacalatana itang ma-
bilug á mulajan.

Mitas yang baguia ing aldo: metung yang Maripo-
sang matuling linimparano detang aduang bulaclac:
ing rosa menimutla ya, at ing azucena... ing azuce-
na melaré neman, at minatna ya, cabang, sisilad nong
tungal ditac detang mapilana pang bulung á macaticum.

Ing alang casinparang banglu sinalingalang canita,
at lasa mitacpan itang manene samiû na ning rosa.
Canita iquit que ing rosang anting menatiat, telanga
ne ing bulaclac na, sengapanang miamasamas ing
aslag ning aldo at tinangap yang cule... ing rosang
malusuc! Caniting ningning da ding aduang bulaclac,
ing Mariposa, éna balu ing daptana, miquealangan ya:
aguiagane ning busilac nang puti ning azucena, at
amuyutana neman ning sari nang lagu ning rosa ..

Ngara qñg ing cule ya ing babie sampat qñg sabla,
at ulina niti, itang Mariposa, linapit ya qñg rosa at li-
cuane ing azucena.

Megatpanapun: itang azucenang sipuac na ning abac
menimusiò ne't metamle asque, at ditac-ditac durung-
dung ya qñg puna; dapot itang rosang labaslabasana
ning angin, balamu magparangalan ya, lalu yang lalagû
cabang itang pijican á azucena, malalangi ya.

¿Nanu ing miliari? Ecu naman balu, lijim nang é ma-
taruc ning caugalian.

¿Tutu uaring qñg ding bulaclac manamdám la naman?
Nung macanian... ¿Nanu ing panamdamana ning azu-
cena? ¿Nanu ing bigjana canita nitang matuling á
Mariposa? ¿Baquet ing rosa pequicuana nang migpala-
lu qñg azucena.. quetang cayacuana nang samiû, at
quesale na qñg pun.

* * *

Cabucasana nita... oh! ecu buri mang ganacan...
itang azucenang misnang calagû, balamu lebasane

ning lalung masican á baguiu: itang matulid nang tangque mepacli ya at ing bulaclac na melangi neng lubus:

Linapitcu; bugtuan quesa bacung aquit nung nanu ing penibatana nitang bigla nang pangapauy, dapot iniang une cu nang daptan lebasana cu uari ning metung á sialang malam, macutcut, malumbe, at balamu dimdam cu iting amanu.

—Icaman papaten mucu!

Mipatiguil cu, at ngacu.

—Baquet ninu ing macamate queca?

—Buri meng abalo?

—Ua.

—Ing Rosa, ing capatad cung Rosa, ing caluguran cung dili. . .

—Baquet?

—Tabalu, dapot sabian mu quea, qñg é lambat ing tulana.

Caibat na niti, mipda itang siuala at ecu na din pepasibayu, aguiang nanan cung pagpilitan.

Itang Rosa miunan uman mung ditac menimut mengatagtag ya bulung at alang mitagan nun itang lubás nang tangque.

Nanu ing miliari?

Ecu naman balu. Lijim nang é mataruc ning caugalian!

Maquipanamdam la naman ding bulaclac?

Mecad pin, at uli na niti bijira ya mu ing taung é mingangalip careti.

ING CATALA.

Y María metung ya caring malagu nang dalaga niting balayan: salucuyanang sasalingalingal ning banglu ning caralangnana: numan carin, at insamang casayán queting balayan, ya ing bulaclac nang masamiu.

Eno aquilala ding pengari na: lasa cabait na mengulila ne, meragul yang dili na, dapot ing catutubu nang catimtimanan at ing dactal nang pegaralan, linigtas ne caring mataram dang cucu deang balawe bulic á yausan tang baintaung dalan.

Itang beitanang canauan ditac ditac mialilan qñg cascupan, at qñg panaun á sasalita taya, ditac nang bina ing macatagan qñg banding menana. Ulina niti, detang angang ipus na pepalacuano ngan aguiang ere buring ticusan bistat enoman upajan, pablasang balura ing pijicanang pamicacatauan á mesese qñg láyo. Bistat masaquit man cang María iting bague pinilit na rin at alang mitagan caring cayabena nun emu ing metung á CATALANG sese na á ausanang MINING at ing matuang babayng meguing sisiua na á sinese't peparagul naman quea. Macanian man ing bale nang María misna yang casaya, lalu't laluna ngening yapare ding dactal nang cacaluguran á mililibang quetang pamagdili-dili na.

Itang bie nang masaya, mecabulad milulaman. Metung yang bigang matuling delumdumane ing canuanang malinis, at ing malumbe pamibule, palungcutane ing lupa nang masaya.

Canitang gatpanapun á sasalita tamu y María macalucluc ya tulid ning auang á nung nuya macatali ing Catala: malungcut yang bina at lalu nang calungcut itang panasque na ngening mitatabnu qñg masa-

ya nang lipacpac ning ayup á quetang malati at malalam nang siuala ausane laguiu ing guinu na. Y María ene siacasu: balamu ing pamigunam na marayung marayu, inia ena balu ing maliliari siping na.

—María quiquiaca? nganing Catala.

Y María mipacde ya canita, misublian ya uaring lub.

—Ali cu—ngana.

—Emu cu siacasu danupana cu, nganing Catala.

—Manayaca, icua ra cang canan—nganang María, at quinanua yang capirasung saguin binie ne quea; dapot y Mining ene quimutan, pagumasdane ing guinuna at quetang pamagumasid na balamu lulungcut ya naman.

—Dapot nananuca,—nganang María—balacung danupanaca?

Ing ayup eya bubulad: y María uli na nitang malungcut nang pamigunam-gunam, ena ne naman inulitan.

Y María atin yang lilijim: metung yang hist ing historia nang malungcut ning biena. Bayu pa menibat mú quetang camumulanang velada ning “La Alianza” á nung nula miquilala ning metu baintaung tubu qñg balayan X Caniting lilijim na, alang maquibalu nun emu y Mining, ing Catalang tiru nang miniabi, migcanta at dinalit.

Milabás pilan aldo, itang calulung dalaga misalunan ya: quetang pangajilig na qñg maputing ulunan nitang malati nang buntuc at quetang maratunang panlalaue, balamu uari ing angel na ning camatayan.

Milalauayan lang Mining, ning Catalang calijimana: balamu uari detang aduang micaluguran, mipamúnala qñg pamilalauayan da.

Mecabulad ing Catala quintaneng macacalalé dapot masala ing ¡NON M'AMA PIU! (E nanacu palsintan) melodiang melumbe at macalunus á tiru na queang María.

Y María inatna ne ing buntuc na at ngana:

—Ua, ua, tutu yan: “Enanacu palsintan!” at ticpa na qñg metung á paniung sutla ing lupana: quiniac ya.

Y Mining ticnang na canita ing cantana at delangat na itang bulbul nang maputi pa qñg busilac.

Itang lungcut á papate cang María ating pigmulan: ing sintang memiraya, memilait at miglaram. Itang baintaung aquilala na qñg Club, pirayane caibat ning luntu luntung sumpa na quea. È iti ing lalung masakit, nune itang pusung binie na na quea, quinua neng pepasibayu at pimiene qñg aliua, qñg aliuang mecad malagu pa quea. Ulina nita ing María tatangis ya at macapanding qñg saquit, qñg saquit á é maú-ulu.

¿Baquet piraya na neng macanian Luis, nitang baintaung uagas á sinumpang matalic quea?

Y Luis atin yeng pengari, at deti cabilang dala naman detang pengaring queraclan á paquiasauaro ding anacda, é qñg cayapan ning metung á babay, nune caring salapi na, at y Luis metung ya caring timpalasana na ning cayatinan at mapilan mung aldo isiclaud de qñg metung á dalagang alang aliuang cayapan nune-mu ding salapina.

Iti ya ing calulungcut at casasalunang María, y Mariang bulaclac ning insanu mang masayang capamisanan ning balen cu.

—Eca quiquiac María—nganing Catala—datang ya.

Y María minulat no detang mata nang panluanluan at quintane quetang siuala nang mapapanas ing “Non m’ama piu”.

Canita y Mining inantabayanane: ilang adua qñg misnang calumbe “duetto” cacantaro detang notas á sasaingsing, detang letras nang daralung ning “Non m’ama piu”!

Itang mayumu at malumbe “duetto” tunggal ditac mimina, ditac ditac mamamate at iniang miras ya qñg capupusan, metung yang AY! á masican calauc na nitang notang matas ing mebugtu qñg salu nang María... at iti yang mecamate naman quea.

¡Mete ya ing pacacalulu, qñg alang sacsi, qñg alang maquibalu ninuman, nunemu y Mining á cacalugurana!

Cabucasana nita y Mining, itang calulung Catalang mengulila, aguisingan deng macabitin qñg talina, at mete ya naman...

¡Baquet ding babay, ding bulaclac at ding ayup, balamu mipapanamdamlar! ¡Calulung lelangan, ico casi ding palalu nang malagung panagaula ning yatu!

Ing babay qñg leguana, ing bulaclac qñg samiu na at ing ayup qñg galena .. iting atlu, ya ing poesiang malambis at macule á paninapaning metung á poeta!

Ing cutcutan da ding “Inmorteli”



Aduanānan yucung salita?

Panusigan dacayu, dapot eyu aduan cacu ing mangasanting nang amanung Enriqueta Lozar macapangalibut dang Historias ding biera dir Carlota Breaumé. ó ding tau ra cayang marangal ding novelas da ding Dumas; ing isalitacu metung ya bie malungcut, malumbe, pablasang itang matimtiman á dalagang maqui bie caniti, painauane qñg catajimican.

Mibalic tamu quetang adua ya iting Noviembreng salucuyan; ing aldo na ning gatpanapun, matamle ne aslag at ume neng magyungyung qñg albugana. Dacalang tau ding lalacad é bubulad á painturu caring aduang cutcutan niting balen: magdala dala lang coronas at candilang yain da caring caluguran dang meangu na bie. Tuqui tamu caring painturu qñg cutcutan ning Municipio at lungub ta carin.

Calungcut na ning “fiestara ding mete” Ding mabie aguiang nanan dong pasampatan caring marmoles, jaspes, bulaclac at sulung panagaula ra, lalcas murin

itang matuling nang asque ning camatayan, ning camatayan á é manginu!

Libutad na nitang Camposanto... carin, quetang gabun á Virgen á alang bacas nanumang bangque, ating metung á candilang undap-undap, mamamate panépanayaning angin. Itang sulung malungcut balamu managcat ya, ecu balu nung nanung sican ing mitataguyad cacu baqueng lapitan. Lapitan taya.

Ah! metung yang catcutan. Acaquit yu ya? Deang sampagang macapatulug quza, ilang palaguiuan dang INMORTELI. Mecad metung yang gamat á malingap tenam no dean, bilang nang tanda ning masapsap á lugud. Ilinlin tala dening uaguéuágue sangang tatacap quening losa, batayang á balu ing quean macacutcut.,. Oyan yang "lapida" na, atin yang lagui.,. ilapit ye yang candila, basan taya:

¡MARÍA!

--Ninu y María?

Itang cutang miagnan dinurup quetang angang linapit quetang malumbe cutcutan, dapot ninuman quecatamu, alang macapaquibat. Detang INMORTELING tandana ning é pamanlinguan, ating mitanam careta at iti yamung maquibalu nung ninu y María.

Qñg busal na niting capicacunuan, carin ya dinatang ing metung á matuang babayng bucut na, at tisudtisud nang lalacad.

—Caquilalaye y María? ngana:

—Ali miya pu

—Calulung ana cu! Sese que ibat qñg malati ya: pepasusuan que qñg dayana ning salucu: acung sisiuana inia anac que, ¿é macanian? Tungal ditac á caquit queng daragul at lalat me dalaga ya, licuanacu, bayang painaua qñg maimbing nang tndtud ning camatayan!

At canita siniro caretang matanang alanang tindag ning calulung matua, ing adua capatac á luang anti mong tingaputing mibabayang duruluc caretang pisni na.

--Nanu ing quemate na?

--Metung á piraya: Milsintaya, pialit de; linugud ya, timpalasanan de; at itang sugat nang é mau-ulu qñg pusu, maranuneng quildas qñg aun... casalungsunganang sasalingalngal ning labinang ualung banuang edad... E tutu qñg pacacaluluya?

--Dapot ninu ing alang pacundangan á lalaquing? . .

--Durulucana cu labi ning laguiu na, eque asabi., dapot alil... sabian que, bayeng aquilala ing menampalasan. Luis ya laguiu... eya tau queti.

--Luis?

--Ua: Aquilalane qñg Club "La Alianza"

--Ecasi ing meangubie macacutcut queni y María ning NON M'AMA PIU, ing demayana ning CATALA?

--Ua, yana cubud.

--Bigung babay!

--Cang Luis, alacong balita?

--Ala nanuman, at ecu neman buring paquibalitan.

--Calulung María!

--Dapot ing mangutcut nganang tinuglung ning matua, ngana cacu qñg ating metuhg á lalaquing mamapa queti, balang sisilim at tenamno deang tana-man.

--Ding INMORTELI?

--Ua, at gagambulanong parati, iniapin saguiuala at masayang antimo y Luis ing acaquit yu.

--Tabalu, eye ulitan cacu yang laguiu at... Canita bigla yang meco bubulung at tapatapisung qñg panlabanganang talaib.

Lacuan tane ING CUTCUTAN DA DING INMORTELI, ing cutcutan da ding bulaclac á é malalangi at é mamamate.

Dapot caracal á dramang é picabaluan á tatacpana ning gabun!

Calulung María!

ING PASIONARIA.

Martes mu namang anti iti, dapot capitanganang bengi, maralum dum at maguing limputan.

Ing asiuas ning uran, ing biung ning masalusung agus ning danum, ing ngungulangul nang tiup ning masican á baguiu, mianib-anib ngang sasio, gugulisac antimong musicang tikbalang á mamagpang quetang malungcut á benging nung nu mipamisan ing calumbayan.

Qñg Cuartel General na Purac ning Brigadier Mascardo ating aduang Oficiales á maca guardia canitang benging ita: macalucluc la caring aduang lyclucan á mitutulid lele ning auang. Ing metung careti macatacas la qñg auacana ing revolver na't sable at susulud ne ing cupianang niagaspang á Baliuag á penagaulan qñg metung á triangulong macatumpac qñg rasong azul at malutu.

—Balu mu qñg ing benging iti, bengi re ding magculam at asuang?

—At ding tikbalang qñg Pasbul-baliti.

—At ding caladua rang lipanglipang ding mengamate caniting labanan—Linud na ning minunang miniabi.

Ing metung á quildap á menalicsic caring busbus na ning bale, quinutud na itang pisasabian, canita naman ing reloj queta qñg sala tinigtig yang metung, metung mu, quetang malati nang pamucpue.

—La una! ngana ning minunang miniabi, cagna na ning tinicdo ya.

—Laa, unaua!—dapot nu ca ume?

—Quetang sinabi cu queca, buri queng acasabi ngening benging iti at...

—At caniang duldul, angin, uran, at baguiu...?

—E bala! buri queng aquit qñg catataulian, buri queng damdaman, bayu ya maco at... emu balung bucas maco nala?

—Ua, dapot ibuclat me yang auang, alben mu ing panaun, ing pusa man eya misilip.

Itang Oficial á magcapilit maco, biclat neng baguia ing auang at tinando ya. Canita, quetang baguia nang pangabuclat linub ya ing metung á ayup at itang matni nang lipacpac, mecapanangaliquig caring aduang inisasabi.

—Nanu ya?

—Metung yang culayu.

—Carlos, yang ayup magdalá yang maroc á uaga, paniualan mucu, eca titipa ngening benging iti.

—Macanian ing pengacu cu, at balu muna ing capangacuan cu mal dili canacu. Nung cacaluguran daca't buri mucung daptananan mayap, alilan mucu qng ditac pang horas á macatagan qng guardia cu. Maliari Pedro?

—Ua.

Iting catayang paquibat mecaguiu na quea, inia pupulai yang tinipa qng eran.

—Calulung mamulang, nganang Pedro at sacaya migjilig miadiang matudtud qng luclucana.

Catipa nang Carlos qng Cuartel General, seligsigano ding dalan ning cabalenan Purac, at carin, quetang lele na ning bibiung á sapang culang namu é matdas, ating metung á bale pinaud, nung nuya tinulid minaus macacalale.

—¡Leonor! ngana.

—Canita ya mebuclat ing malating auang ning silid at tinando ya ing metung á babayng inaslagana jagu ning quislap nang sinaquirap ning quildap.

—Carlos!

—Ua. Bucas maco na cayu, muli naco qng balen yu... at carin... eme acalinguan ing acaquilala mu busal ning casaquitan?

—Alique! libulibung ali! uling ing alang camalitmalit á bie cu, pepasayana, biclat na cacu ing mal á ecu caquilala: ing lugud qng balayan! dapot... tatacut ya

ing caladua cu, balamu atin cung pitatacutan á mamuc datang tang casiran.

—Baquet?

—Ecu balung sabian, macaguiung panamdamau cu queni, quening carug ning salucu.

—Yan...

—Ua, ume naca... Emucu cacalinguan ane?

—Capa, nganang Carlos

—Ua capa, atin cu pang ibie queca... oini abutan me. Metung yang sampagang tigtugan cu qng lua en ngening quebucas.

—Quebucas?

—Eme acaquit ing alaya? Atine mamunag! Ume naca.

Meliquid ya y Carlos nangan qng aslagan at canita na apagumasdan qng aguiang tatacpang ning macapal á lula mamunag ne ing alaya.

--Eca mangalinguan ane? inulit nang Leonor at minurung ya qng auang.

Lalat mirayú yang mapilan calacbangan y Carlos qng bale nang Leonor, dimdam nana ing metung á descarga á linual qng malati rang asbuc ding libu libung fusil at cayari na nita, pangatajimid baguia... meramdang naman ing calugcug ding cabayung papulayanda.

—Capitan! ngana ning metung á sundalus á pupulain sasalubung quea—Ding americanos...

Ya ing asistenti nang Carlos.

—Ing cabayucu?

—Oita nang maca sia.

—Tana carin.

Pupulai lang tinaglus qng Cuartel General at carin disan dane ing General pati ding reservas na.

—General... nganang Carlos.

—Capitan: queang sacan á yan, carinca mabat, é cuna ministil sabian qng yan ing sulut na ning balen... metung mang balas alang mitatagan caring sundalus mu. Sulung na!

Pepatingapun lasa itang labanan, ing Compañía nang Carlos é meco qñg trinchera na. Americanos at filipinos misasalamuja la bangque. Detang mipapamuc alang pacauan qñg cainguita ning tau, piabe no ning camatayan.

Megatpanapan: ding salang ela milub at iniang ume nang silim minurung lang pepaingquini qñg balen Sta. Rita. Ding qñg Brigada Mascardo, tinipun do ding metera at metung ya careti ing Capitan Carlos Patricio á mequit lele na cabud ning trinchera na.

Iquit ne ning General at ing adua capatac á lua na memalisbis caring pishina

—Dalan ye queni, ngana: Nanu ya yang tatalanana?

Biclat de ing gamat nang metung, ing uanan... Oh! itang sasacmala nang matalic, ya ing PASIONARIA ing sanpagang binie nang Leonor quea... yang delana anga qñg cutcutan.....

PERLAS A... MATULING

I

¿E tutu qñg malagu co?

¿Tutu qñg acu ing leguan á megaua qñg burac á dininanang bie ning mayap á escultor at peparamanang cule qñg pincel na ning palalung mayap á pintor?

Alang capicacunuan! ining salamin cu sasabiana.

Iti ing bubulung nang Nina cabang cuculutane ing matuling nang buac arap ning metung á salamin at tiniman yang misnang cayumu á nung nu mayayaquit ing tula at capagmaragulan; timan á antimo ing timan ning alaya, ngening saslag ya at acaquit nong macuculimlim á sala ding aliuang saslag; timan á maiguit pa qñg timanang masaya ning metung á bulac-

lac ngening pamialungane ning maputing gamat á tatalan quea; dapot itang timan sinaquirap mu, anti mo ing sagasaguli nang quislap ning metung á bubug ngening mitangad ya qñg aslag ning aldo... Ua, uling y Nina atin yang lungcut: y Ninang balingquingitan á catauan, ing macaba irap á mipnung poesia panlalaue, tatangis ya.

Balamu calaraman ing tatangis ya ing babaing malagu...

Macanian man quiquiac yapin at iti yapa ing camumulan á ing salamina iquit neng magsalbat

¿Baquet tatangis ya? Itang mapilan capatac á luang sinaguese caring pisinina, ya ing sucá á lub á malambat na nang cucumpitan quilub ning salu, á ngeni pilit tatacas caring matana.

Macalunus ya ing babaing tatangis, uling qñg tangis na, carin mayayaquit itang queinana, yumu at capibabatan.

Dapot, ¿nanu ing sangcana ning tatangisna? Malagu ya, anac yamu, at caniting panaun ning caralangnan, ing taguimpaning metung á babay, cule ngang rosa at maputing busilac, antimo ing calinisan; bistaman ya ing tutu: y Nina tatangis yapin at nung ing panlalaue tamu tataglus musa anga qñg macasalicut, aquit taya quilub ing salu na, itang cabubusalan á nung nuya carin ing pusu... oh! canita... canita... ¿caracal na lijin á ipabalu quecatamo! Dapot ali! E taya sucá luban á piluluban, paburen tayang tumangis, bayang mipasno ditac mu man.

II

Milabas ing pilan horas: y Nina quetang pamicunut-cunut na, lalu yang lalagu, itang ulap á siro-siro quetang malumbe nang lupa, tatavi na itang malare nang cule at alilana qñg timtimanang putla ning garing.

Metigtig ing á las diez á las once... á las doce... ing bengi sisiucna: maratun at tajimic, dapot itang caladuang bigu, malimbuyu ya, alayang caratunan.

Enana abata: lepitane ing reloj, siluane ing tuturu-na... á la una...!

—Dios col ngana —É maliari... pengacuna cacu... pisumpanan mi... ngana qñg idala na cu't iligtas qñg camarinayan... ali! Ecu bureng aguisinganacu ning quealan calma... buricu benging alang capupusan, canita é naná cu aquit ning aldo—Nu carin ing camatayan? Ngara numan carin atuclas mu, dapot acu malambat cunang panintunan, balamu manginlag cacu, darayu uari pangalapit cu nang ditac quea; dapot é bala! panintunan cu numan carin, aguiang atiu calalamana ning gabun.. Mate..! ;nanu ing camatayan? Ing painaua mung alang capupusan, ing máco mu caniting carinan á nung nu ding tau, mangalaram la ngan! Dapot... ;mate cu, ngening ing sabla matula ngan? Nang acuacu qñg camatayan? Ing cailian damu ding malagnat á biasang maquialung qñg yatu, ding mamialungan qñg sabla... ding mamanlibac qñg catimtimanan...? Tutu! alang cayapan. ! alang calinisan at ing sabla macacusut ngan qñg marinat nang pusali ning caumisan. !

III

Sinala: quetang silid á dinungut qñg macatacut rang alimbuyu ning pacacalulung Nina, mitatau yamu ing pupúd á candilang ume nang matda. Qñg mesang malating pitumpacanan canita, ating metung á sulat á macabuclat; ngana:

“Indu cu! Tutu cung alang calma... milsinta cu, dapot era cu pilsintan, ing pusu cung yauis pinialung de, antimo ing pamamialung na ning metung á anac á alang masabal qñg alang cubaldugan á pialungan. Ngening mamun cu inducu, mapupuput cu inauang cauani queca, dapot ing marine cu, ena paintulutan ing aslagana cupa ning aldo qñg bale á mecaquit qñg calinisan cu, at meguing sacsi naman qñg ca-duajaguinan cu.”

“Patauaran mucu inducu, at patauaran muya naman, uling macanian man palsintan quiamu... Acaquit mo . . . Ining musing queni, ya ing adua cu capatac á lua, luang lalacuan cu que... a... cang Diego...!”

Itang adua capatac á luang mebalag caring matana, macabacas mu qñg papil á silatana at qñg pangasamut ná qñg tinta, balamu adua lang . PERLAS Á MATULING.

ANNIE.

I

Picabalan ya qñg malagung laguiung Annie Anac ne ning Capampangan, perla ne ning balen X at colegiala ya Concordia. Caring labi nang escarlata é matatda ing malabab á timan. Balingquingitan yamu, maputi ya’t matuling á matang antimo ding quile na’t buac.

Balang domingo, anti ning alang mamapa quea qñg Colegio, titipunano quetang masayang siduan á pitatangapan, ding cacalugurana á nung nula micatula qñg miayaliuang bague pipapagsalitan da.

Ding mingatba nang pengari aguiang mabie la pa, malambat na nong é acaquit, at uli na niti, lilibang na caring cacaluguranang macaculung munaman qñg Colegio, ing lungcut ning pamicandayu.

II

Qñg misan á bengi, benging susuluaning bulan, caibat deng inapa ding cacalugurana qñg silid nang Virgen á nung nuya masaquit, biclat neng macacalale ing auang, ing auang á tulid ning jardín at tinando ya.

—Nanu iting panamdaman cu? ngana. Quilub ning salucu ating cacarug á ecu balung pamalaguiuan. Ing pusu cu maili ya at ngungulangul... ¿Baquet matula cu

at malungcut ngening aganacacu ing balen cu? Qñg pa-
ngaculung cu queti, balamu pañintangan da't panla-
pacan ding mangaragul á buitres, ing tula cung sasam-
saman da: ¿Nanu iti?

III

Itang mariposang malutub, itang ðalaguitang mapu-
ting mapundat á mata, ene titiman, macapajilig ya
quetang maputi nang pagqueran, quetang silid nang
virgen á penagaulan caring sarisaring bulaclac, maya-
yáyat ya't managuipus, anti mo ing candila.

Ding "madres" at ding abenang Colegialas, era balu-
nung nanung masaquit na; ing panulung babie ning
médico qñg Colegio, é macacayap, é macaulu.

—Doctor, aliuang receta, aliuang panulu qñg pacaca-
lulung masaquit, ngara ding madres at colegialas.

—Yang calulu, ngana, ning medico, managuipus ya,
ing gaganacan cu ing sipsipana ning "anemia" anga
ing catataulianang capatac á daya.

—Dapot nanu ing sucat?

—Isulung yu napa yang panulu.

IV

Ing colegiala, mapupuput ya qñg lungcut: quilub ni-
tang silid nang malinis, managuipus yang antimo ing
sampagang tunggal ditac lalaco na bulung ning pali.

—Sor María, ngana,—nun eyu cu ilual queti, mate
cu qñg tacut, era cu patudturan ding anino daralan
caring matacu panga bengi. Yuli yutu Capampangan,
ing bie cu magjingalu na, antimo ing sulung undap-
undap á bisanang matda. Carin... qñg durungutan da
ding pengari cu, cumayap cu mecad, uling aquit cung
pasibayu... itang angang paganaca qñg aldo nang ma-
saya ning bie cu.

V

Itang mamung patipati, licuane ing sale nang quera-
gulan qñg Colegio, at carin qñg balayan X. quetang

bale rang malating malinis ding pengari na, carine yápa ning metung á medico, ning metung á buyung medicong anac pamu at casing edad na.

—Macananu naca bungsu? ngana ning indang epa meco siping na ibat pa qñg panulina.

—Mayap cu inang, uling ing angang queti macacayap ngan cacu.

Milabas ing peparumingu, ing médicong mumulu quea, paguisanangan ing cayapana baneng apacayap. Ing lupa ning masaquit, ditac ditac sasaya ya, itang putlang salungange quetang lupana, milalaco at mialilalan qñg puti nang busilac, quetang talaga nang cule maputi, iniang eyapa masaquit. Titimane at masaya, detang pisinina miculayan lang pepasibayu qñg limbug dang lare; nanupata itang undap undap á bie na, sinubling pepasibayu: pepaquimutaneng pepasibayu ning saya itang pusu nang mabibingbing qñg dimla.

—Doctor nganing inda, mayap ne ing anaco?

—Mayap nepu at é maliuag ticdo ya.

—Metung á mala, at icayu ing migmala qñg panga-cavap na, dapot, nanu ing penulu yu?

Ing Doctor, linaue ne y Annie á macatiman maquiramdam carela.

—Icutang yupu quea, ngana.

—Inang mayap nacupin, nganang Aunie—Lon mucu, tinacu masican, dapot é ing panulu ing mecacayap cacu.

—Insanu? nganing inda.

—Sabian cu quea, eca mimua?

—Alí cu bungsu, alicu, ngana nitang malugud á indung cumayap yasa ing anac na, ibie na pati capitna ning bie na.

—Ing mecacayap cacu... yan, uling palsintan que at palsintanacu. Miquilala que qñg Colegio, iniang yápa ne carin ing metung nang pisan dapot, caibat ning pepabanuang pamiquilala mi, miari ya pamagaral, mica-cauani cami, enaque micaquit pepasibayu minuli ya queti at iti ecu abata... ya ing mecasalun cacu.

—Guinu cu, nganing médico, itulut mepu cacu ing gamat nang Annie.

Pepabulan mu canita, ding cacaluguran da't cayablayan deting adua, mitipuntipun la qñg bale nang Annie. Ya ing cayaldaua na ning pamiasaua ra.

CELIA

I

Y Celia ilang Pablo, ibat qñg micaisip la mipapalsinta nala: ela mipagcalulam ditac man, uling ing pamipalsinta ra, tutung uagas at lusuc, malinis at masaya, antimo ing timaning metung á pungul.

Y Pablo calulu yamu, dapot y Celia masalapi ya: anac ne ning Capitan Tiago á picabalan mayacayan. Iting bague, yamu ing macapalungcut cang Pablo, pablasang picarine na ing ala yang yagpang á cayatinan caring pengari nang Celia.

II

Qñg misan á yaldo y Pablo misnayang calumbe: y Celia ena balu ing daptana, cucutang nang pilit nung nanung calulungcut na. Y Pablo ngana.

—Maco cung manintunan, bara cang anabangnan: calulu cung bina at é maliari ing macaniana cung macanian

Iti ing sinabi na cang Celia at y Celia quiquiac yang é mingutngut, agaganaca na ing lungcut ning pamicandayu.

Dinatang ing aldo ning pamicauani: ning pamicandayu, casaquit na ning penandama nang Celia! Eya miatna qñg sucac nang lub, mapupuput ya qñg lumbe.

—Eca malungcut, nganang Pablo—agad cung miballic, datang cung agad at cabang ala cu, pangaddi mucu.

- Emucu calinguan? nganang Celia,
 - Aliraca capilan man!
 - Cuanan me ing retratu cu, ba mucung aganaca ngeni mumang acaquit me.
- Micauani no canita, sugatan la caladua, mete la pusu at mabibigjani pilubluban.

III

Milabas ing pepabanua.

Iniang y Pablo mibalic ya qñg balayana, mipamulala ya qñg sayang disnana.

— Nanung pagfiestan tamu? ngana caring mapilan á asalubungana.

— Ngeni ala, dapot bucas, ua.

— Nanung atin bucas?

— Tutu ping ala capang balo?

— Macananung atin, qñg aticupa dáratang.

— Nung macanian... abalu mu: maquiasaua ya y Celia qñg anac ning Capitan Tiago, caniang ibat Europa; at uli niti magfiesta ing balen.

IV

Bengina iniang y Pablo, migsunduya qñg bale nang Celia: disnane iti, gagayac nang salucuyan ing *traje de novia* á isulud na cabucasan.

— Mibalaus co? ngana.

— Pablol... ica?

— Ua acu. Balamu emu nacu panayan! Acu, acu cabud, aguiang minaliua cu *asque*, ecu mibáyu pilubluban. Lon mucu... acu cabud ing dínatang, bacung tu paran ing pengacucu: mibalicu quilub ning pepabanua, tela ecu melaram. Ing calmang mayap, timanana cu: magdala cung dactal á salapi, dactal... at alben me ining lamacu queca... metung yang singsing á diamante, singsing á isulud cu caring taliri mu pamañiclaud ta.

Ing amanu na cutud cutud, é miuné úne anti mo ing qñg jibáng at pe'anga.

Iya, y Celia maputla ya, mangaligquig ya't cacarug á salu, dapot ditac man é ya sinaguimsim á pacauan quetang timpalasana na.

Quetang pangarucú na, mecabulud minatngaya, linaue ne y Pablo at ngana:

—Isinup me yang singsing, uling acu... acu...

—Ilud mu, emu cucuturan! ngana at telanane tacde, sicmal neng matalic á matalic. Ilud mul Eca pacauan, balucu nang máquiasauaça... siclaud ca bucas... caniang anac nang Capitan Tiago, á alang cáyapan nun emu ding salapi na.

—Ibili mu cu...!

—Alil eraca ibili...! puputan dacang anti mo ing depatan mu cacu... mate cang tatangis anti mu naman acu at...

—Ay matecul nganang mipagulisag Celia, iniang buri neng puputan caring gamat nang Pablo.

—Alil patauaran daca: ecu buri ing mateca aguiang pete mucu... eraca ablasan, bistaman sinugat mucung malalam... Calinguan ta itang milabas.. micapatad tanamu. Celia... alben mu... ining luâ carening matacu, inos na nangan itang sucá á lub.. Celia... Celia...! alben mu alana... alana...

Ngana, cabang pupulisana itang luang ena apiguil piguil sisiro caring matana.

—Ining singsing á talaga cung isulud caring taliri mu, yugse que, uling culang yapa queca; alilan que qñg lalung masampat á "regalo de boda" qñg.. qñg... at tumagun cu qñg paniclaudmu...

Inugse ne canita itang singsing, itang tindag ding tapius nang tengaran ding sulu, quinislap caring mata nang Celia ing libulibu rang cule.

V

Cabucasan, malingongo na qñg bale nang Celia: atin r gan ding taung tumagun qñg pamaquiasaua na, culan g na ang catau.. y Pablong mengacung tumagun mu naman.

Dinatang ya iti, maputla yang maputla, mangaligquig ya mabilug á catauan.

—Ninu quecayu ing anac ning Capitan Tiago? ngana:

—Acul ngana niti.

—Ica ing sicaud ngeni cang Celia?

—Ua.

—Nung macanian... tangapan me ining *regalo de boda* cu quecayu, at sacane inarapan y Celia, caibat neng binie ing metung á retrato.

—Celia, ngana—ó ita ing retratu mo, susubli que queca, patina ing pusung binauy mung pepasibayu.

Gulisac at saingsing á masican á bigtu na ning dine qñg salu nang Celia, ing meramdám canita...

Ya ing saingsing nang catataulian ning *meangubie Celia*, nitang pacacalulung é *biasang tinupad qñg pangacu na*.

MARGARITA

Ding sampagang mepuntina
caring magdalang tangque ra,
numan anti ing samiúra
lanta la't manimusio pa.

I

Y Margarita, metung yang dalagang malagu, antimo ing quelaguiuanang bulaclac: salunan ya, queang lijim á saquit á era abut salugsugan ding médicos, caniáng saquit á alang panulung sucat macapaldan, pablasang é picabaluan.

Itang calulu mamamate ya; mate ya: baluna ing mate ya, iniapin quiquiac ya.

Nanung panamdamana ning malagung bulaclac ning ilang.

.....

II

Ding caladuang majinjin, malam at maganaca, ilang marajil tatabugana ning calmang mayap: y Margarita, itang angel na ning calinisan, sasalicut nang pilit ing panamdamana, iniapin lalung masaquit, at lalung macapangablada ing pibabatanang casaquitan.

Qñg misan á gatpanapun... caniang gatpanapun á matamle, tatangis at maniambitan... y Margarita macalucluc ya lele ning auang, pagumasdane ing lalbug á aldo, ing aldo enana aquit sunlag cabucasan.

Macalunus ya: macalugue ya buac: itang capitna na nitang buac nang macaba, macatacap ya qñg saluna, balamu mo uari sasalicut nang talagá ing carug nang ena buring paquit quenuman.

Ene tatangis, uling detang matanang mamu at mapundat, ala nong lua... alanong itangis!

Ditac ditac daralumdum, y Margarita quetang pangajilig na qñg sandalana ning butacang lulucucana, miyuyungle ya buntuc nangan qñg pago nang uanan, at caibat na nita, mipatutud ya, dapot qñg maniaman á tudtud á alang pangaguising nun ena qñg aliuang bie.

Mete ya!

III

Caiulung Margarita!

Ing drama ning bie na, metung caring dramang parating mayayaquit bista't era sicamuangan, uling lalabas mung macanian, sacasaquirap, antimo ding "figurang" nang magaló ning cinematógrafo.

Qñg metung á velada... salucuyaning baile, busal ning saya, aquilalane ing metung á lalaqui. Canita y Margarita alá yang pareja, macalucluc ya lele ning piano, cacantajaneng malale ing metung á romanza.

Qñg tauling cadenilla ning rigodon á teterac da,

mipalabas ya siping na itang lalaqui: milauayan la, sinaquirap mung sinaquirap ita, uling y Margarita dingdungno ding matana, mesaul ya panlalaue.

Miuman umân mung ditac, cayari na nitang terac, lepitane nitang baintau at binie ne quea ing sampagang daralana qñg ojal; metung yang «Margarita-ng» cayagtal agtal, inia saguiua yapa't maningning á cule.

Y Margarita, quetang pangabiglana, eya man mecapasalamat, linaue na niamú itang minie quea, queang laue á bucuð mung caring babay. Caibat na nita mipasandal ya.

Ing tutuquing número qñg programa, metung yang dalit, at ing metung á dalağa canitang aguman, delit neng mayap ing macatuqui:

Ding sampagang mepuntina
caring magdalang tangque ra,
numan anti ing samiura
lanta la't manimusio pa.

Tutu: nganang Margarita, uling ining sampaga, aguiang cayagtalagtal na pamu, malalanat ne.

IV

Itang bengina ning teracan, saya at dalitan yana ing pigmulaning pamiquilala ra. Caibat ning pamiquilala, ing pamicaluguran; caibat ning pamicaluguran, ing pamisanlub, at caniti tuquituqui na, ing pamipalsinta at pamisumpanan.

Y Margarita meniuala ya qñg sumpa, uling quetang pusu nang majinjin, é mipaguiu ing calaraman at catacsilan.

Milsinta ya, mepilait ya. linugud ya, quelinguane: sinumpa ya quea, ena tiparan, at itang caladua nang bigu, ena aguiung pibatan itang quealan calma, iniâ ditac ditac malalanat ya, anti mo itang majinjin á Margaritang meyagtal qñg tangquena!

Qñg capupusan mete ya!.....

CUADRONG MATULING

—Inang... inang... nasi!

Ngana ning metung á anac cang induna. Itang calulung indu, mamalisbis ya lua... eya bubulad.

—Inang... nasi! nganang minulit ning anac á ditac ditac miminâ siuala qñg danup.

Itang inda... eya bubulad, lalauane ing anac na, mapuput ya pangisnaua... maibug neng maspac á salu.

—Queni bungsucu... ala nang tutulung gatas... danupan cu naman!

Itang anac, pagumasdane itang calukung inda, lalauaneng maratna at mipatutud ya.

¡Caniamana ning tutud qñg taung danupan! Ditac muman mau-ulu ya danup!

* * *

Pengatutud na ning anac, ing inda, itang bigung menganac á alang ipacan qñg bungsuna, penuma ne ing anac na, eya mingutngut... at mebabad ya lupa itang maputlang pungul qñg lua nang mamagus.

Quetang cuadrong macapangilabut, alang pintor á macapinta, uling alang color á macabague: maputlangan á cule!

Ing metung á babayng maputlang danupan, tatangis at maniambitan, uling alayang ipacan qñg anac na, at quetang marimla nang candungan ing anac á mangalambut, mipatutud qñg danup mu naman... metung yang cuadrong matuling... daraya at tatangis at alang pincel á macapinta, uling ita ya ing saquit ning casaquitan... at lungcut ning calungcutan!

* * *

Itang inda malagu ya pa, dapot nánana itang leguan, nun ena agamit man qñg anac nang danupan?

Iniapin agana:

—Ing Dios dinina nacung leguan: ing buacu matuling yapa qñg asabache: ding matacu, ngara malagula at alang macapibata qñg panlalauera; ding pisnicu't cule, paquíanti ro caring rosas, ding ipan cu canu nacara, dapot... nanung ulaga na ngan canacu niti? Mamamate cung danup.. cacu ebala, ó qñg anacu? Calulung pungul! Y tata mu.. Dios col baquet eya matanggal qñg lub itang alang pasalamat! Ing leguan cung pacapurian da, ing puri cung pagmulalan da... peniuala cu ngan quea... binie cu angga ing marine cu at...

Canita merandam ing mainang calugcug: milalapit milalapit, sisican.

Itang calugcug, manibat qñg metung á carruageng guguliutan ding aduang matabang cabayu. Itang calulung inda, sinilip ya qñg metung nang wacwac ning dingding ning bale na, at qñg ena sasarian, linaue ne ing macasaque qñg carruage.

¡Ya ing lalaquing menampalasan quea!

Mipagulisac ya canita at miguising ya ing anac.

— Inang... nasi! ngana niti.

—Nasi! Oyan... anac nang saliuwa ning camalian.. at pisla ne batal.

Cabang ing anac mamamate ya, ngana ning inda.

—Aduananan mucung nasi, ala nacung á ibie queca, uling malangino dening susu cu...! Mate ca..! Ua, mateca caring gamat cu, bacang é maluat magcasaquit á anti acu.

Matuling neng binili na, at panaquit nang mete ya, sinagacgac ya misan, dapot qñg sagacgac nang macapangilabut ning mamulang!

¡Itang calulu, memulang yapin!

ING CALADUA NING KATIPUNAN.

Ing bulan á antimong maputlang bulaclac, aslagana itang cabengian. Ing sabla tajimic ngan: lalat ing malume caluscus da ding méngabalag at méngalanging bulung, mararandam quetang malabung á mulajan á nung nuya lipang lipang ing metung á babayng maputlang antimo ing aslag na nitang bulan á parulum. Quetang susulud nang maputi, quetang malume at micacunu nang panlambang, balamu ing metung á caladuang lipang-lipang minapa queti qñg yatu, uling atin yang quelinguan.

¿Ninu itang dalagang tutulug mangapitangan bengi quetang malungcut á mulajan?

Qñg misan á bengi, bengi munamang anti canita, pataquid ne ing bulan: queta cabud mulajan, sugatán angusangus á pangisnaua detangane ning metung á Katipunan, pequisabi nang mapilit niti qñg isalicut nesa, uling panintunan de ding Cazadores at Guardias Civiles.

Iya, itang dalaga, qñg alang cacanlap canlap, qñg alang ditac mang capicacunuan, tinaidne gamat, at delane qñg cubu ning jardinero á macabusal caring palalung malabung á dutung, selicut ne carin.

Malapitla tagal ding tutuqui quea, at lalat calual na quetang masucal niting dalaga, lulub noman quetang mulajan ding manintun.

Selubunganala: quitnan de, at detang labinang capitan man epa miglaram, masalarang pepalual ing catayang sabling "tabalu."

Siniasat dane ing jardin: oh! ita ing camatayan, canitang pacacalulung dalaga... Carug salu, galimguim at capicacunuan, miliuasliuas sisiro quetang lupanang maputla...!

Iniang cai... memacbung cagnana ning ay...! á masican, acbung á mecamate qñg calulung Katipunan.

Itang dalaga, ausan tayang Obdulia... tapatapising yang milai quetang cubung nung nu manibat ing saingsing....

Disaneng macatungari itang bigung baintaung selicutna, canita milinlin ing biga, sinlagya ing bulan, masalayang masala, antimo ing lupa nang tiintiman ning metung á dalaga, caibat nang menimu; tengarane lupa itang sugatán....

Mipagulisac ya y Obdulia iniang aquit ne. ¿Nune iquit minuna canita itang baintau? Nucarin...? Miayaliuang pamigaganaca ing miliuasliuas linabas quetang canuana, dapot ena apitaluse nung nu carin.

Canita itang sugatán, biclat no ding mata na at ngana...!

—Obdulia...!

¿Nuna na dimdam itang sialang manlaus qñg pusu na?

—Ninu ica, at nuca ibat?

Itang baintau pinulis na itang sasaguese daya quetang lupana, at canita aquilala neng mayap Obdulia.

—Juliano?

—Ua, acu. . acu ing siping yung bale, ing quepalsinta mu sinaguji, ing quelinguan mu naman qñg misan á ayaldo. . Ibat cu qñg bunduc, paquiquitan cosa ding pengaricu at itang babaing emilaco qñg lub cu, dapot alben mu ing querasan cu.

—Patauaran mucu? ecu casalanan: ding pengari cu sinugat dacu pusu at iting sugat tiupa daraya. Juliano, capilan man eraca quelinguan.

—Salamat! Dapot ecu na acaquit..! Nuca carin. ¿queni,... lumapit cang ditac... macanian..! bisa cung mate qñg lalauan mu.

Mengaligquig ya, at caibat na nita, piniac no ding matana.. mete ya.

—Ibpacu nganang mipagulisac Obdulia, oini ing depatan mu caco! Pete mucu panamdám at binimbing me ing pusucu. ¿Tacsil neng da itang aldo dininan mucung biel ngana at caibat nang sinabi iti, mamulang, maninap balagbalag macasalbag á buac tilugane ing mulajan.

Detang Guardias Civiles at Cazadores, meumil la canitang iquit da, at linualang macacalale quetang mulajan, balamu tatacut lang tuquiana ning anino nang maputing Obdulia.

.....

Ibat na canita, y Obdulia panga benging capitangan titipa ya queta qñg jardin, ausane uari ning ena alabanan á sicanan; iniapin ding taung lalabas carin ngening damdaman dang cacaluscus at ating lipang lipang lilibut busal detang dutung, ngarang misisitsitan.

¡ING CALADUANA NING KATIPUNAN!

Y MISS PHATHUPAT'S.

SATSATAN.

Y Miss Yeyeng, metung yang dalagang mipnung colorete lupa, ngara qñg ding pengari na, bait la qñg metung nang suluc ning Capampangan, at qñg palalu nang malating balen; ulina niti y Miss Yeyeng, filipina ya manibat qñg bitis anga qñg buntuc at anga na ing sicoti nang buac, capampangan naman.

Ing biera deti, anti ning maluca mu, lasa mamagtinda mú, at y Miss Yeyeng marajil de canung acaquit mamuntuc guinatan ó caya bichu-bichung pagtinda nang pupuntukan at lalacad, nung nu carin ing sugalan. Angga ngeni, ala capang sucat panibayuan qñg bienang Miss.

Mipayapa ing revolucion, ing Gobierno Militar americano mibuclat yang Escuelas at memili yang mapilan caring sundalus á turu careti. Antining y Miss Yeyeng, Yeyeng-yapa canita, ala yapang Miss, atin yang aca-“suqui” careting sundalus, ó caring maestrong sundalus, pigpilitana niti ing papagaralane qñg Escuelang nung nuya tuturu, balang micaintindi, uling ngening misasabila, ing sundalus mag-ingles ya, at y Yeyeng capampangan neman, iniapin pig-imbutanang matalic ing magaral ya iti.

Mapilan mung bulan, y Miss Yeyeng, sasabi neng ingles, at caras na ning ualung bulan á tapat, qñg capamilatana ning maestrong sundalus, pepatad de qñg metung á balen, mig-maestra ya carin.

Iniang carine tuturu, sabian pa casi ing pamamali-quid da ding memalen quea, uling acaquit deng biasa ya mong ingles carela.

Macanian lalabas ing panaun: y Miss Yeyeng bitasang ene sasabing capampangan, uling ngana acalinguana na, at ing capampangan canu masias at mangasaclit ya dila, inia capilan man, eya mitulid á balid caniti.

Detang culam á macaquilala quea, ngening daram-daman da iti, agad da neng picalbitan, inalilan de laguiung melaus, at ing pemalaguiura, ining matni at masalingasang á laguiu: "Miss Phathupat's" laguiung menibat qñg tinauac nang malapad á pilit nang upitan qñg corcheng misnang catalic á bibilina, iniapin ala yang queliuan qñg patupat ó suman bulagtang matalic á bidbid.

Manibat na canita, iting laguiu mipalacad quea, at acalinguan dang melaus ing Yeyeng á malambut nang palayo; ing Miss Phathupat's ya ing mipalacad.

Macanian é malambat mibait ya "Ing Emangabiran" pajayagan á capampangan Baculud at qñg metung á fiesta ó velada qñg balen X. á nung nuya mitagun y Miss Phathupat's, babasan de iti, linapit ya y Miss, at iniang iquit na ing Capampangan ya, sinibi yang baguia, piling ne ing buntuc na at ngana:

—"Mi no entiende el pampango".

—"Mi no entiende ese castellano Miss", ngana naman ning metung á pusacal, pequiapusane tunu.

Detang pácarungut mipatiman la, dapot uling maqui-pegaralan la, agad dang linili't é pepajalata qñg malagung Miss.; at iti aguiang baluna ing anti reng mumulangán, sindlung narin, at ngana:

—Qñg camatutuanan tutucung pagcasaquitan, sabian ing capampangan at lalu pa nung babasan cu.

Caniting mapilan á amanung sinabina, linub langan ding angang dictionariong tinda, ó ngacu uari, ing inglés, castila tagalug á mababang pisamutsamut na, inia detang pácarungut, era na tutu acauat, mipacaili lang masican.

Mimua ya y Miss, inarapano ding maili at ngana:

—“Porque reir?”

—“Por el champurao Miss“ ngana ning minunang mequibat.

Lalu nang mesican ing sagacgacan detang maquiramdam, at y Miss. Phathupat's mitatas neman á vapor.

Ing metung á macarungut, ngana:

—Eyu pagmulalan qñg y Miss, eya biasang capampangan: muna uling malambat neng maquiutus caring sundalus á americano at ing cadua, ene Capampangan, ing caustana nita ing laguiu na Miss Phathupat's.

Canita memacbung, acbung á misnang casican, mitdas ya ing caldera nang Miss Phathupat's, at quetang asbuc nang masapa, linual ngan ing lablab ning Vesubio, ó ing angang sabing marinat qñg amanung capampangan bigja na ngang piguisan qñg asbuc nang maguing dapug.

— Alang marinel mapanaco! manlalasun! anac p . . . ! ngana, qñg mesabing amanung capampangan.

— Abal capampangan ya pala! ngara ding daramdam.

— Ua, eyu uari balu? ngana ning metung á macaqui-lala quea—anac neng matuang Godiung Cacbung á cabarriu cu.

Mipasagacgac lang masican ding pacayalbe: y Miss Phathupat's mipaquiuc ya canita, at quetang pamipulis-pulis na qñg luanang tutulu, tinuqui ing macapal á blan-quete quetang lupana, linto ing talaga nang cule, matuling yapa qñg duat; inia, iniang aquit da iti, lalu lang mipacaili at ngara:

— Abah! matuling ya pala!

— Ua, americana negra ya!

Gulisacan, pacpacan, sagacgacan ing mararamdam

canita. Y Miss Phathupat's ena na abata, linual yang tapátapisung qñg dalan at ngana:

—“Mi no vuelve en esta casa”.


—¡Adios Miss á é biasang capampangan!

—¡Adios Miss Alicie Roosevelt!

—¡Adios Miss Phathupat's!

Macanian yang pisalusalu ra at ing pacacalulung Ye-yeng, meco yang bulung bulung *con el rabum inter per-narum*.....

Caracal da ding Miss Phathupat's qñg panaun ngene... eno biasang capampangan ó picarinera ing capampangan, uling macasabi nong inglés á *champurao*.





Sol H. Swedh
1930.

LIDIA

CANG MARGARITA ANAHAW.

Aduananan mu cung salita: ngamu queta sang masanting at masaya; aduang bague aduan mung malambat nang ala cacu.

Ing «pluma» cu, muluat neng paldas: ing «Lira» cu sira ya at ing «Musa» cung mapagmaragul, malambat nana cung tebugan. Qñg plumang paldas, qñg Lirang sira at qñg Musa-ng mapagmaragul, nanu ing acua mu? Ala Titang, nune letras á tatangis, notas á ngungulan-gul, at poesiang lipang lipang; dapot panusigan daca, magsalita cu, at ing isalita cu ausan teng LIDIA anti mo ing macabuntuc caniti; eque isulat ing tutu nang lagiin, pablasang ing maqui bie caniting salita, mabie yapa, at mecad qñg emu misan acasabi muné,

CRISSÓT.

I

PAMISUMPANAN

Ing bulan, yang bulan á magumasid é bubulad qñg maliliari qñg bengi... yang bulan á parati rang sasacsian ding mipapalsinta, dingutana iti: canita ume neng magbilug, inia pin ala yang caculiculimlim á sala, malagù yang antimo y Lidia á canitang horas á ita, aslagana caring pinilac nang aslag.

Macalucluc ya lele ning auang, at itang canuanang malinis, macapainaua ya qñg gamat nang uanan: mimi-
misip ya.

Quetang malinis nang canuan, daralan ing libu libung pami-isip at quetang mibubuat á salu na qñg dactal á carug, acaquit mu itang masakit á mipapagcal quilub na.

Queta siping na ating catau... pagumasdane, lalaua-
neng maratna, balamu uari quetang panlalaue na agca-
tane't yaguiag pilit qñg capalsintana...

—Lidia!

—Ali, tatacut cu! Ecu macasumpa: ing sumpa, tutu-
paran... at ing é atuparan é sucát isumpa... at saca...

—Buri mu...?

—Nung macanian eraca paniualan.

—Buri cung damdaman queca itang pangacu nang
Gabriela de Estraes, Duquesa qñg Monceaux cang Es-
peranza de Crillon: buri cung ipangacu mu cacu, ing:
nung macapisabi cata, paquisabian mucu, at nun ali...
ing timan mu ..

—Itang buri mu... *Susumpa cu!*

Canita ing bulan meralumdum ya, ticpana itang ca-
tajimican qñg matuling nang bungbung.

II

ING TIMAN Á PANGACU

Calagu na ning aldo qñg babayng malsinta! Ing
angang macapatulug quea, balamu miyayaliua cule:
malalagu ngan, uling ing sabla, palaguana ning pamal-
sinta na.

Dapot ing babay metung yang lijim, qñg panugali na
dactal nong misulat, bista't ela micacayagpang á luruc.
Ding aliua pipinta reng antimong patipating mayumu
at mamu, at ding aliua naman, metung yang ganid á
macaimalan patipati.

Isanu ing tutu caniti? Aquit tang agad, cang Lidia
muman.

Ding dorados nang aslag ning aldo matatdas ing

rosa purpurea-ng mumuna qñg alaya, linub quetang baguiá mu macabuclát á auang á silid nang Lidia.

Mibablas ya iti: pinili na qñg imalana ing palalung masaya cule.

Calagú na canita!

Ing sabla macatiman nğan quea, anga ing palalung inatamlé, sasaguiua qñg panlalaue na.

Macanian lalabas ing aldo: qñg fiestas, qñg sabla sabla, numan caring aguman, nung nula macapitabnung Hector, ning lalaquing quesumpánana, milauayan la at caibat na nita "*ing timan á pangacu.*"

III

LUA

—Quiquiaca Lidia...? Baquet...?

—Ecu balu... malungcut cu... mabnu cung gabacan ing yatu, at nung atiu mú caring gamat cu, sinintang cuna ing mabilug á quetauan!

—Baquet?

—Yan... ya naman ing cucutang cu, dapot cutang á alang paquibat... Dios có!

Caring babay, ating macanian, emo balung piuculan á ugali at deti naman ilang macamulang.

Caibat na nitang pamiaduanğan, y Lidia aldo aldo mialiua ya ugali; itang "*timan á pangacu*" ena sisiro caring labi na, parati yang tatangis, macarungdung at é bubulad, balamu tatacut yang maquilauayan caring tau.

Y Hector, pagumasdana nğan iii, at maguinaquit ya. Tutulicsanang pilit ing sangcana, dapot qñg ena pami-bulad Lidia, lalu yang malilili.

Ditac ditac micacandayu la deting adua catau, aguiang ilang adua era balu ing casangcanana.

IV

PAGUINAQUIT

Qñg misan á bengi, masala yanaman ing bulan, ing

bulau á macarungŭt murin quetang *pamisumpanan* da, y Lidia, macalucluc ya quetang lele ning auang, qŭg auang mu namang nung nula misabing Hector qŭg misau á bengi.

Lepitane niti: panaquit nang Lidia, mangilag yasa, dapot y Hector piniguil ne at nŕana:

—Mananuca...? Malambat danacang pagumasdan, dapot ecu balung tarucan ing daralan qŭg lub mu. Nanu ing miliari...? Baquet quiquiaca...?

—Calinguan mucu Hector, antimo ing pamanŕalinguan cu queca, picasaman mucung antimo ing sama-cu... eraca buri mang acaquit.

—Macanian ing pamanupad mu qŭg pengacu mo?

—Ua, nŕanang Lidia at saca ya dinundung.

—Ecu maliaring abalu ing sangcana?

—Alimu, uling capilan man ecu sabian.

—Nung macanian, salamat queca, tangapan mung pasibayu itang *simpa* mu: susubli cu queca, ecu buring ingatan itang é canacu. Lacuan danaca... micalmá casa.

Meco ne canita: y Lidia, dingdungne ing canuana, eya miatná macabang horas, at cayatnana detang matanang malagu, mibacasan lang lua.

¿Buri mung abalu mal cung cacaluguran, nung baquet mipacanian la detang aduang caladuang micalugud qŭg sinaguling horas? Isalita cu queca, canita aquilala mu, ing alang matalic á aptas á é macalag at é balang sumpa matutupad.

V

LULAM

Nung macananu dégulan ing pamalsinta qŭg metung á babay, macanian naman á dagul ing pamisisi, nŕening aquilala mu qŭg itang babay-ng pilsintan, ene bague ning pacamal mu't pamalsinta.

Dapot... sabian ya canacu icong tanac na qŭg pamalsinta: ¿Sucat yeng patawaran ing metung á babay

aguang palsintan yepang miguit qñg sabla, nung ing babay-ng iti, pinialung neng anti mong alang ulagang pialungān, ing caladua yung malsinta quea? ¿Macaquit cong patauad qñg metung á babay-ng simban yu't delanginan... á, caibat nang pete ing malagu yung paintungulan qñg alang nanu mang pacauan, tampa-lasana nepang paniugatan ing pusu yo?

Icayu, icong quepaliariana caniti... sabian yu: ¿Ca-salanan uari ing macamaté qñg metung á babay, at paimaté naman caibat na nita, nung ing paintungul yu sira na at sugatana co pa caladua?

Mayumu ing mamataúad! Bisa cong patauad... buri yeng patauaran ing babay-ng menampalasan queca-yu... pagnasan yeng calinguan... calinguang pilit itang matuling nang depatan quecayu: ico cabud, buri yung uluan ing sugat yu, ing sugat á iniwā na qñg caladua yu, patinican ye daya, itang alang patanat á danyang tutulung bibingbing qñg pusu yu... dapot ¿acua na cayang langi niti, ngening balang horas, nuco man minguil, yang atatabnuan yu itang pataram á piniugat na quecayu?

Ing buang da ding sibul, ngening misaldac at misumpung caring batung agusana: yang marimlang sala na ning bulan: ing tiup na ning malumeme angin: ing dalit nang masaya ning abac... yan... yang sabla... mangabaligtad ngan qñg lalaquing mepilait, maliliaring lablab, abu, lasun at camandag á papate quea! ¿Macanau yang mamataúad ing mecanian?

Patauad! Caracal da ding sasabi canite, dapot bilangan mula mu detang macarapat!

Macanian ing mipapagcal quilub ning sa u nang Hector.

Catipa na queta cang Lidia, miglipanglipang ya caring dalan: mibabaya ya canuan, itang canuanang nung nu miliuasliuas daralan ing angang darayang pami-isip, maibug neng maspac.

Pilsintane y Lidia, mecad pilsinta neng malusuc, iniá pin lalu yang maragul á paguinaquit.

Lacad neng lacad, ena balu nung nuya diquil, nung nuya ume; mengari ya qñg metung á saquen á ala

nang manibala, lutanglutang ya libutad ning malat á malimbuyu.

Magalingaldo na iniang manic ya queta carela: capanic na, biclat neng macacalele ing auang at pegumasdaneng lalbug ing bulan.

¡Nanu ing isipan?

Maralum dum...! Malulam...!

VI

LAGNAT AT ALINBUYU.

Quiacayu caladuang tampalasan! Mecad é cayu naman mipatutud caibat yung dinapat maroc. Ing dase yung pagqueran, mecad maguing baya ya, durulucana co balat. Nanung isipan yu caibat na niti? Balicdan yu ing dapatan yu, mecad mangaligquig cuyu naman...!

Y Lidia, eya minapun man quetang benging ita: migculung ya qñg silid na: malingasú ya.

Silbag ne ing buac na, at caquera na, quitcut ne ing bentuc na quetang maputing ulunan, mengisnaua yang saldac.

¡Nanu ing malililiari canitang caladuang bigu?

Eya mipatutud: yang tutud á pacalinguan qñg sabla sabla, darayu caring mata na; dapot ing lalung masaquit ing é ya man mipaquiac, yang luang panuas, panugnas qñg sucá á lub, é bisang sumiro caring watana!

Calulung Lidia! Itang bengi durungdunãane, acaquit neng mibabata, dapot ene dirinan capaldanán.

Quetang malagnat nang pami-isip miliuasliuas lang daralan ding macatibuchuc á anino: ding aliua titi-manan de at ding aliua pamalcaran da neman.

Tatacut ya: bisa yang gulisac, dapot ing siuala na mapupuput, epa linual man quilub ning saluna!

Sasala! Detang anino macapaliquid quea, mitda la, dapot caring panimanmanang Lidia, aliua ing minalili.

Ing acaquit da malutu, daraya... at libutad na niti, ing metung á bangque, ing bangque na nitang tau nang timpalasanan.

Gagalgal ya mabilug á catauan... mangaligquig ya. Itang calulu atin yang 40 grados qñg termómetro: micacaduan ya qñg lagnat!

Nung aquit neng Hector canitang asque na, mecad é na ne paguinaquitán, patauaranane, uling lalabis nang parusa itang macalunus á dimpa quea.

Lagnat at alimbuyul

VII

MASAQUIT A PAMIPAGCAL

Sasala... mitatas ya ing aldo.

Ding abena bale Lidia, pagmulálan da ina antina quetang horas, eya pa mibanġun, lalu't lalu na, ena sadiang ugali iti.

Macanian man y Lidia, uling ya ing *matang danum* queta carela, ing ditac nang nasa, ing ditac nang picudta, mipácamalan, mipácundangnan ya sabi; at uli na niti, ipasarina ing burina.

A las ocho ne ing aldo: ding pengari na, ding ipus at detang sablang abena bale, milalanayan la at pasuglapan dang mata ing almusal á macapanaya, balamu pagmulalan da ing anti na quetang horas, epa mépangnan.

Ticad-ticad lang lulub, balara matudtud yamu, ere buring masira tudtud.

Mecabulad meramdám, ibat quetang silid ing macabang saingsing, antimo ing saingsing na ning metung á wapapanás.

Ding pengari nang manaya qñg pangaguising na, dimdam da iti: milalanayan lá, at anti mo ding guiliut da qñg metung á lubid, miagnan lang tinicdó linub quetang maralumdom á silid.

Biclat do ding auang: iquit de y Lidia, macabulagta ya't macatngle buntuc, meguing tampal ya lupa, mataté yang mataté... misna yang dagul á lagnat!

—Médico... malagua! n̄ana ning tata.

—Médico malagua!, inulitna ning indu, cagnana ning n̄ulangul na.

Detang anggang ipus, mibalicuas langan, mibabalan̄gi nong menintum Médico at q̄ng misasaguli, ing Doctor L., queta ya cabuntucana.

Pepainum neng panulu, at saca ne pegumasdan.

Ing saquit nang Lidia, mibalitang agad: detang caquilalana't cacaluguran dalaga at baintau, pimiraplan deng inapa, at q̄ng sinaguliquinatmu ya ing bale caring taung mequigló.

Cang Hector mibalita mu naman iti: ena balu ing daptana: buri neng aquit pasibayu... buri neng patauran... buri nang calinguan q̄ng ditac á horas, itang dpatana quea...

Palsintane pa? Eta balu! ing pusú ning tau metung yang lijim, at ninung macataruc q̄ng calijimana!

Masaquit á pamipagcal

Painaua ca Titang, mecad singcup na ca salu q̄ng ca-saquit ning sasalita cu.

VIII

PASIBAYU ING TIMAN Á PANGACU

Caibat ning dactal á pamicacunu at pamipagcal, mi-guagui murin cang Hector ing sadia nang pacamál cang Lidia.

Pimiraplanang mibablas, tinipaya at tiglus na que-tang bale simpa na nang é panican pasibayu.

Disano carin ding dactal nang caquilala, malungcut langan at misísitsitan la mú.

—Mananu ne? n̄ganang Hector.

—Mabayat ya canu.

Nanu ing saquit na?

—Lagnat á maragul.

—Capilan pa?

—Era balung pamalita, macaguiung n̄gening abac

mag-á las ocho, dimdam da niang sinaingsing, saingsing á misnang cacaba. Liban de, disnan deng macalunus, misna yang dagul á lagnat.

—Ninu ing mumulu quea?

—Ing Doctor L.

—Ngana paya?

—Mabayat canu, tela pin macanian, uling balamu anti yang jibang, sasabi yang dili na.

—Nanung sasabiana?

—Emi balu, é micácaúne.

Canita lulual ya ing Doctor, at panaquit da quea detang milupunglupung, ngarang quinutang:

—Mauanu ne?

—Ya naman, nganing Doctor.

Buri queng aquit, nganang miling á metung caring cacaluguranang matalic Lidia.

—Acu man, nganang Berta.

—Acu man, ngara ding sabla.

Ing Doctor ngana qfig lub na.

—Iti ya ing marauac dang ugali ding filipinas, ing sabla buri rang aquit.

—Milub came? nganang minulit Miling.

—Ua bungsu, nganing Doctor; dapot eye lilingasuan, eco sasabi nang sasabi qfig daramdamana, pota...

Linub no canita qfig silid nang Lidia, at y Hector naran semantalanana iti, tinuqui yang linub.

Pacibuciat la ding auang, y Lidia macaunglé ya buntuc, misna yang calaré lupa malutu la ding labi na, tanda ning maragul á paling panamdamana.

Lepita neng Miling at ngana:

—Lidia!

Y Lidia, eya balubad.

Caibat na niti migatajimic. metung man alang bulad, milalauayana la mu.

Mecabulad y Lidia, biling ne ing buntuc na, be-liquid ne ing lupa na caretang magumasid quea.

Mengisnaua yang saldac, at caibat na niti, sinungo caretang labi nang malangi, ing ditac á timan.

—Lidia! nganang Miling, atin cang buré?

—Ala! ua, ua... atin...

—Nanu ita?

—Calinguan mucung antimo ing pamangalinguan cu queca at...

—Nano?

—Macapangaligquig; Emu cu lalapitan... Acaquit mu yang daya...? Yan qfig bangque nang... mequent... mequeni... patauad patauad...

Y Miling belicdano detang abena qfig silid balamu uari, buri nang icutang carela itang ena apitalus á amanung sasabianang Lidia.

—Libang ya! nganang Berta.

—Emucu cucutnan... nganang bulungbulung Lidia, ecu maniabi mate cu man... abe cu nang mabaldug qfig aun iting calijiman.

Cang Hector, metung mang amanu alang miligtas quea, paquiramdama na ngang mayap. Iting amanu yana man, ya murin ing sinabina quea na benging misabi la, cutudcutud mu namaug anti ita, ena balung pibaldugan, magugulu ya isip.

—Bisa cung quiac, nganang Lidia, dapot ala na-cung ilua... alen mu.

Canita adua capatac á lua ing inapsa ra detang mata na, adua mu cabud capatac, at misalud que-tang maputi nang ulunan.

Lepitaneng Hector panaquit na canita, ena na abata, at ngana:

—Lidia mananu ca?

Panamdam nang Lidia canitang siuala, biclat no ding matana at ngana:

—Ica...?

—Ua, acu!

—Hector...?

—Ua...

Tiniman ya canita, dapot ditac mung ditac, lalat mibacas mu caring panat nang labi, at meliquid ya casumangid.

Ya murin galang ita, *ing timan, á panjaco?*

IX

NINU Y LIDIA?

Caministilan aquilala tané ing bie na niting malungcut á salita.

Ninuy Lidia?

Y Lidia metung ya caring palalung malagung dalaga qñg balen B. casantingan ya dagul, eya maputi ene man comangui: ing cule na miquequealan gan miayo ya puting emu balung pamalaguiuan.

Ding mata na, ela mapundat dapot malagû la at lalu na nung manlalaue la. Macaba ya irap at matuling la namang anti mo ding quile nang balamu guinulis mumú.

Ing arung na maquinis yang maimpis, ing asbuc na, anti yamong metung á cajang coral nung nula macasinup-ding ipanang malino anting nacar.

Ing quimut na at ing sabla nang panasque, paquilala na, ing alang casamutsamut ditac man itang daya nang malaya.

Mayap ya panugali, maganaca ya't mayan á daya, dapot ibat qñg malati ya, pepaquilala nana ing maqui panugali yang talagang quea, ene apatuqui qñg gampa na ing aliua, nun é murin macanian ing talagang quea.

Ing salita na masaya, malambut at malambis, at ngeni namang cai, maparas at matula, lalu nungmamuisit ya.

Ing aili na, palague at malinis, anti mo ing qñg metung á angel.

Ala yang capag-camua metung man, caluguran de ngan, at cacalugurano ngan naman.

Iti y Lidia.

Detang minapang cacalugurana pamanamdang da quetang sasabianang ena balu, milauayan la, at saca la misisitsitan.

Canita linub yang pepasibayu ing Doctor, quinua ne pulsu at linaue ne ing reloj.

—Yanaman, ngana.

Y Miling ya mo ing malabit dili caretang babayng atin carin, at yanaman, ing cucutang mung cucutang.

—Nanung atina Doctor? ngana niti.

—Tifus! ngana ning Doctor.

—Jesus! Jesus!, ngara ding sabla.

—Mayapa lual na cayu, bacong é maua quea, ngana ning Doctor.

Linuala canita, y Miling quiquiac ya at detang aliua, pasayanggan deng tutu nung mate ya.

—Nanu ing masaguit na Doctor? n̄ganang Hector, iniang ila namu.

—Yang calulu malsinta ya, at mecad tinangap yang maragul á sucál á lub q̄ng palsintana, inia macanian.

—Ecasi...

—Ali ya, sinabi cumu ita bareng é lilingasuan.

—N̄gayu...

—N̄gacu q̄ng queang delirio carin cu ajalata, dapot...

—Ninu caya ing mecapauli caniti?

—Eque balu, at nung baluque ya ing masanting ipanulu q̄ng sasaguit na.

—Mabayat?

—Mabayat, dapot yang cayanacana nung sumaup, eya maliuag pacayapan.

—Danum! n̄ganang Lidia, quinutud na itang pisasabian.

Y Hector, linapit na itang danum, pepainumane.

Ind Doctor quinuane ing termómetro at cabang cacuanane, n̄ganang Hector.

—Mipaldana ca?

Mibalicuas ya canita y Lidia at n̄gana:

—Queti camo? Lacuan mucu! Bata mucung tatampalasanan!

—Magdeliriu yamu, n̄ganing Doctor, pamanamdám na canita.

—Ua, na, n̄ganang Hector, at linual ya quetang silid á nung nuya mapupuput.

Nanu ing sigalut á iti? Saguli sumala, eca mainip.

X

SUSULUNG ING ALIMBUYU

Dacal ing miraras á ligalig q̄ng tau, dapot ing ligalig á ipasari na ning sinta, ya mung alang laguiú at ya namang alang panulu.

Atlu nang aldo ing lagnat nang Lidia, n̄ganang mabá, n̄ganang mitas; dapot ing cayanacana, antimo ing sabi ning Doctor, sasaup, inia piú ena mau babayat.

Y Lidia at y Hector, detang aduang caladuang mipapalsinta, macalunus la; ilang adua paquipagcalan dang pilit ing maroc dang calma, era balu nung nú menibat at migmula.

Ilang adua mibabata la, dapot era bulu nung nanging casangcanana. Y Lidia, caibat nitang delirio, migtajinic ya, lasa patingapun macapiac ya mata, at nginging imulat nala, itang á lauena, nanu yamang bague, ene patdan mata, dapot qñg laue matamle at salunan.

Qñg misan á aldo, iniang ume neng paimauy, nãana cang Miling.

—Ninu na nãang minapa cacu?

—Dacal nala. Ding angang cacaluguran ta at caquilala. Selese na nongan canita, metung man alang milicta, dapot iniang caras, na qñg laguiú nang Hector, beliquid na casumangid Lidia, at nãana:

—Nanung aldo ngeni?

—Martes.

—Martes... martes...

—Ua, ualu nacang aldo masaquit, mayap namu mipaldanaca.

—E masaya quean lual?

—Baquet?

—Bisa cung lual,, mainip nacu queti.

—Maroc.

—Bisa cung lual, nãacu na! nãanang minulit Lidia.

—Capa, ating masanting, itang queta lual, ilub ta queni.

—Ua.

Y miling canita pemiraplanong inaus detang queta lual, detang cacaluguran dang maquisaupnan carin.

Calub da deti, timananala at pepabuclat no ding auang. Canita ing maputlang sala ning gatpanapun inaslagane lupa; malagu yamu, dapot qñg lagú nang matamle ning metung á salunan.

Mipágsasalita la, queang pamipagsalitang masaya at nung nú mangapaturu, ding caralangnan.

Ing magdala canita y Miling, itang dalaguitang é mamaco saya á tutu rang caluguran.

Mecabulad lulub ya ing metung á ipus, pabalu ne y Hector á maquisabing lungub.

—Salamat ing sabian mu, nḡanang Lidia.

Ing ipus linual ne canita, dapot agad nanamang mibalic.

—Pasabi rapu nung milub la, nḡana.

—Atin queng pisasabian, ume naca.

—Caroc mu naman, nḡanang Miling, baquet eme pepaluban, metung ya caring mayap tang cacaluguran at maibug nanang nanan ing cumayap ca.

—E raca burung macutud á calabitan, nḡanang Lidia.

Inda nang Lidia lulub neman canita, at nḡana:

—Mecone y Hector, matula ya ing quinayap naca, dapot misundu sa canu, angang esa cumayap lubus.

—Salamat, nḡanang Lidia.

XI

NOCHE BUENA

Milabas ing peparumingu ibat na canitang aldo miari tang salita: y Lidia sisican ya at detang pisni nang maputla, micuculayan la qñg malare cule, misusubli ya catauan.

Itang bale misnang lungcut ibat iniang misalunan ya y Lidia, mibalic ya saya, at mibuclat lang pepasibayu ding auang na; detang sampagang mengalauat mengapabustan, sinaguiua lang pepasibayu.

Ding madreselvas salucuyan dang mamucu at ding dallas, tulipanes at champacas, pagparangalan danaman ing misnang calagu rang cule.

Ca-vi perasana ning pascu.

Caring dalin, mibabalangi la ding tau, masaya la nḡan á lupa.

Ding sabla miadiala, at misasadia nomang pamie rang aguinaldo, aguiang suman mung magadtu.

Banua banua pagmasusianang Lidig ing *noche buena*, dapot caitang banua, selanana, uli ning misalunan ya.

Y Miling ya ing mibili caniti, iniá pin itang calulu, ene macapaniabi man qñg pagal na.

Malati yamu ing bale ning Miling, emo anti ing cang Lidia, dapot atin yang malapad á mulajan, malinis at malabung á tanaman.

Libutad na niti, carin de binili ing metung á “da-

marang" gueyac qñg bulung bulung dutung at pinia-bitanan deng libulibung faroles.

Y Lidia canitang abac na nitang gatpanapun, tinangap yang metung á tarjeta cang Miling, mapilan ya cataya, at nḡana:

Emu sasalanan ing pota.

Miling.

Ene pequibatan, miquequealangán ya, tatacut yang mipasibayuan. Itang capicácunuan leco na ning Dcctor, iniang yapa ne.

—Maliari nacang ume numan carin, écása paipagal, nḡana quea.

Itang gatpanapun diquil nengán Lidia qñg pami-sadia qñg imalan á isulud na.

Mebengí.

Detang libulibung faroles quetang mulajan sinindian do nḡan.

Alipatpatan ya uari itang jardín, iniá nung lon meng marayú balamu ing metung á *castillo* ing tatampusan da ding miayaliua cule "lucis de bengála"; dapot itang sálang manibat caretang sulu é macasnuc: malambis at mamu, uling papatdana taran ning bulung ding dutung at ning manene aslag ning bulan.

A las nueve pa mu, docal nang tau: dalaga't baintau, pacagani la nḡan qñg ganing pascu.

Ing banglung manibatan caretang sampaga cacalana itang carinan: ing saya, cule, musicas at miayaliuang sampat, mipamisan carin quetang benging ita.

Ding babay, mamarú lang miayaliuag pifiang peminan at pemaltacan brillantinas.

Ding orquesta, titigtig de ing sinfonia ning "Lohengrin" yang músicang magaló at mamialungán á bucu-dung cang Wagner.

Canita lalung melingonḡo, lalung masigla, uling yang música, at lalu't lalu na qñg babay-ng filipina tutung macapanasag.

Y Hector atine carin, macaluluc ya lalam ning metung á acacia, ning acaciang tatangis pangá bengí.

Marayu yang ditac caretang docal, dapot labas laba-

san de detang mipanucsung dalagang mipapalibutad quetang mulajan.

Mecabulad detang dactal á baintaung macapulung quetang daralanan, misagsag la, dininan deng dalanan y Lidia, y Lidiang Reyna na ninsamang fiesta.

Melingon̄go, q̄ñg misusuman̄gid ing miraramdam:

—Calaguna!

—Lalu yang melagú!

Tutú pin y Lidia q̄ñg gani nang crema-rosacea á penagaulan brillantinang azul zafiro, balamu ya ing Hada ning bengi, nitang cabengian á masaya.

Selubunga neng Miling at ding aliuang dalagang pacatipun carin.

Lalaqui't, babay migpatulug la quea, dapot ing mayumung música silbag nong pepasibayu at balang metung quinanua yang acapareja na.

—Ica Lidia eca terac? n̄ganang Miling.

—Ali cu.

—Teraca at ipanintun dacang capareja mu.

Ene menayang paquibat, at balus yang sinulud q̄ñg busal na nitang mulajan, panintuna ne y Hector.

Detang adua mipamulala nala mú iniang miquit la, uling ilang adua, era uculan man ing atiu carin ing metung at metung carela.

Ban é majalata, y Hector binie ne ing tacde na at y Lidia q̄ñg ena sasarian, quinua na neman.

Migmula ing rigodon: miari ing aduang número dapot detang mipapareja, ela pa misabi cataya man.

Iniang magyari yari ne ing número 4, n̄ganang Hector.

—Nanu ing mua mu canacu? Buri racang acasabi at pagparalampucu ing paquisabian mucu.

Pamanamdang nang Lidia canita, licuananiang misan at linucluc ya q̄ñg metung á suluc.

Y Miling á é teterac pagumasdana ita, pupulái yang linapit cang Lidia at cutang neng cutang nung mananu ya.

—Ala n̄gana niti, meliu cu, dapot milabas na.

—Enaca teterac at alilan danaca, n̄ganang Miling at linucluc ya uananang Hector.

Miari ya ing rigodón, y Hector masaspac ya sálú

at metung ya uaring dupug ing mitatau quilub ning salu na.

Itang babay-ng ena asalacayan á ugali enane seuan paniugatan, tatampalasanene angga qñg piarapan, ena pigaganaca ing picailian de ding macatingid canita.

Dapot y Hæctor, tutú yang uagas, itang cauagasana babaul neng mamali qñg mainang babay.

¡Calungcut na ning *noche buena* nang Hector!

XII

CAPLAS, BUSAL NING SAYA

Caibat na nita, mituquituqui na ing miayaliuang terac: lalung mesigla, pablasang milaco na itang pamititiguilan da ding cayanacan á mumuna quinsamang fiesta.

Y Lidia, ene tinerac; y Hector man. Ita atin yang isasangan: ing pamaimáuy na, ó y Hector?

Balang mecasiacasu carela agcatan dong terac at deti mamaniangan la.

Majajalata na itang bili ra, iniang lapita neng Miling y Hector, inagcat neng terac.

—Ecu pa tinerac anggana nñeni, nñana niti, buri mu ing teracatan.

—Itang buri mu.

Tinerac la canita, dapot catulugan mn tinucnang la at saca la migmain.

Y Miling tataguyud neng tunggal ditac y Hector quetang carinan á nuya carin y Lidia, at nñana quea.

—Balamu mipagcacamua cong Lidia.

—Ali cami, acu... yang balu cu ita, dapot ing quea, ecu balu, Baquet quitang mu yan?

—Ala, sadia-sadia misna cong pamibasa, dapot nñeni, balamu mititiguilan cayu.

Canita mitulid la qñg lele nang Lidia.

—Bisa cong terac? nñanang Miling quea.

—Ali cu.

—Parimlan yu uala ing fiesta cu: ica eca bisang terac, Hector teterac ya man, balamu alayu qñg lub na.

—Emu paniualan Miling: nung ating pigcasayan cung fiesta, alang aliua nune ing queca.

—Capa, nğanang Miling minum cu saguli.

—Saupan daca.

—Ali munacu, at misanaya licuan siping nang Lidia.

—Panayan mucu, minum cu naman, nğana niti at licuane y Hector.

Metigtig la ding campanas: qñg tigtig dang masigla: miari na ing maitinez at daralas dana ing misa.

Panamdam da canita detang cayanacan, pasigayac la nğan, alang bisang mitagan bale.

Ding babay sidia ro ding pañoletas da at linalam do caring saclera.

Milulú-lulú lang lulual qñg dalan: ding orquesta, tinigtig lang paso doble at tinuqui la qñg Pisamban.

Ing bulan misna yang casala, bibitiu de uari at aslagana itang masayang pamannimbara detang dalaga.

Y Lidia qñg masipit dang agcat quea detang cacaluguran, tinuqui yang sinimba at siniclaud ya qñg tulid ning capilla na ning Virgen de Correa.

Mengaddi ya.

Itang babay ng emu abut uculan á panugali, qui-
quiac ya arapaning Virgen.

¿Baquet?

¿Ipaniuala na canitang malam á indu, itang alim-
buyung bubugbug qñg caladua na?

Ninung macatarue qñg uculana canitang horas! Cai-
bat ning alzada, linucluc ya, pinulis no ding mata
at menaua yang ditac á pilubluban.

Cayari ning tauling evangelio, lepitaneng Miling,
belicdane niti at timanane.

—Tuqui cang pasibayu carin bale, nğanang sinit-
sit Miling.

Y Lidia, ene pequibatan.

Miari ing misa, tinuchang ya ing organo at tinigtig
lang masigla ding orquesta.

Pasilual no ding tau, ding lalaqui, ila ding pesiunaminabat la caring aduang pasbul, balang linual á ba, bay sisilangán da.

Ding babay, detang manginlag na caniti, memagtabucbuc la caring panu ra, barong é aquilala.

Canita luluál ing tapuc da detang caquilala tana: mumuna ya y Lidia, dapot eya macatibucbuc at ing lupa nang maputla, aslagane ning bulan.

Ing babay-ng filipina, balamu cacalugura ne ning bulan, capanlalaue ne, qñg laue nang matamle ning Reyna ning bengi.

Itang masayang tapuc linual qñg Pisamban, linacac antabayanan da ding orquesta; cabang dalan micaili la at mipapanuesu, y Miling yá mû ing daramdaman mu sinala cayagnana ning sagacgac nang alang casamutsamut.

Y Lidia, eya bubulad, aguiang nanau neng icanit qñg tuesu; qñg pamanuesu na, ngara neng pitulan ngara-neng pinuan.

Itang sayâ, minanga qñg tulid nang bale Lidia at é sa mepupus, nun eya cacauani iti.

Dacalang cacauat, dapot eya pepapiguil, ing sasangcana ing pamai-mauy nang babaua paipuyat quea.

Memun ya caring sabla: miumâ lang Miling bayu ya linub qñg pasbul.

Iniang mabun ya caring lalaqui, apagumasdanang alane y Hector.

—Angga bucas, nganang Miling.

—Angga bucas, nganang Lidia.

Micauani nala: itang tapuc tinaglus queta cang Miling at y Lidia menic ne naman.

XIII.

ING ANINO

Capanic na bale, linub ya qñg silid na, biclat ne ing auang, uring ing undap-undap á sulá quetang silid, ene acuang pasalan. Matudtud no ngan disana: caring pengarina at ipus, ala nang macaguising metung man

Mibablas yang dili na.

Itang imalanang piña, inalilana qñg macapal á franelina-ng pagquerana.

Itang bengi misna yang carimla, mangtutut qñg butul ing tiup ning angin.

Ume neng magquera at isara na nesa ing auang iniang quinaluscus busal ding tanaman.

Canita ing bulan ticpane ning lulam, meralumdum.

Sinunõ ne ing buntuc na at ing metung á anino sinaligsig yang linual busal ding tanaman.

Pagumasdaneng Lidia, milalapit ya milalapit ya, daragul ya at sasala neman á asque.

Alang capicacunan: anino yang tau! Bisa yang guliac, eya mibugnus á siuala, bisa yang murung que-
rang auang, dapot balamu quinauat ne ning metung á gamat á ena acacuit.

Nanu ing daptana? Eya macapapiglo, eya milaco, bista't eya tatacut.

Cabang micucunut yang macanian, ing anino lalapit ya, tinulid ya qñg auang

—Lidia! ngana ing anino.

Y Lidia guinalgal ya.

—Lidia! mapaliaring emu nacu caquilala?

—Hector!

—Ua, acu!

—Nanu ing buri mu?

—Ing sabla, angga camatayan, emu ing daraptan mu cacu.

Caibat na nitang mapilan cataya, migtajimic, ninu man carela alang mibulad.

Tinulauc la ding manuc at miuman uman canita, metigtig qñg Pisamban ing la una, horis á inulita sna ning reloj queta qñg siduan.

—Buri mucung paquiramdaman? nganang Hector, caibat nitang macapangabala nang catajimican.

—Nanu ing sabian mu?

—Eca migaganacang isugat cu qñg lupa mu ing depatan mu cacu: maluut nacing mibabata at nung atin cupang sucat pibatan, ating mung lulanan quening salu cu.

—Ya nã ing sabian mu yan...?

—Ua, nḡanang Hector.

—Mayap, nḡanang Lidia, acu buri racanamang aca-sabi. Ica sibli mu cacu itang simpacu... acu, susu-bli cu naman itang queca, at... manaya ca.

Canita minurung yang bigla qḡg auang, biclat ne ing metung á cajun, quinuana carin ing cayaptas á sulat: ing sulat nang Hector.

—Oini ing sulat mo, tangapan mu, at panayan cung ipatad mu naman ing cacu.

Caibat na niti, sera neng bigla ing auang.

Ing bulan sinlag yang pepasibayu, siluana ing manguing pisac á pami-isip nang Hector.

Carin... quetang marayu nang bale Miling á baguia muna mû á babatiauan, meramdani yang masalang masala angga queta cang Lidia, ining romanza.

Blanca, Virgen del bosque

Reyna del alma,

Ven á mis brazos

A soñar de amor!

Ya ing poesia nang Guerrero á quebit na qḡg *Penzo*.

Pamanamdani nang Lidia canita, mipagulisac ya.

Itang romanza ya ing parati nang pacantang Hector quea, iniang macabusala pa qḡg malagû nang paninap ning pamipalsinta!

XIV.

ING SULUT NING CALIJIMAN.

Itang calulung Lidia, malsinta yapa: quiquiac ya nḡening yanang dili na, nḡening ala nang macaquit qḡg queinana ning pang-a-babay na. Aguiang nananang bugtuan quilub ning aû itang sintang pasaquit quea, ena acuang mabugû, mengalauat no ding uacat na, inia pin qḡg balang pibugtuan, milalacuan lang tiune qḡg mibabata nang pûsû.

Calulung babay! Bisa yang paquit sicanan, dapot lalto ya queinan: bisa yang lumaban, ala yang ilaban, at quetang pamaquipageal na, ala neng aliuang sandata, nun ena ing hâ nang panlaban.

Aquilala ne y Hector busal ning malagung paninap

ning labi nang pitung Abril, pilsinta ne qñg ena balu, mengari ya qñg pintor á mipinta qñg Diosa ning leguan, caibat neng pininta, delanginane.

Itang paninap busal ning ligaya, miganap atlung banua, atlung banuang sacasaquirap mu qñg quenu mang malsinta.

Caibat na niti, tunggal ditac itang malinis á banuang alang camusing musing, malululam ya, meputâ ya ing aldo na at meralundum ing aslag na.

Busal na niting dalundum, carin la ngeni macalibutad ding adua, ela macaquit lualan da, in â ela milual quetang casaquitan.

Calaco nang Hector carin, tiglus na queta carela, inugse no babo ning mesa detang macayaptas á sulat, at migluclucan ya.

Pi isipisipana ing mengapaliari quea quilub ning pilan mung aldo, dapot malilili ya qñg ena abut piuculan á sangcan.

Quetang asque nang macanian disuane ning munag at iniang masalana quinnua no ding sulat, quelagano aptas.

Pepalabas no caring mata na, dapot caras na qñg capat ó calima, mipatiguil ya. Ing metung caretang sulat eya quea, ene aquiquilala letra at aliua ya qñg papil á gagamita na.

Linaue ne firma, iniciales lamu, quinarug ya salu at binasane.

Lidia:

Buri racang acasabi: nang ume ca queta cang Miling, ume cu naman.

F. D.

Sulat lalaqui, dapot ene caquilala ing maqui lagu, â careting aduang letra.

Ing panugali nang Lidia, oiti ing masa â na, alâ nang capicacunuan qñg pigtaesia ne. Baquet ena sinabi quea? Baquet lingaranane qñg tu-û? Ing cauagasana, sasacuil na itang pasuclab á panugali, casusumamiana ing dapat á lijim at iti naman yan û ing paguinaquit na canitang babay-ng ligurana.

Misip-isip ya, caibat na nita sinulat ya, mapilan n û cataya at legue ná naman ing sulat nang Lidia,

binalut nang mayap, pequilangcap na qñg sulat na at pepasubli na.

Inabe ne caretta ing sulat nang F. D., binabo ne, canita ya ing muna nang aquit.

Pananggap nang Lidia caniti, mipamulala ya, ena uculan qñg sugatane qñg pataram á piniugat ná naman quea. Dapot nung nuya maragul á pamagmulala, iniang aquit ne itang sulat. Macananu yang miras quea? Ninu ing minie? Quenu ne icua?

Itang calulu quetang dapal na, ena balung apa-qui-ibie ne caring sulat nang Hector.

XV.

METUNG Á MICATAGUN

—Miling—nganang Hector—atın cıng icutang queca, panayan cıng emu cu lıngaranan, antimo ing sucut qñg mayap á cacaluguran.

—Nanu ita?—ngana niti.

—Baquet macanian ya panugali cacu y Lidia?

—Baquet?

—Mecad, apagumasdan mu ing daraptana cacu, pamı-ıquit mi, eya macuculanğan sangcan banacung pılcaran at pacarinayan qñg arapana ning ninu man... mayumu ité?

—Apagumasdan cupin yan, at acuman mipapamulala cu. Nanu ing maliliari?

—Yan, ya naman ing cucutang cu, dapot enaca paipagal mimisip, isalita cu ing sangcan.

Selitana ne quea itang sulat at cabang sasalita na mipapamulala ya y Miling, uling itang calijiman ena abut uculan, at enapa naman selitang Lidia quea.

Macanian lalabas ing aldo: ing pepabanuang lasat casaqıtan apıbıbatara. Micaquit la mang Lidia ilang Hector, anti la mong é miquiquilala, lasa mipanğinlag lapa, balamu ing metung at metung carela, ena ne buri mang acaquit ing penibatana ning sucut ning lub na.

Y Lidia, migbayu yang ugali ibat na canita: mi-

gaua yang sayâ, qñg sayáng ena panamdaman man, in â nung pagumasdan me, balamu bacas man ala nang macatagan quetang atlung banuang pami-abia-yan da.

Y Hector macanian mu naman, nanupata micacan-dayu la tungal ditac at macanian sang mepupts iti, nun emu ing metung á micatagun.

Iti miliari qñg Estación S. Fernando, at qñg tauli nang viaje ning express á mamamaté qñg Culiat.

Ya ing ca-visperasana ning naval qñg Culiat, nitang masayang fiestang piyuyucyucan da ding miayaliuang balen. Cacatmula ding coches caring taung maquipag fiesta carin at mitmû neman ing anden caring macapanaya quetang Estación.

Y Hector metung ya careti, dapot eya pa macasaque, panayanang mayari ing “cambio”.

Pangayari na niti, mipapaglulu lang sasaque detang taung misnang caracal, at metigtig na ing caduang campanada, ela pa mimin sinaque.

Metigtig ing catlu... lalu nong melingõngõ, micainge at mitutulacan detang dacal á taung pasisaque.

Biclat do ding coches de segunda, quinatmu la naman, saque ne sana y Hector, dapot quinauat ne ning balús dang paniatang ding dacal á babay't lalaquing tatagal qñg tren.

Ing Jefe de Estación, balana macasaque no nãan, tiniup ne ing silvato, memius ya ing maquina: guinaga ya ing pasiuc na at sinapuldung la detang macabang coches á guiliut na ning vapor.

Ing metung caring babay, macasampane ing metang nang bitis caretang balitang, ditac niamû mitungari, nun ene á salud Hector.

Simpa neng pemiraplan at caibat na nita, ya naman ing sinaque.

—Salamat! nãana ning babay.

Panamdam nang Hector canitang siala, quinarug ya salu at dicu ne ing cupia na.

Linacad ya ing tren: carin, quetang macabusal mararamdam ing siala nang Miling, panintuna ne y Lidia.

—Aticu queni, nãana niti.

Linapit ya quea at linucluc ya siping na.

—Banuang metung, nğanang Miling, casigla tamo, abe tala ding familiang R., ding L., J. at saca y Hector. Agaganaca munô ita? Canita balamu ala cang camatayan, macapasuluca namang macanian: tulid me y Hector, acu marayu cung ditac quecayu, dapot macanian man ding matacu, gamat, asbuc, macapanucusula: ica lalon mucung maroc á mata, at nung macalapit cu queca, mecad penasaquit miucu, dapot nģeni... baquet mipacanian?

—Emu bubuclatan yang malambat nang matudtud á panamdan! Ing sugat á biclat na cacu, saguiua yamu: é me tatagquilan... mánģaplas ya!

—Nanu ing miliari?

—Macalunus! Ing puri cung ininģat manibat qņg samula, tininda na at pinlibac: memicudta yang salita, linalang yang historiāng calaraman á pemagsalita na caring cacalugura na, iniá pin nucu man ume picailian dacu qņg gulut, anti mong metung á babay-ng lamang.

—Ninu ing sinabi queca canian?

—Ing sinabi? É que sabian queca, macaguiung abalu mu iá iá ing cacaluguran taya naman.

—Ninu?

Y Lidia eya bubulad at dinundung ya.

—Ninu?—nģanang minulit Miling.

—Ali, eque sabian...!

—Ninu? nģana ning metung á sialang menibat qņg gugulutan da.

Misdan la canita: meliquid lang miagnan at aquilala re y Hector, á maputla't gagalgal queta siping da.

Canita miras ya ing tren qņg capupusana ning viaje.

XVI.

ING NAVAL QŃG CULIAT.

Anti mo ing sadia-sadia: sulû, músicas, bulaclac, sutlâ, gazas, encajes, buang, sayâ at cule, miagpang-agpang, mianib-anib qņg masayang Naval qņg Cu-

liat. Qñg balen da ding Angelo, ding Henson, Mesina at aliua pang cayanacanang mibubuat quea, mipapamisan ing angang cayapan, sintingan at camalan canitang cafiestana. Ing Culiat ning casipagan, canitang aldo ita, metung ya uaring sarung quintung nung nú mipamisan milulan ing libulibung quislap, salâ at cule, sintingan at camalan: caring dalanang u alapad, malinis at matulid, mamagus lutang-lutang ing maniningning á leguan at ing epasabing cayatinan.

Manibat qñg vispera, ding taung maniatang ela ditac, cacatnu la detang dalan caring taung puputac á memagsundu carin: babait lalaqui, dalaga,t, baintau, yang masayang cayanacan á balamu alang camatayan pasigla qñg nanumang catatagan, migparayo carin. Yang babayng filipinang comangui pisni á piurian qñg catimtimanan, qñg ganinang piñang pinintajan qñg miayaliuang cule purpurinas, macaslag ya,t, titindag caretang dalan, lalu't lalu na ngening tangarana ning aldo ing masaya nang ganing antime ing malino nang pacpac ning mariposa, ngening bayu yang miglupi at mibablas qñg gani nang terciopelong bulbulin at quiquinang.

Ding dalan, ding bale, detang palacios dang bubug ding comanguing hadas, milalab-lab la qñg sala: qñg misusumangid darandam cang músicas á mabubugtú caring tecladas ning metung á piano, ó caring cuerdas da ding libulibung arpas, guitarras at bandurrias ó caya caring mayumu at malambis á siualang orquestas á sasalubung da ding magfiesta caring taurang ampangan. Busal na niting músicas, mecabulad lunsut magpatilo ing siualang misnang catarling, mayumu at malambis ning metung á dalaga á lulual gagalgal quetang batal nang sisne, qñg ulining tacut nang mitalabu caretang taid-taid á notas ó maririne ya caya qñg maratna nang panla laue ning metung á baintaung magumasid quea. Ing sabla gagalo, maquibie ngan uari, ban tuquing musig canitang masiglang fiesta.

Qñg metung caretang bale, manictamu munaman, bilang tanang maquipagsayâ; ecuno paquilala queca-yu ding maquibale, uling caquilala yula naman nung tingiran yung mayap ing macatuqui.

Itang bale nung pagumasdan ya manibat qñg dalan, antimu naman ding queraclan carin; ala cang panibayuan qñg pangagaua na, dapot capanic muna quetang éranang malapad, ing biglang salubung caring panimanman mu, ing sampat na pamiraqueraque at paminayûn-nayûn ning panagaula na

Ing siduana malualas ya,t, masala, uling tatanggap yang sala caring atlu nang lupa, ngening macabuclat la detang auang nang quepisan; ing pasbul nang malualas, alâ yang catacaptacap nun émû itang tabing nang encajes á misnang casinsin at calino, antimo ing pipaglupiana ning ubingan. Nangan caili, carin ya macabili ing metung á piano qñg balitang fabrica nang Trinidad; caring apat nang asias á quilungan, carino man ding apat á cuadros ding palalung mangayap á pintores. Ing mumuna caretî, metung ya caring daque na ning biera di Romeo at Julieta: yapin ing pamiduangan da deting adua, iniang y Romeo macapabitin ya qñg metung á eran á sutlâ at y Julieta naman, macapasucub ya caring pago na, misasabi lang alimit; pamisabing é mapatadpatad angang cya gumaga ing alondrang pabalu qñg abac á magpataué qñg palulung matas á dutung nitang jardin.

Ing cadua, iniang caibat nanang siniclaud Isabel de Segura qñg lalaquing ena palsintan at ume neng lungub qñg silid ning talasaua: quetang pangatalacad na qñg pasbul at pangatalana caretang tabing nang brocados, acaquit mu itang pamicacunû nang lungub canitang silid á nung nune panayan ning asaua na. Itang cuadro metung histori nang malungcut, at yapin ing calamna na ning mabilug dang historia ding *Amantes de Teruel*.

Ing catlu, ing Offelia ning Hamlet, iniang mamu-

tung yang mirtos, careang sampagang tanda na ning palalung lusūc at mayubung sinta, ume yang pailu mud qñg metung á úlu. Macagulis mû quetang canuanang maputlá ing saquit ning pibabata na á mitaque quea qñg camatayan.

At ing capat, iniang y Desdémona, ing estatua nang mabie ning leguan, alayang camalit-malit qñg malapit nang camatayan, mipacaimbing yang matudtud qñg dase nang bulbul sisne. Itang babayng malsinta qñg dangalan, tepangan at cayapaning sa aua na: itang babayng maputi pa qñg garing á é micacunung minie qñg púsú na cauitang lalaquing matuling pa qñg bengi, magjingalu neng ena balu, uling qñg catumbana na, carin ya ing asaua na, itang palsintanang Oteló, itang lalaquing larauanang matuling ning pamangalalu, iniang ume naneng paslan caring gamat nang bacal, itang batal nang maquinis ning calulung Desdémona. Iting cuadro mitmu yang poesia, dapot qñg poesiang macatacut at macapangalig-quit, p'blasang gulut na nita, mararamdam mû ing gulisac na't ngulangul nitang babaing alang calma é pete na ning malugud, dapot maling pamangalalu.

Careting cuadros antimo ing mayayaquit, titindag ing cayapana't quealan calma ning babay, niang babayng bigû palad á capitna na ning quetauan. Careti namang cuadros mayayaquit ing mayap nang panlalaue ning maquibale, ing malambut, mamû nang pilubluban á macayungyung qñg poesiang malungcut.

Tulid da detang cuadros, at pacabili caring micasampat á masetas japonesas micalabung lang anahaw. Libutad na nitang siduan, metung yang lamparang gazolina á babie cule at salang majojin qñg sablang aslagana.

Ding aliuang tapuc ning bale, macayagpang lagang canitang siduan: mangalagû la panagaula at mayalaga ngang sutlá.

Ding silid nang mangalualas, penagaulan dala na

man qñg miayaliuang bague micasampat, lalu, t, la-
luna ing macatuctuc caring babay á nung nula pa-
casambulat ding micasamiung sampaga, pabanglung
masalingasang at inciensong maruruluc balang suluc.
Caniting silid, eca macaquit gaza ó sutlang penabing,
dapot uá, dicalang tanaman caring palalung mal at
malagad mung mayayaquit caring aliuang mulajan.
Nanupata, itang silid malati ya uaring paraiso á nung
nula manaliguat detang anac nang Eva.

Mag-á las siete ne ing bengi, bayu ra ilual ing
procesión, iniang manic tamu quetang bale; quetang
disnan tang macabuclat á piano, caibat-ibat napang
tinigtig Lidia, qñg cayaduanan da ding dalagang ma-
quibale cacalugurana at miayaliua pang atiu carin;
iniapin casungo ta qñg eran mararamdam pa ing buang
at ing tauli nang catni ning masican á pacpacan á
mamauad pilit qñg panga-ulit na ning musicang ti-
nigtigna; dapot daratang da ing procesión, mitan
ing buang, at detang taung pacapamisan carin, pe-
sisungo la caring auang, ba rang alben lumabas.

Itang Prosesión, macaba at masanting, susuluan
da ding epa bilang á taung migpanata at ding da-
cal careti ding caralangnan á miayaliua gani. Catu-
lid na ning Virgen quetang bale, silbaganan deng
sampaga, carean sampaguitas á sesesen dang manga-
queuan caring mangalinis dang mulajan ding dala-
gang capampangan.

Calabas na ning proseción, ing maquibale minag-
cat yang mapun: pesilucluc lang minuna diug babay
agpang qñg ugaling tutuntunan da queti capampangan,
a cainsamang pamangan, yuna ro ding babay. Miari
ing apunan qñg sinaguli at detang mangasayang
dalagas, migayac la lungub qñg Teatro á nung
nure ilague quetang benging ita, ing ||ALANG DIOS||

Y Lidia mibablas yang aliuang imalan: ing ver-
deng susulud na, inalilana qñg color rosa, qñg
rosang malagung malagû, antimo ing qñg cule nang
majinjin ning magnolia. Macanian mu naman ding

alhajas na, detang perlas á susulud na, caring dia-
mantes á maquislap.

Ing «Teatro Mesina,» mitmu ya caring taung me-
nalbe quetang benging ita: caring palcos at buta-
cas, sasalingalangal yang magalo cayanacan at ing
palalung masampat, malagû at mal, mamialungan
ngan carin, iniâ pin é macapagmulala qñg canitang
Teatro, titindag la ding miayaliuang batung mal at
micasampat.

Mamitna mitna ne ing acto primero ning drama,
iniang y Lidia at ding abe na, carin la dinatang:
melingougo qñg Teatro qñg buang á meramdang;
ding cabayangnan inanglo ro ding buntic da, at
ding caralangnan memanlarino man.

Y Lidia, mumuna ya caring abe na: linub ya
uaring antimong metung á princesa quetang cari-
nan á nung nure durucuan ding busabus na,t, ali-
pan. Tiglus na qñg palcong manaya carela, at li-
nucnuc ya patina ding abe na.

Y Lidia ya ing bulaclac na ning Teatro quetang
benging ita; quea ngan ing panlalaue, quea ngan
ing pamagmulalâ at quea ngan naman ing mula na,t,
sangcan ning anggang pisasabian. Ing buang at sitsi-
tan miraras angâ quea, dapot é bayu quea iti, at
sane ya caniti. Sadia nanang balu qñg cainsanu mang
fiesta, aguman abala ó catatagan, ya ing maguagui,
iniâ pin ena panibayuan itang acacquit na,t, da-
ramdaman. Maratna ya panlalaue qñg escenario, pa-
gumasdanâ ing pamiliuasliuas ning escena, buri neng
á balu sigalut ing obra, panenayaneng macalag á
butnul, baneng abalu capupusan.

Y Hector carin ya naman: qñg metung á suluc
at qñg metung á butaca ning caduang fila, carine-
man macalucluc; eya bubulad, macalaue ya naman
qñg escenario, dapot lalabas mu uaring anting asuc
itang albayana; aliua ya calinga.

Mecabulad y Lidia quinuano ding gemelos cang
Miling at sinilip no carin ding lupa nang manalbe.

Mita, ing panlalaue na qñg metung á butaca: qñg butacang luluculanang Hector. Magurung ene aquilala iti, uling canita macapatalindiquing ya quea, at maquisabi ya qñg metung á dalagang malagû mu naman á casiping nang lulucan.

Panaquit na canita, menimutla ya, guinalgal ya gamat quinarug ya salû at meculimlim ya iquit. Ing demonio ning pamangalalu lulupiganeng tunggal ditac itang caladuang malsinta!

Ing dalagang casalita nang Hectot, apagumasdana ing maratna nang panlalaue Lidia carela, iniâ ngana.

—Caquilalaye yang babayng malagû qñg palco número uno?

Meliquid ya y Hector canita, at iquit ne y Lidia tatangad no quea detang gamelos.

—Caquilalaque, dapot qñg macanian mung pamiquilala.

—Macapagmulala, ibat nandin pagumasda na nacayu, nuya tau?

—Qñg balen B., cabalen que.

—At saca ngayu qñg macanian mung pamiquilala?

Y Hector, eya bubulad, pisasalinane nitang bili nang quimó at miquealangan: mayap namu mebaldug ya itang telon at misepuan ya ing acto primero.

Cabaldug nana ning telon, pesitalacad la ding lalaqui, memanalapit la caring caquilalarang babay, pigayan dala.

Ing palco nang Lidia, quinatmû yang tau, caring pesipugue quea. Careti metung ya y Hector, dapot y Miling ya ing casabi na, ing babayng maluhat nang cacaluguran at casimpanan lijim.

--Paquisabian me, ngana niti quea—dimdamuna itang sinabi na qñg tren, caministilan ing micabalû cayu.

Canita ding Orquesta «Sabina» pigmulan de ing sinfonia ning acto segundo, at cayari na mebuclat ya ing telon.

Ding angang maquipagmananu cang Lidia sinubli lang mucluc caring luclucan da.

Melacuan ya y Hector, at semantalanane ing metung á sillang alang laman qñg palco nang Lidia, at linucluc ya siping na niti.

Ene siacasu, dapot y Hector ngana queca.

—Ing tabing ning lijim á muamu, macabuclat ne, buri mung pabatio lubus ing angang macasalicut pa? Ninu ing taung memicudtang amanu qñg icasira cu?

—Pag-amu-amû cung emu bubuclatan yan queti, nung emu buring uclan cu queca, ing mura cang dili caring lupa mung lalaqui.

È bala ing macanian, ebala ing uclan mu cacu ing mura cu at duajagui, dapot sabian me lagiû ing taung peniualan mu.

—Ali, alil!

—Nung macanian ..

—Sucat munang ajalata qñg queca at cacu, me-pupus na itang malagû nang taguimpan ning mamulang á capalsintan: mebuclat ne ing tabing ning catutuan at macayapag na caring panimanman ing mumulad á saquit na.

—Ecu balung pitalusen...

—Ing buri cung sabian, qñg ing sabla miari na quecata; aquilala muna cu at aquilalaranaca; ngacu uari qñg quecatang adua mebalag ne ing tabing ning camalian at ulina niti, aquilala tana calubasan yang ausan dang sinta.

Ing amanu nang Lidia, tungal ditac papatac qñg púsû nang Hector, at cacatmuaneng lasun.

È ya bubulad ditac man, uling ing lusuc á saquit, umil at tajimic.

Bistaman, quetang lupa nang maputla, miliuas-liuas linabas meaquit at mayayaquit ing daralan busal ning sâlû na.

—Isulung mu, isulung mu Lidia, emu cucuturan! Atin pang culang á emu sinabe?

—Ala na, nun é namû ing manibat ngeni, emucu paquisabian, uling manibat ngeni, uculan mung é cata miquilala at itang milabas tacpan ta qñg matuling nang bungbung ning pamangalinguan.

—Alana?

—Alana.

—Ngeni acu naman: paquiramdaman mucung mayap, uling iti yaná ing tauli nang amanu ning piálit mung tau.

Y Miling canita, tinalindiquing ya, canuari ena buring paquiramdaman itang pisasabian da, bista,t, lalu nong tiningid ding panamdaman.

—Qñg misanang bengi ning Mayo... qñg Teatro munamang anti iti... carin, qñg metung á balen á ecuna tunguen... miquilala cata. Macalucluca tulid cu, pagumasdan daca: ica èmu alabanan itang maratnâ cung pamagumasid queca, iniâ pa ga-cai durucû ca. Acu... balisa nácuman, ecu naman balû nung macananu cung macaquit dalan bacu sang aulat ing maluat cunang sisinup qñg lub cu. Qñg mà'icung taquitâqui, apajalata curin queca, dapot ica antimu mong è balû... balamu mo uari èmu asasaguiran á calaman ó apitaluse capapayulan... metung uaring talimjagâ itang sasabian cu... micunutcunut ca... ing panlalaue mu lipanglipang, antimo ing parati rang darapatan ding lupa mung babay ngening magdingdingalila at buri rang ilili ing nanumang pisasabian. Dapot acu, talus cuna ita, acaquit cu ngan angga ing macasalicut lalabas miliuasliuas quilub ning salu mu, uling yang lupa mu, éya biasang maglaram, éya biasang mamigawa at ing lupang èbiasang mamigawa, ya ing auang ning caladua á nung nù masisilip ing maliliari quilub ning sálû. Canitang panaun á ita, balamu ecapa milsinta ó emupa aquiquilala ing tutung sinta, macanian ing sinabi mu cacu, iniâ yapa uari ing capace mu qñg malagû nang paninap ning cacanan... È mu bà'û ing panamdaman mu, malungcut ca,t, matula, pablasang miagnan dururup

queca, ing lungcut ila ning tula at miagian mu namang lalasan ing yumu at capaitan. Iting aduang bague, ya ing micuculiutan mipapagal quilub ning púsû mung virgen, iniâ pin micunutcunut ca. Qñg capupusan ing angel ning capalsintan miguagui ya, linupig na ing capicacunuan mu at lidlad no queca ding malaguayanang pacpac, licuban dacat lilungan bacang matudtud maninap qñg paraisong nung nula tutubu ding rosas á alang sucsuc á yaina caring bitis mu. Mipalsinta cata ibat na canita, at ibat na naman canita ing malungcut at panat cung bie pepasampatan mu't pepayumuan... Agaganaca mu mô? Bengi mu naman canita, masala ya ing bulan... macalucluca lele ning auang at yang canuan mu macasucub ya't painaua qñg gamat mung uanan, mimisip ca... "Tatacut ca, ngamu, eca macasumpa, uling ing sumpa tutuparan at ing é atuparan é sucát isumpa"... Iti ya ing amanu mu, dapot caibat na nita, minatnâ ca, maquiquilalapa qñg lupa mu itang masakit á mipagal quilub ning salumu, at ngamu: "Itang buri mu *susumpa cu*." Alben mu atatandanan cu ngan angga ing micacalating bague misulat qñg bilunganing quecatang historin. Ngeni Lidia, aduan cu ing catuparana nitang pengacu mu, nitang simpa mu: ulitan cu queca itang sinabi mu á magcanng acalinguan muna: "Ing sumpa tutuparan at ing é atuparan é sucát isumpa"... Macanian?

— Bah! nganang mequibat Lidia. †

Caniting catayang sabi, aquilala na ngang Hector ing anggang macalaman canitang púsung saliu.

— Aquilala ra naca, emune tutuglungan itang catayang linual qñg asbuc mu: alil! alil!... E tutu Lidia qñg ing ubi gan á camamalu, qñg uauâ nang camandagan é binang mapanampalasan á anti mo ing babayng talipandas, lalam na nitang lagû na? Ing camamalu... apasa nacang bigla dapot ing babayng talipandas, catmuana pang capaitan ing bie mu, bayu naca patayan. † Baquet ing Dios, lelangan ne

ing malagung babay, nung uari't dalam ning leguana, carine isalicut ipampan ing púsû nang camandagan? Ica Lidia, biclat me caring bitis cu ing misnang calalam á sáug at ngeni iting sáug, agcatana cung masipit qñg calalamana... Yapin! dapot abe racang maba!düg carin!.. é maliaring dulung cung dili cu... macanian... nung nanung depatan mu, yanaman ing daptan cu, nung nanu ing pepayalduc mu, yanaman ing alducun mu... macanian, mirame cata qñg lasa't casaqitan, qñg mabayat á pamagdala qñg masaquit á bie, antimo ing pámiraque ta qñg sinanaquirap á tulang pepayamyam na ning sauil mung sinta! Ica, anti munaman acu, iguyud mu ing bie masaquit.. tumulu ca naman á luang anti mo ing pepatulu mu... macasulat na: nung nanu ing depatan mu, yanaman ing daptan da quecal!

— Dios col nganang mipagulisac Miling á maquiramdam alang milapsû ditac man quetang pisasabian da.

Qñg gulisac nang Miling, mipabaliquid la carela ding queraclan caring manalbe, mayap námû canita, miras na qñg pamisabi ra babo ring eran ding aduang bie na ning drama: y María Luz at y Enrique.

— Ali Miling, ali! eme pigaganacan.. uling... qñg capupusan, nanung depatana cacu? Decurac niámû ing púsû cu at iti alang ulaga nanu man qñg anti caniang babay.

Macapagmulalang micatagun: ing maliliari qñg esenario, anti mu naman ing qñg palco número uno. milulupang milulupa; y Enrique maguinaguit ya, y Hector anti mu naman. ¿Macaniána uari ing anggang historia na ning lusuc á pamipalsinta? Pamitabog in, pamipaguinaqitan at pamisumpanan... macanian mung macanian? Dapot paquiramdaman taya ing obra, uling iti atin yang ditac á uauangis qñg caretang adua.

Atine quetang escena-ng á nung nú y Enrique

maguinaquit yang tutulû luâ cang Maria Luz at iti naman, eya mingutngut sasabi canining:

—Patauad Enrique.—:

—Tutû!

Uling qñg canacung sâlû
carin macabusal camû,
aguiang casing ining púsû
qñg sucâl lub tine mitmû.

Queni, quening cabubuslan
nining sâlû cung manamdâm. .
buri ra capang caulan
matalic, matalic sanang
matalic, bacung mipaldan,
aguiang casing camandagan
ing mabilug mung cztauan.

Caniting cacu dapat mu
meco ing sabla canacu...
angga tirû nang inducu-rg
tapat á panialpantaya cu
qñg Dios na ning banua't yatu,
|| Alang Dios !! (*)

.....

.....

✓ Pamanamdâm nang Lidia caniti, mengaligquig ya,
at mipasucub niàmû qñg pasamano ning palco.

Quiquiac ya?

Calulung babay! ¿Nanung daralan qñg lub na cani-
tang horas? ¿Yana iti, ing sisi nang tauli ning babayng
salauayan? Ó ¿ya ing tauli rang tangis ding ma-
casalanánang Rembrandt?

Alben tamu.

XVII.

BENĠING MALUNGĠUT.

Maluat yang macasubsub: magurung eya miatnâ,

(*) Seria cung linicas queni iting mapilan verso, uling ding
epa mecaquit qñg drama at mecaramdâm mû ó mecabàsa
caring carteles qñg titulu na, balara lilingad de ing Dios
caniting obra ó é mapapaniualang atin Dios.

dapot cayatnâ na, qñg ena sasarian mipabaliquid ya siping na, qñg liclucanang Hector, dapot iti alanayu, enane iquit qñg sillang liclucana.

Tana! ngana cang Miling.

—É tanè pupusan ing drama? ngana niti.

—Ali tanè, maliliu cu... masaquit cu buntuc... at yang sâlâ panasakitacu...

Ding abe rang dalagang macalucluc qñg palcong siping da, panaquit dang mamacô la deti, migayac la naman, tiquian dong linual aguiang masaquit qñg lub da.

Y Lidia mumuna ya naman qñg panlual da, dapot ena mo anti itang panlub na; macapasucub ya qñg pagó nang cailing Miling, anti mo y Maria Stuardo qñg doncella na, caibat nang mebasa ning sentencia na.

Calual da qñg pasbul, detang dalagang cacalugura na't cayabe, miayòyayo lang cucutang nung mananu ya, dapot y Lidia, eya macapaquibat, aliua ya isipan qñg cucutang da.

Y Miling ya ing maquibat, dapot qñg paquibat á emu balung pitalusen á pajalata qñg mililiñgad á catutuan.

Pemiraplan dang sinaque caring macapanayang carruages at tiglus dang minuli.

Capanic da quetang bale, y Lidia linub yang agad qñg metung á silid, linucluc ya qñg metung á butaca carin... quiniac ya.

Itang luâ minagus caring pisinâ na, dapot ditac maog saingsing, pañgismaua mang saldac, eca macaramdam quea.

Ing maragul á sucual lub, tajimic; dapot gnanu ing tatañgis na?

¿Ya iti, ing cayapan da ding queraclan á palipî nang Eva, caibat dang menampalasan, tumañgis la?

Ing baybay metung yang bugtung: ing catauana macabalut mayap qñg maningning at malinang á ganing paparam na quea ning calaraman, iniâ pin eta ya balung pibaldugan.

Nung ing mayupayang Dios, ena lelañgan ing sinta, aquit taya calubasan ing baybay qñg lubus nang capañgitan: ing sinta ya ing babie leguan, cayapan at camalan quea, anti mo ing pincel ning metung á pintor, ya ing babie cule at bie quetang larauan á guinulis na qñg lapiz.

Ating sinrang ayaustang "sinta mù qñg pami isip:" caniting sinta, ing lalaqui mapaliari yang mayap at mapaliari yang butang. Ing malagnat nang pami-ucul manintun ang les queti sulip balu namang ala, pablasang ding manucnangan queti qñg carinan luâ, angeles lang alang pacpac; bistaman lalang yang dili na, at magdiuatâ ya qñg metung á larauan á ena iquit man, iniâ pin qñg á sinta nang babay, balana mecaquit yang metung, piblasanane qñg palalung masampat á gani, palaguaneng ipalalu caring sabla at palsinta naneng masapsap caibat na niti. Ena balû ó pagpilita nang cacalinguan, qñg, itang samsambanang larauan, anac na mù ning isip nang ma limbuyu. Caniti itang babayng palsinta na, mangaliluâ ne caring sabla, erane cauangis ding lupa nang babay: malagû yang dili na; caring labi na lalsut ing palalung masayang timan, antimo ing qñg rosang cabubulaclac, salingalogal na qñg asbuc na ing samîung epa mesangâo, at caring mata na quislap na ing palalung masalang sulû, bala uaring linaue nang bucû mibubulaclac... nanupata, qñg catayang sabi, metung yang angel.

Caniting paninap, aguia mang macaba, mipacde ya rin; tungal ditac milihulin ing ulap á tatacap caring mata na at canita nane aquilalang mayap ing babayng pilsinta na; at... nanung aquit na? Ing metung á babay-ng lubas qñg leguan, cayapan at camalan á pparaman namung pepasuluran canitang gani ning lipang-lipang nang pami-isip at pamalsinta.

Bistaman, ating aduang sinta: ing «sinta qñg pami-isip» á inulat tana at ing palaguiuan dang «sinta qñg caladua,» at iti ya ing lilung mal at marañgal.

Maralas mapapaliori qñg mipalapit tamu qñg metung á babay ng mecad eta man sicamuangan, uling lalat macaquit tang leguan quea, at itang dimut nang lagû èna cata ayayyag; dapot nung pagdatunan taya ing babay-ng iti at malumò tamu qñg panlalaue na, qñg gánaca na mayap nang pamaquiparang tau á pasilip qñg macasalicut nang caladua, ditacditac ing caldua tamu, mayayaga neman qñg babay-ng iti, uling ing cajiñjinana, yumu at capanibulusan, yagcat na cata quea; aquit taneng malagû, dapot qñg lagû nang alang casamutsamut ning caladuang malinis, qñg leguanang timtiman at majalan ning babay-ng mayap. Canita tane apalsintan, dapot qñg sintang uagas at mapuri, qñg «sinta qñg caladua.»

Y Hector, pilsintane y Liddia caniting aduang sinta: qñg «sinta qñg pami-isip» at qñg «sinta qñg caladua;» iniá pin aguiang nananeng bugtuan qñg púsû itang larauana, ene buring lacuan.

É bala ing sinugat ne, é bala ing tunggal ditac papatacananeng lasun itang púsû nang ingatan, palsintan niarin; atin pa: nung capilane tatampalasanan, carine lalung apapalsintan. Macananung é macanian, nung daralane bengit aldo quilub ning púsû ing larauanang é bisang mabugtû quea? Calulung Hector! Mengari ya qñg cambubulag, pipilitanang susungaban ing lablab á macamate quea.

Y Liddia, malsintaya naman at carainpatan sabian tamung qñg yaman mibabata ya, yaman maquipagcal ya at yaman macalugmuc ya qñg macatacut á lasa't capicacunuan.

Pepabanua nang mawewe ing pamaquipagcal na caniting malumbe capicacunuan, manibat na canitang tingap ne ing sulat nang F. D., á abasa tana qñg dangca nang XIV, niting historia.

Baquet eya mine qñg agcat na quea nitang sulat, banang abalu ing catutuan?

«Nung buri mung abalu ing catutuana niti, ume ca queta cang Miling» ngana qñg misan á aldo casabi

neng Lidia y F. D., at mapilan mung aldo canita, peparala nepin quea itang sulat.

Y Lidia, eya mine carin, uling ngana qñg, eya sucat paibabâ qñg anti quetang panugali.

Ing capurian ipalalû na qñg sabla, uling ngana, ing capuriana ning metung á babay, ya ing maulaga nang bandi. Macayaliua ya caring lupa nang babay: ding aliua careti, binâ lang masulisitâ, at èbala ing calibacan, abalu rásâ itang buri rang paquibaluan. Macanian man timpuane y Hector at sininup nang pecasinup quilub ning sâlû itang miliari.

Iquit tana ing mengapaliari qñg uli na niti: ditac-ditac picacandayuanala ning era pamicabalu at nun emu ing micatagun á miliari qñg tren, ena sâ abalung Hector ing mulana't sangcan ning tatampu na queang Lidia.

Dapot cang Hector, metung mung dingdingali iti, quea metung mung paralan, banang abauyng Lidia ing macasanla nang amanu quea. Itang capañiran puring misasangcan quea susugatane catasan, uling iti ena penugalian capilan man, ena depatan caninuman, eman dinalan qñg lub na.

Uli na niti, aliua ya uculan: malilili ya qñg tutû nang sangcan at ngana qñg ing maquilaguiû caretang aduang letrang F. D, eya maliaring caquilala mung macanian, eya maliaring matalic mung cacaluguran, ating macasalicut lalam na nita at malabis pa caniti.

Y Lidia, nung macanian pigtacsilane, dapot qñg palalung matuling á catacsilan, qñg catacsilan á alang laguiû.

Macanian man buri nepang ácasabi, buri nang damdaman quea ing lubus á catutuan, é bala ing mapait, é bala ing masaquit, ita musang tutû, iniâpin ibat na canita, ene tinucnang menintun sangcan balang macapisabing Lidia Iquit tana ing querasana niti, iquit tana ing panugaling pepatangal na quea ning palsintana: panginlaganeng pilit at ngening enana acuang ma-

nginlag, paquibatane catá-catayâ mung amanu, dapot maragul á cabaldugan at mitmung calibacan.

Macanian la bili deti, angga qñg miliaring ibat tang selita.

Quetang silid á nung nuya linub y Lidia, alá nang imic, uling detang cacaluguranang dalaga, balara pin masauquit ya, ere buring lingasngasan.

—Miling! ngana niti panaquit na quea, mequeni luc-luca siping cu, isalita mu cacu ing historia na ning masayâ mung bie: ala cang lalacton nanuman, ecu mipatutud. . ating metung á anino matuling, matuling yang matuling. ., bubuclat no ding mata cu! Queca epa miliari ite?

—¡Calulung Lidia!

—Tutû! Ing caralangnan cu malungcut at maputlâ, bistaman ding sabla pangadirian da at ngara: ¡Nanu pang sucat pang panintunan qñg acalmana queti qñg yatu? Yapin ing tutû: manáuâ la bie ding pengari cu, calangalangnan do't pacamalan ding cabalen tamu, nucu man ume daramdam cing puri at parangalan dacu; caring bitis cu paralpac do't yain ding palalung malagû at micasamiung sampaga; caring salones á palalung marangal pagmulalan da ing leguan cu; pagpalimusan da ing laue, ing sabla mamintu ngan qñg ditacung násâ at qñg ditacung aniû mibabalisuag ngan ing sabla; dapot .. iting babay, iting reyna ning leguan at cayanacan, nung buclatan me sálû, aquit me ing sugat á nanacnac, darayâ at alang patugut sisirâ qñg mabilug nang catauan. Tutû Miling! Meninap cu qñg metung á paraisong masayâ at maligayang mitmung sampaga at bungang mayumu, dapot alben mu, ding aguisingan cu carin, ubingan lang camandagan at ecu mecatuclas metung mumang bungang alang lasun! Qñg capupusan ing historia na ning bie cu, adua mû eatayâ ing calamnana: *sinta* at *camandag*!

Caibat nang sinabi iti, quinaul ne y Miling, iti man quinaul neng matalic á matalic at ilang adua ela mingutngut qñg tangis da.

XVIII.

ING LIJIM. Á SANGCAN

Sinlag ya ing aldo cabucasan: at macaniánong disan detang aduang babayng micaluguran, micacaulámû.

Qñg tutung pamicaluguran carin tamu mû aquit ing tapat á lugud, at, caring tacde na ning tapat á caluguran, carin tamu mû naman apaniuala ing nanu mang mabayat á miraras quecatamu, pablasang caniti macaquit tang casngauan at capaldan qñg mangayumu nang usuc.

Itang aldo sinlag, maputla yang bina, malambis ya't matamle, balamu ing dalagang salunan, malungcut ya panlalaue.

Ing Culiat, caibat na nitang pepatingapun at quebucas á uacas ning fiesta na, metamle ya naman; dacalámû ding pacasarang auang bistaman matas ne ing aldo, uling ding queraclan caring maquibale at caring mequipag-fiesta, matudtud la mû, puyat la: mepuyat la qñg teracan ó qñg Teatro at miayaliua pang panalben carin.

Ding dactal caring dalan, ding lalaquing mipagdalang manuc, deang é pabilang á manaluqui qñg vicio, maranun dong lulub qñg sabungan ding manuc dang sesesayan ipalalu pa caring anac da, balang mipainaua at misane qñg inge ra at culió detang puputac á taung pacatipun carin.

Insá mang balen niting calulung Filipinas, maragul yaman ó malatí, bistat alá yamang escuela, maquisabungan ya, at iti piucyucan deng tau ngening detang memaleng carin, pagcasusian da ing aldo na ning patulunan ó pintacasi nitang balen.

Caniting malating camalig, asabi tamung macatipun la ngan ding miayaliua cañuan á tau: ing masalaping pa-galo qñg gabun, òya manianing maqui-samû, qñg casamac nang cacapat daque: ing.

biasa caretang musmus, at ing mayacayan careta namang «jugadores de oficio» ó mabibie talaga qñg sugal. ¿Galang qñg infierno na ning vicio mipantepante la naman ding tau, antimó qñg infiernong piparusan?

Dapot paburen tana iti, ing Gobierno paintulutana, libe ding aduang dalan á pesos á babayad da balang banua: paburen talapin, alá ta mumuring acarapat, éta macasalangsang qñg masalusû nang agus ning vicio, pota mangari ta namû qñg «LIGA DEL PROGRESO MORAL» á dela na't pepalbug.

Tuquian tala mayapa ding caquilala tang sadia á minuli na qñg balen B.

Caibat na ning sigla, ing marajil mamalili ing lungcut; at caretang mequipagfiesta qñg Culiati, alá nang macatagan nun ena mû ing malale nang buang ning malambis á música at ing bacas nang malalangî na ning dingutan dang fiesta.

Cauli nang Lidia queta carela, inagad yang sinulat, at caibat na nita, inaus ne ing metung dang ipus, at ngana:

—Ini, quetang nung núya mangamanu ing sobre.

Pemiraplaneng dela ning ipus at lalat milabas ing pilan mung minuto, atiyu qñg arap na ing silatanana.

Metung yang lalaquing payat at matas, macaba ya americana, lasa mamangga ne babo nang tûd. Caniang bayung modang mangapalalu á quetang minuna ding macanian á pami-imalan ausan dong sacristan, dacala ding tinuqui, dapot éta pagmulalan, uling yang mamulang á «moda» macanian ing yusuc na.

Qñg taung inapag cu quecayu, bistat é babague quea ing macabang imalan, tinuqui ya qñg moda, uling ngana macanian ing sucut.

Magaspang ya puñgimut at bistaman masanting ya pami-imalan, balamu quimó ya quetang susulud na. Balita qñg megaral ya, dapot qñg pamagaral na canu, alá yang depatan nun ému ing miñirang salapi.

Iti y F. D.

—Nanu ing buri mu? ngana niti cabud pami-iquit dang Lidia.

—Dacal; dapot lucluca bayu ing sabla.

Linucluc ya iti qñg metung á sillang tulid ning luluclucanang Lidia, at ngana:

—Cumusta ing fiesta qñg Culiat?

—Mayap, masigla, antimo ing sadia, dapot baquet éca mequi-pagfiesta?

—Dacal cung tutú darapatan.

—Icami, nganang Lidia-manibat pa qñg vispera carina cami: masigla ing fiesta, masiglang é palac qñg mengalabasan, bistat acu anti cu mong é mequipagfiesta, pablasang ing marauacung calma, tutuquina nacu nucu man carin.

—Baquet?

—Ing micatagun, pisaque naqueng Hector qñg tren: qñg ecu uaganuagan man queta ya gugulutan mi, maquiramdam qñg pisasabian ming Miling; dimdam nangan ing pisabi mi inguil qñg sinabi mung depatanang capangiran puri cacu.

—Ngana paya' nganang cacarug á sàlung F. D.

—Cucutang neng pilit ing sinabi cacu, paquiduang ne laguiû, bane canung bugtuan á dila, dapot ing tren miras ne canita qñg estación na qñg Culiat at quinuldas cung agad, bacung é mapilit maniabi qñg tutû.

—Sinabi mucu?

—Ali raca; pigaganacan cu ing misungalit cayu at, á magcang qñg pamisungalit yu, lunto cu laguiû; dapot sabian mu: tutû ing anggang sinabi mu cacu inguil cang Hector?

—Tutû!

—Ngamu qñg paquitanan mucung masala caniti, nucarin?

Ene pequibatan F. D., dapot quinuâ no qñg bulsa na ding mapilan surat, at ngana:

—Dening surat quecala?

Linaue nong Lidia at mipagulisac ya iniang aquilala na ing letra na caretang sulat.

—Ua, ngana, cacu yan, dapot quenu mo quinuâ at ninung minie queca carean?

—Qñg metung á babayng dininanang Hector..... qñg metung mu namang palsintanang anti ica.

Pecatimidtimid na iting amanu, canita detang suc suc nñng mañgalaí, tumiric lang mayap qñg púsû nang Lidia.

Y Lidia, éya mipabulad, tajimic ya asque, dapot maralumdom ya lupa. Ing panaun, ngening maibug maguiû magtajimic pámu: macanian ing catajimicang Lidia.

—Buri mung basan co dening sulat?

—Ali, ali mula! baluco calamnan, ena camin'stilan.

Y F. D. pagumasdane: macatiman ya, dapot qñg timan á antimo ing cang Satan, iniang á patanggap ne cang Eva, ing bungang bawal.

Malambat yang macarucung misip-isip, pibulebulyanang manene ing yablas nang mapait cang Hector, mapait pasâ quetang yayamyamanang salucuyan.

—Ala na cang aliuang burê? ngana nitang tampalasan á tau, canitang eya bubulad y Lidia.

—Ala na, salamat!

—Ime nacu nung macanian.

—Capa, deang sulat lacuan mula, caministilan ing mitagan la cacu, uling ilang caustan qñg catac-silana.

—Binie no ding sulat at tiglus nang tinipa, bitasa nana murin qñg itang tenam nang punla, tumubu ya't lumabung, ena ne pigaganacan

Detang sulat peparala nong Lidia cang Hector quetapang magaral ya Menila iti; mitmû lang poesias, qñg poesia nang maninap ning labi nang limang banua Atinang aduang banua ibat na canita macanian pin, dapot macananu lang miras cang F. D. detang sulat?

Alang casaquit sáquit: miabe la balé Hector iniang

magaralapa Menila, carin queta qñg calle Legaspi, ila mo ding micaluguran matalic, pablasang mibabalen la.

Qñg misan á y aldo, acalimbatauanong Hector de tang sulat babo ning metung á pupitrenng pisusulata na, iquit no niti, burinalásang basan, dapot caibat nong binasa, linub ya pamangaririá, uling maquilub ya naman cang Lidia, cang Lidiang nung quenu la masisira, emu ding cabayangnan quetang balen da, nun épa ding caring aliuang balen.

Sininup no ding sulat qñg ena balung sangcan at pepaburianang milabas ing papaun.

Y Hector, penintuno deti: maluut nong panintunan, dapot eno iquit, balú tana ing querasan da. Canitapa memilublubane cang F. D. qñg tutungayanang cacaluguran, uling yámù ing cacalag qñg simpanana.

Qñg misan á «vacación» minulila quetang balen da: carina lalung aquilalang Hector qñg y F. D., eya tapat á cacaluguran, at iti, uli na ning biniag ning metung nang pangunacan á nung nula mitipun tipun ding cayanacan ning balen da; bucud namung Hector ing ena inaniajan canita, bistat miabe la lasa aldo't bengi.

Caniting biniag tinugun ya naman y Lidia dapot, malungcut yang bina, uling alayu carin y Hector.

Cayari na ning apunan quetang benging ita, agpang qñg pamamaguera ding mangayap á orquesta, pesiterac la detang cayanacan, bucud namung Lidia ing è bisang tinerac, at migluclucan ya qñg metung á suluc.

Apagumasdanang F. D. ing bili nang magsasarili, lepitane, semantalanang alang daramdam, pinianbianane.

Y Lidia macapatiman yang maquiramdam quea, balana bibirú yámù, dapot nuya anti pamagmulala, iniang aquilala nang qñg itang bague, aguiang mipàralan qñg birú tututujanana nitang casabina? iniâpin ngana:

—Balacu cacalugurana cang Hector!

Caring aliuang lalaqui, nung carela ra sinabi iti, manimutlâ la't mangan-umil qñg masaquit nang calamnan niting amanu, dapot y F. D., sadia yang daramdam macanian, sadia reng ipapacarine, iniâ é bayu quea iti.

—Y Hector, ngana—eya datang ngeni, eme panayan.

—Baquet?

—Alayu.

—Nuya carin?

—Tabalu, mecad atin yang aliuang lilingapan.

—Mecad pin, nganang Lidia, usigane quetang buri nang painturuan, banang mitucnang itang pisasabian, dapot y F. D., uling bitasa na qñg itang amanu na, tataglus qñg púsû, nganang tinuglung:

—Y Hector, metung ya caring ditac á lalaquing dayauan. Eme panayan ngening benging iti, é marayung piniguilne ning metung á mamung panlalaue.

—Ecu maniuala canian, nganang mequibat gagalgal á siualang Lidia.

—Nung paquitanan dacang caustan?...

—Salamat: qñg calaraman é caministilan ing caustan.

—O nung lapo na niti, ipaquit cu queca ing casiran mung puri?

—Ecu naman mapiuala, uling qñg puri cung malino alang macalabug á dilang matilus.

—Icang bala, ngana, inagnananang tinicdo.

Aguiang qñg pamigaua nang Lidia, balamu ena panandaman itang malililiari, tunggal ditac, itang púsû na sasanggap yang camandag

—Emu acu ing maquibalu caniti, nganang sinabing F. D. docal nala, uling tininda naca puri.

—Ica, nanu mo ing nasa mu ngening sabian mu cacuyan? Paingulutan tana iti, ala caring masabal nanuman.

—Nung buri abalu ing catutuana, ume ca queta cang Miling; nganang sinabing malale dapot matimid F. D. at sacane licuan.

Ing tictuc damang ubingan eya manasaquit anti mo ing pangapanasaquit nang Lidia Bistaman, éya maniualla, éna paniualan ing daptanang Hector ing macanian.

Ngeni detang sulat á pepaquit na titilmid da ing catutuan, milaco ya capicacunuan at silpantayanana ing camusmusana panugali ning lalaquing pecapilina.

Itang lugud napang macatagan, bigtù na ning catutuan, picasamanane at pilcaran. Nung macananu ing lugud na quea, macanian naman ing samâ na ngeni: enane buri mang aquit.

Caniting pamipagcamuâ, minaua pati camaganac dang mingatba, uling y F. D, semantanana iti, ume ya carin, ume ya queta, bayang mitanam succuc qñg misusumangid.

Meragul ing sigalut: qñg mabilug á balen B., ena macalingad iting bague; ding camaganac dang mingatba deting alang calma, mipanumisla, bistaman ding talagang maquimasaquit caniti, éla bubulad,

Y Lidia manibat canita, lalu naneng penginlagan y Hector, at iti naman paniualanana qñg y Lidia marayû ne lub quea.

Bistaman alayapang balu qñg catacsilanang F. D. penginlagane, mebayat ya daya quea, aguiang iti parati neng yapa.

Macanian man y Hector, panintunanarin ing macapiduangan lang Lidia, baneng tulicsan mapilit ing taung maquipasari queting angang alinlangan.

Uli niti, sinulat ya mecapipilan, dapot metung man caretang sulat, alang mengaintulid paquibat.

Iti maliliari qñg metung caring mumunanang aldo ning cadua nang capitnâ ning bulan ning Junio.

Qñg misan á abac asalubunganeng Hector qñg metung á dalan y F. D, at ngana niting mipnung cayaga cabud panaquit na quea.

—Pilan danacang aldo é acaquit, nuca migcutcut?

—Ecu meco queti quecatamu, dapot pagpilitan cu ing é titipa, nganang Hector.

—Baquet? Ah! balu cuna, uli na ning sigalut mu cang Lidia.

—Ninung sinabi queca canian?

—Ing mabilug á balen, uling ing mabilug á balen, balu nana.

—Tutû!

—Dapot baquet eme paquisabian? aduananan meng masala caniting panugali na, bacong é macanian. Panaun potang gatpanapun maquipagnovena ya.

Ene pequibatan Hector caniti, dapot pamicauanira, misip isip ya. at ing usuc na quea ning sauil á caluguran, bubuang mù caring panamdang na.

—Paquisabian quepin, ngana—tela iti ya ing carampatan.

XIX.

ING HISTORIA NING METUNG Á ÚMÂ.

Megatpanapun: ding campanas ning pisamban B, ausan do ding taung maquipagnovena qñg Sagra-dong púsû nang Jesús.

Iting novena, piucyucan da, uling dacala ding macayagum á dalaga caniting catatagan

Canitang horas, salucuyan dang maniatang ding maquipagnovena: bulusbulus lang daratang, luluno ding babay á paca-calmin púsû

Qñg patio, at lelera ding miingatba nang pasbul ning pisamban, dactalang pacayabat á lalaqui at ding queraclan careti. ela maquipagnovena, abatan dalamû detang camata ra

Y Hector macapatalacad yanaman qñg patio, lalam ning metung á malabung á acacia.

Meinip neng macatalacad, dapot ing panayana, eya daratang.

Daralas dano tigtig ding campanas, pagmulan dana ing novena, iniang abatiauane y Lidiang macapalibutad caretang abe nang painturu qñg pisamban.

Pamanaquit na quea quinarug ya sâlâ, at me-nimutlâ ya.

Milalapit la, milalapit la deti, y Lidia⁶ ya ing magdala qñg salita, misnâ yang casaya, dapot asu-liapane y Hector, dalam ning acacia, mengaligquig ya mabilug á catauan at linisiâ ya qñg dalan.

Tinuru la casumangid pasbul, carin lasâ lungub, iquit nang Hector iti, lepitanala, at ngana cang Lidia.

—Lidia buri racang acasabi, adua mû cataya..... adua mû cataya...

Y Lidia, linaue neng mipnung calibacan, dapot éya mequibat at sinulung na ing lacad na.

Y Hector lalu neng meputlâ, mecoya malutû qñg labi, meralumdum ya iquit, miglipanglipang ya.

Ing libu ibung pami-isip, malutû at darayâ qñg sinanaquirap linabas quetang canuanang masaspac. Ing matuling á ulap ticpano ding mata na, bubulagane ning dine

Timpane ing canuana bayang mi bauy, bayang misublian lub, dapot alâ raurin, maralumdum yamû acaquit.

Busal na nitang dalumdum iquit nang marayû ne y Lidia at bistat marayû yaman lalauaniamung maroc á mata.

Canita .. bulag, mamulang, tapatapisung, tiquiane, tegal ne, at calapit na quea, bigla neng telanan á tacde, sicmal neng matalic, at ngana:

— ¡Quesumpan!

Catayâ yamung amahu ing asabi na, dapot mababatnal ya qñg acmulana, sasacalane batal ning su-cal á lub.

Ding macarungut caniti, mepipi la, ela macapaniâbi, mengaumum la't mengatilihan canitang acaquit da.

Milabas ing metung á segundo, metung mung segundong sinanaquirap: y Hector inatit na ing catauana, anti mo ing angel á mamali, at ngana:

—Nung ing metung quecayu, milsinta ne qñg metung á babay... at ing babayng iti... ing yablas na... ing palalung maragul á catampalasanan at ing sari tuling á casuquiban... nuanu ing daptan yu?

Metung man alang mecapaquibat: lalaquit babay mengapipi lañgan.

—Paten ya! nğanang tinuglung Hector at tinas ne ing gamat nang uanan.

—Ali! ali! nğarang gugulisac ding babay.

—Ali! tutû... alipin! Eque paten! uling ining tam-palasan, macanian man... palsintan quiamû!

Canita siniro caring matana ing adua capatac á lua at ing metung á umang mipnung capalsintan, petac na caring pisni nang Lidia, itang luang me-balag.

Ya ing capatawaran qñg calibacan at pamangali-nguan qñg caibat ibat pang miliari.

Caibatna nita binili ne, dapot cabili nang Lidia mipayungpayung niámû qñg silû nang Miling, meualâ ya lub.

Iquit nang Hector iti, misubli ya lugud... lepitane't sapupuna nesa, dapot canita, yanaman ing pami-bauy nang Lidia at qñg baguiang quimutna niti, inauat ne y Hector quetang nasà na.

Y Hector, canitang iquit na, aquilala na ing du-ngis ning depatana at meco yang marapal, tutucu-pano ding balimbinganang matatdas

Qñg sinanaquirap micalat itang mepaliari, antimo ing quinalat ning electricidad, iniapin canitang gat-panapun, alâ lang aliuang pisasabian carin dalan at caring bale, nune itang merapat. Ya ing pingan á macayapag nung nula mamulutan detang alang obra at alang diriquilan balè ra.

Ing familia nang Lidia, metung ya caring mara-gul at mayacayan quetang balen, at qñg camatu-tuanan sucac picanlapan at pinganiban ing muâ na niti.

Lalu nang meparas itang pamipagcamuâ, lalu nang mepait ing susulapo sabi at iti tutucnang nğan qñg casiran dang puri ding misusungalit á familia.

Ing Presidente qñg balen, mequitalamitam ya na-

man, mitangcâ yang expediente á nung nune inatulan y Hector qñg casalanan á yausan dang *inmoralidad pública*.

Iting sabla, miraras ngan cang Hector, daralana nitang Judas á cacalugurana.

Iti, qñg misan á gatpanapun, pequiquitane y Hector at ñgana:

— Saya naca cuyug, ibat cu queta cang Lidia, panabilinaca, buri nacang acasabi.

Caibat na ning mepaliare? nganang quinutang Hector.

—Ua, uling caniting baguc, alang aliuang sucut, nune ing mipanlarin cayu. Balumuna mecad ing buri cung sabian.

Itang pusung mámû at malsinta; ena uagan uagan man ing umangan deng silu ding adua nang pepacamal: ing sinta na't cacaluguran.

Mibablas yang agad, at tinuqui ya qñg sial á cacaluguran.

Miras la quetang bale á nung nune panayan ning casuquiban: tingap no ning indâ nang Lidia queta pa qñg eran, at inaniajanong malaus angga qñg siduan.

Pamanaquit nang Hector caniting balana mayap á panagap, ngana cang inda nang Lidia.

—Migculang cupu, dapot paquisabi cung paquiramdaman yucu saguli, bayu yucu atulan.

—Ali, ali, ngana niti, dinatang ca, buri meng acasabi y Lidia, ngeni ausanque.

At linual ya qñg siduan, dapot agad yang mibalic cayabe nane ing metung nang bapa.

Panaquit na niti cang Hector, ngana quea.

—Nanu ing buri mu queti? Maco ca nun ali..!

At leuc na ing amanu qñg dapat, timpalasanane y Hector.

Y Hector minatnâ yang anti mo ing meralpac á ubingan, mablas yasa, dapot quinauat deng agad.

Tinipa ya quetang bale, mapupuput ya púsû, ma-

mamangcup ya sálû qñg sucál á lub, é qñg pangatam•
palasana, nune qñg catacsilaning palsintana.

Iting catacsilan milacuan bacas á darayà qñg púsû
nang Hector, iniapin balamu jibang ya, balamu sirà
yang misasabing dili na. Ua, uling qñg púsû na nitang
calulu, milulutlutan mù ing samá ila ning lugud, ena
pa balu nung insanu ing magbili caniti.

—Mengalanat ngan ing malagû cung paintungul,
ngana,—dapot... capilana sinabi cacu ing misabi queng
lijim? Ecu balu...! Mecad banua... ua banua na!

Ing metung a pami isip á maroc, linabas yang anti-
mong quildap quetang canuana, sinaguli yamû, dapot
balang licuana duluc!

—Tutû queng palsintan... caministilan ing puputan
cu ing sabla .. ua... ing sabla qñg uli na!

XX.

BANGUNGUT.

Milabaš ing pilan aldo: pilan mung aldo...

Bengi: itang cabengian matuling yang tutû at sari ya
calungcut.

Ing banua, matuling ya naman at ing ilang da-
ralung at ngungulangul!

Nangan carin... quetang malaut baguià, ing gâgâ
nang malungcut at inacapangablâd ning metung á
culayu á magpataue qñg tungatungna ning palalung
mataš á cuayan.

Sisiuc ing caqueuan, ing angin sasaingsing at ma-
ngutcut caring butul ing marinla nang tiup.

Qñg metung á silid á susuluana ning matamle
sulû, mararamdam ing malamang nang pangisnang
saldac ning metung. á babay...

Itang babay, eya mipatutud, bibimbingane pami-
ucul ning ena balung piramdaman á lumbe.

Biling biling ya qñg pagquerana, balamu duruluca
ne catauan ning malambut nang sale.

Aguiang nananong ipiac ding mata na, magculu-

but ya man quetang maputi nang ulas, eya bisang matdâ qñg panlalaue na ing metung á bangque macaburul queta catumbanana.

Itang bangque, balamu matudtud yamù, balamu éya pa mete, bistat matuling ya mabilug á catauan, antimo uari ing mete biglang saquit á é metiníc á daya qñg pangasalunana.

Ene buring lon itang bangque, mangaligquig ya qñg darungutana, dapot aguiang macapiac ya, acaquit niarin, éya bisang matdâ qñg panlalane na.

¡Nunane iquit itang bangque, iniang maquibie yapa? Enana balù, éna atatandanan, dapot balune, caquilala ne, éna mù balu nung nula miqit.

Metiglig ing la una .. las dos... las tres... ¡E yapa mipatudtud. Itang canuana, balamu mababalag ya... malibub, ya mabilug á catauan, éna acuang mibili... bilingbiling ya.

Itang sulù, menalansic ya, caibat na nita, tinicum nang lalu itang mapunge nang sala, at mitdâ ing lablab na.

Meralumdum lalu, lalung meguing pisac quetang misnang lungcut á silid.

Itang bangque balamu minatnâ ya at caibatna nita, pemalisuag na uari itang matuling nang saput.

Itang calulung babay, pagumasdanangan iti, macapiac yaman acaquit na ing maliliari.

Mecabulad itang bangque, tinicdo ya quetang pangaburul na, linacad yang macacalale, biclat ne ing auang at linual ya carin.

Iquit neng linimpad ing matuling nang anino, sinulapò at guinulis quetang pisac; òarayù yang tunggal ditac at tunggal ditac, matatdâ neman.

Itang babay bisa yang gulisac, bisa yang papiglo, ansane indu na, ing metung á laguiung palsinta na, dapot itang siuala na, alang catni, alang buang: éna acuang lual qñg asbuc na, mababatnal na quilub napa ning salu na, iniapin quetang pamigulisac na, quetang saingsing na, alang mararamdam nune mù

ing amius na ning metung á malulumud.

Ing maliliari quetang babay, mecad misnang casaquit; guiliu't ne't belabag ing ulas á cuculubutana, pinilit nang tinicdo at tualtual, lipang-lipang, lepitane ing sulù, sinindianeng pepasibayu.

Quetang sàlà na ning sulù, aquilala taya itang babay: ya y Lidia, ing sadia tang caquilala, dapot capait na mecad quea nitang horas á milabas, baquet macaniane caputlà?

Itang lupa na misnà yang catamle, manimusio ya asque, balamu ing maluhat nang salunan.

Macasalbag ya buac at qñg imalanang maputi laluyang puputlà, balamu capatac mang dayà alana quetang lupa na.

—Nanu iti Dios co! Macaguising cu, enacu man maninap, balucu ngan ing mepaliari.. Ua itang bangque, queta ya catumbanan cu, quean ya, quean qñg tulid ning altar! Metung yang bangque matuling, matuling yang matuling pa qñg bengi..!

Caibat nang sinabi iti, miglinguslingus ya at ngana:

—Minatnà ya... iniang cai.. biclat ne ing aayang sinulapo ya... sinulapo ya't panga cai... mitdà ya..! Ining sulù epa mimin á larù. ¿baquet mig undap-undap ya't mitdà? Tutù qñg ing uagang macanian, mipapaltutù at magdalang caligaligan? Dapot ali! E maliari, bunga namù ning malibub cung pamigunamgunam. Ining sulù... buri cu masala ya, buri cu micalab-cab ya: dapot baquet é bisang sunlag á lablab?

Canita mepactung ing á las cuatro.

—Las cuatro! Ecu pa mipatutud, sinaguli mù ing bengi... Capait á bengel Caralum dum na! Ay!... Baquet ecu migulisac...? Hector..! Hector...! Inang...! nuco carin? Dios co! balamu maninap cu... ditac a sala qñg malimputan cung pami-isip!

Ngana, at sacaya biglang linucluc qñg metung á butaca, ticpane ing lupana caring palad na.

Meluhat yang ditac canitang pangabili na, balamu ing mimisip qñg ena abut uclan á bague.

Iniang cai tinicdo ya, at ngana:

—Ua basan cu, buri na basan cu ngan angga qñ capupusan... Nanu ing maroc na nita? Yana canu in tauli nang paquisabing mayap cacu... ya ing adic na...! Nuya ume? Dapot nucu abili? Nucarin? (ngan cabang lilibutane ing silid, manintun balisa qñ metung á sobre)—Ah! ua, queni lalam cung uluna nandin bayucu magquera carin cu petanan... Nucar Ah! oini!

Metung yang sobre ing quinuâ na lalam ulunan biclat neng malagua at siniro ya ing metung á *Libre de memorias*.

Cabuclat na niti ing minunang miapag caring pa nimanmana, ing laguiû na, ing laguiû nang macasulat caring mangaragul á letras.

Guinuyud ne ing butacang liclucana siping ning sulû, at binasa na ing macatuqui

Mabe tang masa quea, batayang abalu calamnan.

SANG LIDIA

Nung alâ nacu.

*
* *

*
* *
*Caministilan sabian cu quecang palsintan daca...
sabian cu ing sasamban daca qñg catajîmican ...! Dacal
cu pibâbatata, dacal cu quiquiacan,, ecuna aguiû ing
mibata pa, iuiâ pin ausanda, mamaus cu qñg laguiû
ning pamipalsinta ta.*

* * *

*Bari cung abulumu qñg malhat nacung aldo tata-
ngis... salunan cu caladuà... manimusid cu pami-isip,
ecu mipatutud! Nuca carin?*

*Ing malagù cung paninap, mesira nğan, piñintang mu
ing paintungulan cu.*

*Ibat quetang aldo quemuan mucu, éracu mipaindatun, ing
misnang catuling á pamigunam atdasane ing canuan cu.*

Nanu ing camatayan?

*Ing painaua mù... ing matutud mung maimbing cabang
bie at bie!*

* * *

*Pangá-bezgi... nģening pigunamgunaman cu ing quera-
saning pamipalsinta ta, mipapatingangas ndcu mù at nģa-
cung cucutang: ¿Caninung gamat meribatan iti? Cutang á
alang capaquibat, uling icang sucat maquibat, panginlagan
mucu.*

*Macanian man éraca papatasan, palsintan dacarin, at
nung capilan mucu quesaman, carin cu lalung meragul á
capalsintan.*

*Dapot Lidia, qñg uli na ning pa malan mung dili, qñg
uli na nitang aldo milahas quecata, sabian me ing menga-
niaya cacu queca: pindalum dacu, caministilan ing maquibat
cu at masalan cu iting dalam.*

* * *

*Nģening cai burira cang patdan qñg pamigaganacà cu:
burira cang calinguan... burira cang icutcut qñg alang ca-
pupusan á pamangalinguan, dapot... ecu arapat, ing cala-
dua cu é bisang mangalinguan... at nanung buri mung
daptan cu canining púsung sugatan?*

* * *

*Balamu acaquit daca, macatacap ya uari qñg buntuc mu
ing pandung ning maquiasaua: calagù mu canita! Ing co-
ronang azahar á puputungan mu, bague ne nipg matuling
mung buac: ding maputing sampaga, lalu lang puputì qñg
matuling dang marco...!*

¡Virgen ning capalsintan, capilan man yátd era ca aquit macanian qñg uanam cu!

* * *

Patauad, patauad Lidia! Ecu seriá: ing binie mu 'cacu, ecu sucát panacauan... dapot., gbaquet miliari ita? Ecu balu! bulag cu... ecu apitaluse... ing caladua cu tatangis ya canitang miliari!

* * *

Itang miliari.. ya ing pamamali na ning púsung sugatan... ó ya ing pamamatawad na ning caladuang malsirta? Mecad macanian: mecad ing tauli ya ing tutu, dapot insinu man caniting adua, patauaran mucu!

Dagul á casiran! Qñg balen, alá nong aliwang piasabian nuné nu icata, nuné ing miliari quccata . Qñg casiran cung puri, angga ica mamaua, ica, ican ena acuang dasan ning uauú nang mabang, as ning calibacan, pamialungan da ngeni ing laguiú mu..

Tampalasan! Era balu ing pamicalugud ta, era balu ing pamipalsinta ta, uling capilan man ela pa linugud at ela pa naman milsinta!

* * *

Ecu na aguiú: inang cu, inang cung maluat nang mete, ausanacu, át ngana: «Mequenina, la cuan mu yang pagsalbat: mequeni, queni alang tatangis, uling alá namang patangis! Malsintaca?»

«Iniâpin pala quelinguan mucu! Ngening quisnucananaca ning babay ng pilsinta mu.. mequeni cacu. anacdaca, eraca paquiacan..!»

Macatacut á paninap Lidia, inang cu maluat neng mete enacu pa inapâ, nuné ngening quisnucan mucu

* * *

Adios! Ecu na abata... ecu na aguiú... macó cung marayú, mecad etana miqit pasibayu

Maglayag cu qñg carinan á alapang maquibalù... carin, quetang écuna abalitan iting calibacan.

Dios co! casaquit na ning macó ena mibalec! Patawaran mucu Lidia, at patawaran denacaman!

Capatac mung luà ing aduan cu nung aganaca me ing maglayag aliwang carinan!

Adios!

Sasálâ: caibat nang binasang Lidia, ing macasulat, babo, mipatangis ya: binasana ému mecapipilan, dapot ena abut piuculan ing buri nang sabian caniti

Mig-alingagapan ya lub, mangaligquig ya qñg balung sangcan, eya mipaindatun qñg ena balung daratang á panamdamanang caligaligan.

Nanung buri nang sabian Hector caniti? Ena atata lusé Lidia, dapot mangalinguiman ya, at mamugad quea ing epa-sabing lungcut.

Quebucas yang é metudtud, meguing luqué ya catauan, ene miticdo man.

Macalunus ya asqué: itang matuling at macaba nang buac, macasabug ya qñg salu na, at itang malati nang buntuc, macayungyung neman qñg sandalana ning butacang lulucucana.

Macaguising ne, ene maninap, dapot itang malicnatâ ene pa licuan. acaquit niamú itang maling á bangque.

Quetang asque nang macanian, carine disan ning abac: caring dalan mararamdam na ing buang da ding taung manlabas á mame qñg obra.

Mecabulad minalingongo: pulai misusumangid ing meraindam qñg dalan á tulid dang bale di Lidia.

Detang pupulai, gugulisac lang micucutnanan at ngara:

— ¿Núcarin?

— ¿Núcarin?

Canitang cutang alang macapaquibat, dapot antimo ing masalusung agus, detang taung pupulai miusig-

usig langan á ayan, painturu la nangan qñg pisamban.

Y Lidia, caniting alingongo mibalicuas ya naman licuaneng sinaguli mitang matuling á pamigunam, mig inut yang tinicdó, at tinandó ya qñg auang á nung nú ya linual itang anino.

Canita detang pupulaí, ngara.

—Queni,, queni canu qñg botica!

—Malaguá! malaguá!

Nanu ing miliari? Y Lidia quetang pangatando na qñg auang, lalauano detang pupulaí, dapat qñg panlalaue na ning metung á jibang á alang camalitmalit.

Mecabulad detang mapilan á lalabas tildure iti, at ngara.

—Yan .. ya ing maquicasalanan!

—Malagú ya pin naman!

—Dapot, ala yang púsù!

Iti ya ing pisolud-salud da, anggang mitulid la qñg auang á nung nuya macatando y Lidia

—Quelanang masabal, ena bague ing palsintan, ngara at sacala dinayung sasagacgac.

Y Lidia na numan caniti alá yang daramdaman, ó dimdam naman ena asasaguiran á calamnan, pablasang aliua ya isipan, lingo ya.

Canita minurung ya qñg auang, at yanaman ing bigla nang pangacuclat ning pasbul ning silid na, at siniro ya ing maputla nang lupang inda na.

—Lidia! Lidia! ngana niting gagalgal—Y Hector mete ya cunu, lesunana ing catauana!

Metung mung gulisac, gulisac á misnang casican at matimid ing pequibat nang Lidia caniti at sacaya misaldac caring bitis nang inda na: mebugsul ya!

XXI.

PASIBAYU ING UNDA-UNDA Á SULU.

Mibalic tamu: murung táng mayatlung aldo mani-bat caniting ibat tang selita.

Y Hector cabud niámú mitdá; ding familia na panintunan de, era balu nung nuya mine.

Ibat na canitang miliari qñg patio ning pisamban, malungcut neng acaquit da ding capatad na, tipa manic yang è bubulad, lasa eno paquisabian man ding abe ná balé.

Detang capatad na, balura ing quealanang calma, catayá mang sabi alá lang biclat ó bubuclat quea canitang miliari; bulureng sugatan, ére buring tag-quilan á sugat, pigaganacan deng mangaplas ing nanacnac a bayá na.

Eya matudtud cabacabucas, at c cabucas yang susulat, iniá detang capatad na, tantangis lang mag-lunus, pigaganacan dang misalunan ya.

Qñg misan á aldo cabud niámú mitdá, meualá yang bigla queta carela at ninu man alang maqui-balu nung nuya mine.

Penintun de ding capatad na, pepapanintun de caring ipus da't casamac, dapot balang mibalic careti, alang maca-ibie masalang balita.

Megulu ing mabilug á balé iniang ere aquit: qui narag la salu at mangalinguiman detang capatad na at ing maroc á uagâ, dinaiti canitang mayap at alang calmang familia.

Ére ticnangan penintun: ing justicia panintunan niá naman, uling ing expedienteng megauá qñg casalanan ó caculangan á yausan dang *inmoralidad pública*, caministilane.

Milabas ing pepatingapun..ing aduang aldo at ing catlu pa qñg pamanintun da, dapot ére atuclasan, iniá ding queraclan á mecabalung alayu, balara penginlagana itang macabpang caligaligan; bucud mung ding capatad na, ilang alingagapan, uling batas de tetagan, talús de cauagasan at ing anti canitang casalanan, ena panginlagan.

Quetang cabengiana ning catlung aldo ibat qñg pangaulâ na, ému y Lidia ing quebucas é metudtud: deta mang capatad na, éla naman mipiác á mata.

canitang quebucas; biling-biling la namang é mipain-daton; canitang asquera disnáno ning abac.

Yapang caticdora qñg dáse era tidturan, iniang á sungauan de qñg auang ing metung á babay-ng ibat nangan qñg pisamban, á memalita carelang qñg itang malambat nang macasarang boticang bandi ra deti, macabuclat ya pasbul á nung nú sisingo ing misnang cabuluc á baung manibat queta quilub.

Mebalicuas no detang calulung capatad nang Hector: pesipulaí la qñg botica at carin...macalunus at macapangblad ing tengalan da!

Y Hector, itang baintaung mitmung bié at sica-nan, macalangan ya babo na ning metung á papag: matuling yang matuling, emune aquilala man.

—Meté ya! ngarang mipagulisac ding capatad na, cabud iquit dé.

Itang gulisac tinabling miulit-ulit caring apat nang suluc ning balen, iniá pin agusan la uari ding taung bisang macaquit canitang bangque.

Iquit tano ding pupulaing taung meguigló: dim-dam tana namn ing pemalita na ning inda nang Lidia caniti, at dingutan tapa ing pangabungsul na, iniápin ibalic ta cang Hector, ó ngacu uari, quetang aldo cabud niamú mitdá queta carela.

Yting alang calmang baintau, iniang énana abata ing dactal á sabit balibalita, inari napin qñg lubna ing paimate ya, canita qñg camatayana, tucnang ná itang calibacan á mibubuntun quea at qñg palsintana.

Canitang quebucas, mecad ému nanung capaitan ing inalduc na, uling nung pegumasdan dayasang mayap ding capatad na, mecad iquit da cabang susulat ya quetang *Libro de memorias* na, ing alang patanat á luang mamagus caring pisni na.

Eya tatacut qñg camatayan, ali ya! Ing tatangisana aliaua ing camatayan á panintunana, nune detang lacuana queti qñg carinan luang cabislac na ning caladua na.

Canita g benging éya mipatutud y Lidia... ca-

nitang benging queta ya catumbanana ing metung á bangque... canitang bening babásane ing *Libro de memorias* á peparala nang Hector quea, atlu neng aldo migpa, apa canita, at nung tutú ing sasabian dang ing caladua na ning tau, eya macó queti qñg yatu quilub ning atlung aldo, itang minapâ cang Lidia, ya ing caladua nang Hector á é miuli quetang aliuang bie, anggang éya macapamun quea.

Caring dinatang á taung mequíglo, metung ya ing Doctor L á quinilala qñg bangque.

Niti, caibat neng siniasat miamasaimas, ngana:

—Dacal á *morfina* ing pengana nining alang calma: metudtud ya, baneng é miguising nuné quetang aliuang bie.

Qñg metung nang bulsa ning americana na, mecaquit lang atlung sulat: ing metung mangamanuya caring capatad na, mamun ya carela qñg macalunus á amanu: ing cadua canitang bapang tinampalasan quea, pamaitsurane panugali: at ing catlu, cang Lidia ya, queta yang caluguranang diling babay, dapat éta ya bubuclatan, uling caniting tauling sulat, mecad carina ngan sinabi ing palalung *lijim* qñg pamipalsinta ra!

¡Calalung lalaqui! Ing maroc á ému na ayamyam pequisanguní naca qñg camatayan!

Alas once ning bengi nita cabud aldo ita, qñg metung á cabaung á alang cabalútbálut man, carin de lilan ing bangquena nitang baíntaung quetang mabie yapa, yausan dang Hector E. Panlaquí at canita muring horas, ding apat cataung mangasican, pisanan deng irala qñg cutantana.

Qñg malungcut nang procesión nitang bangque, alang macatuqui nun ému mapilan catau: ing capatad nang lalaqui at mapilan dapang camaganac.

¡Macapagmulalang micatagun! Itang undap-undap á sulú quetang silid nang Lidia, iniang yapa ne ning bangque migburul catumbana na, macasalaing

yanaman; anti mo canitang macapangilabut á bengi. Itá mang auang á nung núya dinalan itang macatibucbuc á anino, macabuclat yamû iniang ilabas de carin itang bangque.

Ding magdala caniti qñg micatagun ó seriá, catulid da qñg balera di Lidia, ticnang de, bilang lang pepainaua.

Y Lidia, malibub neman quetang benging ita, ma, lisuas ya qñg dagul na lagnat, ena bálu ing pania biana.

Catucnang ning bangque, dimdan da ding queta lalam á maquipatnugut, ing macaba at malalam á saingsig, calauc na ning metung á lag iú, ing laguiú nang Hector.

—Hector! Hector! ngana ning sasaingsing,

Ya y Lidiang mamaus, daralung qñg quepalsintana.

Itang capatad nang Hector a mequipatnugut dimdam na naman iti, at ngana caring magdala qñg bangque.

—Sulung! sulung!

Ena buring damdaman itang saingsing, margutcut qñg púsú na anti mong malaing sundang.

Alas doce ning bengi miari na ing sablá sab'á; y Hector tícusananang lubus ing masala! Oh! mananusang ing historia na abena nang mebaldug qñg aun, canita ena mabuclat pasibayu, dapot é maliari ita, mabie yámú y Lidia at y F. D., ing Judas á cacaluguran.

XXII

ING SAMPAGANG MAPUTÍ.

Milabas ing pepabanua, ing pepabanuang tapat, ibat quetang camatayanang Hector.

Gatpanapun: lalbug ne ing aldo, ume nang silin.

Carin... quetang cutcutan á yausan dang *Patirictiric*, ding manucnangan qñg balayan B. á nang nuya mi-

cutcut ing bangque nang Hector, mapâ tamu sagulî; yapâ taya itang maluca nang palacio ning camatayan, agcatana catamu ning casulisan at ning capupusana niting historia.

Canitang cutcutan, éta macaquit mármoles at jaspres caring mausoleos na't monumentos: batú lá mung Meycauayan á pinintan maputi, dapot ing artes at ing miayaliuang órden qñg arquitectura, mamialungan careti.

Ing talaib á misnang cacapal á menubu siping da detang cutcutan, lalu nong papanatan â asque, palungcutan napang lalu, itang malungcut na!

Qñg panlub tamu, alâ tang disnan metung mang caladua, dapot sumulung tang ditac, carin, nangan qñg gulut, qñg metung á suluc á nung nuya carin ing metung á cutcutan.

Paniatang ta carin, dasnan taya ing metung á babay-ng paldas, macatibucbuc ya qñg pandung á matuling mu naman at macapa!

Macalucluc ya tulid ning cutcutan, misná yang lungcut á panasque, nanan mepa casi ing durungut metung á bangque!

Salicut tamu, magpampan ta qñg macapal á talaib, éta papaquit quea bayang é dumine, banang é pulisan itang luà nang mamagus, dapot pagumas dan tayang mayap, batayang aquilala.

—Dios co! ngana nitang babayng paldas—ngeni.. ngeni cabud aldo iti, miganap pabanua ing camatayan mu.. balamu napun pamû...! Sabian mu alang calmang bangque, pepatauran munaco? Palsintan daca... ua, palsintan daca angga queang bangque mu.... Tutu cung alang calma, ing á palsintan cu bangque niang marimla. Mequeni, ausan daca.. iguyud mu yang mangalalag mung butul, yapa mucu! Mequeni, anicu tatangis babo mung quitcutan...!

Caibat nang sinabi iti, lidlad ne ing paniû nang sutlang malati, at pinulis na itang luà nang sasaguese.

Meluat yapang ditac qñg pangalucluc na, balamu mangaddi ya, ipangaddi ne itang atina qñg aliuang bié.

Caibat na niti, iniang ume neng ticdo quinua ne qñg salu na ing metung á "sampangang maputi" at timpac ne babo ning cutcutan.

Tinicdó ya, at cabud panicdó na, tiniup ne ning angin itang macaba at matuling nang pandung at siniro ya ing lupa nang maputlá.

Ya y Lidia: at itang cutcutan ya namang quitcutanang Hector! dapat pangayaliuá na! Ing pepabanuang calumbayan sinipsip ne catauan itang calulung babay, meyyayat yang bina at ing panlalaue na matamle, majinjin at malambis, antimo ing panlalaue na ning bulan qñg benging malulam!

Linacad yang mapilan calacbangan: ume neng lual quetang cutcutan, iniang asalubungane qñg pasbul y F. D. á lulub naman canita

Panaquit na niti cang Lidia, nganang mipamulala:
— Lidia!

Ua acul nganang mequibat Lidia.

— Baquet queti ca? Écu maniuala iniang sabian da cacung linubca queti...

— Acalinguan muna, qñg ngening aldo iti, miganap pabanua, ing camatayanang Hector?

— Ah!

— Ua, inapá que, tigtugan quequening luá cu ing malalangi nanang cutcutan bayang saguiuang pasibayu...

— Lidia! Lidia! nganang balamu magbitaul F. D.

— caragul mu pamalsinta canitang mete, emu nacu dacayanan ditac man canite?

— Tampalasan! mecaqueni, tuqui cacu, carin quetang quitcutana... maniauad cang tauad quea! At telana ne tacde, guinuyud neng pilit angga quetang cutcutan nang Hector.

— Siclaud ca! maniauad cang tauad caniang pete na ning catacsilan mu... Siclaud ca...! siclaud cang pilit... at sacane tinimid bayang siclaud qñg babo na ning cutcutan.

Mipasiclaud ya aguiang ena buri, at maluat yaring macasiclaud at macarucmú babo ning aun.

Cayatnà na éneane iquit y Lidia, marayú ne canita, atine lual na ning *Patirictiric*.

Tuquian taya: lacuan taya itang tampalasan, enaco manayang parusa qñg depatana, uling macaguiú na quea itang panamdamanang maragul á parusang... *malsintang éra palsintan*.

Calual nang Lidia qñg pasbul nitang cutcutan, linacad yang balus, balamu tatagalan de, dapot catulid nana qñg pasbul ning pisamban, asa lubungane y Miling á ibat namang pepabalu canita qñg metung á lalaquing capalsintana; pamanauit na caniti, quinaul neng matalic á matalic at ngana:

—Miling ing capupusana ning bie cu, carin quetang carinan á nung núya painaua y Hector!

—Ua, nganang Miling á macasaguid quetang buri nang sabian.

Cayari na niti, migjimate ya y Lidia qñg sepupunanang Miling.

Calulung Lidia! Tinalab quea ing sumpâ nang Hector: salucuyanang guguyud ngeni, ing mabayat at malungcut á bie.

Capupusan.



POESÍAS





POESIAS

KUNDIMAN

(PANINAP)

Qñg cacaluquran cung

Miss. Rosita Raymunde.

Itang bengi malagú ya
bengi yang misnang caula,
ding batuir a maningning la...
ing bulana mengari ya
qñg Alayang sisilang na
ning munag ning primavera.

Dapot miuman uman ditac
carin.. queta qñg alapap,
sinalidsid ya ing quildap
cagnana ing lalaganap
á bigang anti ing paldas
qñg tuling nang maguing pisac.

Tungal ditac mitatacpan
itang sala na ning bulan,
at ing malagú rang quinang
ding batuin, lalabug naman:
nanupata't mialilan ngan
qñg matuling itang silang.

Dapot busal ning maranglé
atin pang salang manene,
yanáng macatagan iti
qñg sayá na nitang bengi...
anti na nia mung pátnube
ing maglunus á babay.

¿Ninu ya...?

¿Baquet carin ya...?

¿Nanu ing pagsalbatana...?

Mananu ya...?

¡Tatangis ya!

¡Calulu naca dalaga!

Mecad metung cang lupig na
ning saquit ning pamalsinta.

Busal ning catajimican
nitang malapad á ilang,
agpangan da't babagayan
ding músicas ning caqueuan,
biglá nang queta merandam
nining metung á

KUNDIMAN

I

Patipating bigú-ng
maluat nang tatangis,
yang ngulangul mu
ena matitingid:
insá mang música...
nanan mu mang dalit
é naca milaco
busal na ning saquit.

II

Insa mang bulaclac
ing yain da queca,
cabud tagquilan me
maco ing samiñ na,
numan anti lagú
sambat ning cule na,
pasuliapan muámú
manimutlá naya.

III

Ena ca daralit
alá muring dalan,
ing tagulele mu
ena mararamdam,

pauyan mu ing tanġis,
uling yan naman
caretang mairà mu-ng
alang acayanan.

Panġaramdam na ning dalit
tinucnang la detang batis,
ing siuc ning bengġing tajimic
yaná cabud matitingġid,
agpang qġg malumbe aclis
nitang babayng tatangġis.

Itang capirasung aslag
á qġg lupa na daranġat
yanamung é mitdá tindag:
pagpilitana ring saslat
bistat macapal ing ulap
á quea macasalabat.

In à pin itang timtiman,
busal nitang caqueuanan
saslag ing queang leguan,
at lalu neng palaguan,
qġg salang queang paparam
nitang malambis á bulan.

Macabalut ya qġg gaza-ng
maputipa qġg busilac:
itang matuling nang buac
lulugue ya't macasalbag,
at ing maquinis nang balat
comanguing maslag á bicas.

Itang pundat ding mata na:
itang comanguing cule na:
itang matuling á buac na:
quetang panaquit cu quea
anti naring *iquit daca*,
uli ning *calupa naca*.

Dapot ninu itang dalaga-ng
daralung quetang kundiman...
¿Reyna ne ning caqueuan...?
¿Pelicano yang sugatan...?
¿Ruyseñor yang manamdam...?
Baquet macanjane lumbe...!

Canita biglang mebuclat
itang malabung á palát:
ing banglu sinalimuyac...
at qñg anti mung saquirap,
itang babayng magsalbat
atiù qñg canacung arap.
—Ninu ica?

—Acu ing Mutiá-ng
pingangalipuan ding sabla.
—Nuca linto?

—Quetang bulá
á ngeni cabud na mitdá
—Nanu casá?

—Metung cusá-ng
Reyna, dapot ining calmá
qñg bigú nacu sinasá.
—Reyna nu carin?

—Oh! caniang
labuad á mayagtang
á ému aguiung batiauan.
—At baquet?

—Ing casaquiman
caibat nang simsam lindian
buri nacu pang alipnan.
—Ica ing...?

—Reyna Malasia
malagung anti ing Perla:
acung Virgen á yausan da
qñg Aslagan, at Doncella-ng
tintiman qñg Oceania,
aguiang taguri mu ita.

—Ica... ica, ninu naman?
—Sundalus cung katipunan
—Nuca tau?

—Qñg carinan
á queca sang pagyarian
—Filipinas...?

—Yapin! yan!
ing labuad cung pacamalan.
—Bungsucn! (ngana canita)
—ica ica, anac daca

nung uari't katipunan ca
acu indumu't... Minatná ya't
pepatuluganang mata
ing malapad á labuad na
—Yang ému abut batiauan
á labuad á mayagtangān
canacusa... bandi yu ngān...
ngeni sublian yung bauyan,
at ing sandatang panlaban
ing lugud yu qñg balayan.

Canita mecylimlim ya
ing sálang tatangad quea't
ditac ditac lalabug ya
itang caclis á dalaga,
dapot cabang matatdá ya
ining letra daralit na.

È na ca daralit
alá muring dalan,
ing tagulele mu
ena mararamdam,
pauyan mu ing tangīs
uling yan naman
caretang mainá mu ng
alang acayanan.

Ècu na balung merapat
melacuan cung tinaptinap,
dapot pangamasmas ditac
canita cu á timalad
qñg itang bague milabas..
¡METUNG MU PALANG PANINÁP!

¡FILIPINAS!

Yang banuang masayá, ya ing banua na
Labuad á tibuan cu:
Yang pandung nang azul á pemaltacan da-ng
batuin á matindag,

Ya ing pandung na ning bigúng Reyna-ng
Meculang á calma.

A biglang mipugue qñg tronong bandi na.

Ing balen cung bigú, malagú ya't maslag
Anti ing dalaga-ng

Bayu nang timanan ning calma nang mayap:
Maula yang doncella,

Reyna yang bulalag, Virgen yang mapaniap,
Dapot ing calma na—

—Ning alipan, ning ulila, yang quea miras!

Qñg carurucanang tronong luluc-lucan

Pisaquit deng quildas...!

Minagus ing daya uli niting sangcan,

Qñg misusumanñid

Bangque lang mabuluc, dacalang sugatan...!

¡Abangñan ding awac

Itang masisña't malalaso laman!

Qñg palina't sangñil nitang pamibanga

Ing metung at metung

É bisang palupig quetang panlabana...

Qñg balang carangñan!..

Quetang anting palad..! gabun á icuara

Libulibung bie

Daya't camatayan, itang panablira!

Nuca man maliquid tangñis at ngulanñul

Calauc na nita-ng

Quislap na ning ubat at catni ning acbung;

¡Macapangñilabut—

—Ing inge! gulisac! ing galgal ning gabun...

At itang macasñuc

Gagá ring cahalo't asung magbitaul!

Pisasamsamanda ing butul ding mete

Ding asu at awac

Atinagun quetang fiestang misnang lumbé:

¡Macapangñaligquig!

Queni! Queta! Carin! pauá langñang bangqué

Ding pacasambuung
At deti bangque ro detang mipapaté!

Ing babague quetang ampong á malungcut
 Patá lang pacacac:
Ing siuala deti susugat tataglus
 Qñg utac ning buntuc...
Cacabag qñg salu itang macalunus
 Á daing saingsing
Detang magjingalung taná angus-angus!

Detang lilung salang alá lang guinalang
 Pinialpac dong bangque,
At ding épa mete ampon ding sugatan:
 Ding indung malugud!
Pengari,! capatad,! anac,! cayabiayan!
 A carin tatanģis,
Piniacurac do nģan at timpalasanan!

Qñg capupusana miguaguí ing dauac,
 Miniambut ing saquim...
Biglá yang quinddas qñg trono nang matas
 Ing comanguing Virgen!...
Reynang alang palad ing pandung mung gabac
 Cuanan mia't samsaman...!
Queca't queca yarin, nanuman ing miras!

Nung qñg maulang tronong quecang carurucan
 Biglá racang bigtú...
Ému pagcalumbe! emu gaganacan!...
 Nung bisa cang trono,
Nung bisa cang altar, cayap at dangalan,
 Carening pusu mi
Tin cang macasadiang TRONO ampon ALTAR.

ING TALA NA NING BELEN

Malimputan yang banua
Éya saslag ing Alaya:
Maralumdum...! Queni't queta...

Panang pisac! Ing música-ng
Malambis, inalilana
Qñg sigue na ning lalasa.

Sengap deng l û ing bulan
Ding batuin culimlim noman:
Busal na ning capisacan,
Yaná cabud mararamdam
Ing sigue na at sambitan
Ning maglunus á alipan.

* * *

Itang catní rang malugrà
Ding caesing á talica à:
Itang sugat nang darayà
Nitung maglunus á incà ..
Macapanḡablad... in à à
Macalunus ya palia à!

* * *

Pacpacan at sagacgacan
Carin... ya ing mararamdam,
Queni, tangis at sambitan...
Iniá itang gulisacan
Tatacpana't pupuputan
Ing dalung na ning alipan.

* * *

Carin, ena matitingid
Ing masican á culait
Picailian do ding tatangis:
Pamalcaran dang ligalig:
Ing lalung misnang casaquí
Daralpacan dang matulid!

* * *

Ing maniabi casalanan,
Parusan dang catutuan!
Ding asbuc á é maglaram
Cacabat do't pasicangan;
Qng mamain catuliran
Ing yaus da... "Katipunan".

* * *

Guerà rang alang ulaga
Ing sabla, pisasalira-ng
Pitauaran anting tinda

Ing balen... yang palalu na-ng
Mal ning tau... at paquipante na
Qng indung penibata na.

Dapot ali! é marapat!
Ing nasang saliu'a't jamac:
Uling nanu mang marauac
Ating queang catumbalas.
Indu cu busal ning pisac...
Atin pang ditac á quislap!

* *

Iniá sucat nang pagbitquil...
Mayap na malagung Virgen!
Indú, queca nang itiguil
Aa ngmalungcut á daing...!
Malabab ne... nagan carin...
Ing *Tá'a na ning Belen.*

BACULUD

CAIBAT NING SILAB NA

Baquet quiquiaca? Maluat na-ng
Lungcut mu... nanung sangcana?
Baquet ngeni mengari ca
Qng alipan... metamle ca't
Yang canuan mu dingdung mu ya...?
Nanutá ing pigmulana?
Pinlanat do ding sampaga-ng
Sibut da ding quedang sanga?

Libsan da ing imalan mu-ng
Guintú... leco rang dangalmo?
O iyang abung acaquit mu
Sugataneng pusu mo?
Eca quiquiac balayan cu!
Nung queta mang panaun mu
Maragil ca, lalu ngeni
Qng queca panlalaue cu!

Ing depatan dang saliu'a

Yang pilit patangis queca...?
Ding malagú mung dalaga
Anti nang paburen daca?
Ding lalaqui... alina la
Arapan? Oh! tajimica!
Ing Fenix nung matua na ya
Subli yang anac qñg abú na.

—
Iniá mayap na vang lungcut
Mayap na ing quecang siguc:
Capatad cut cacung irag
Meco queni magpatulug
Qñg balen tang macalunus:
Ing é lugud qñg Baculud
É ie anac! at ing lugud
Qñg dapat at é qñg asbuc!

SULÚ...!

Ibat qñg tungatung ning metung á bunduc,
Busa! na ning baguin ampon alimpuyut,
Virgen yang comanguing
malagú t maglunus

Qñg misusumangid babatio lilingus.

Ing panintunana itang mebatingna't
Malambat nang aldo sequiman da quea...

Ing Palacio ng bubug
á pigcarinana

Ning Reynang mita ^{hi} qñg guintung Tronona

Canita ing duldul a misnang casican
Guinabac na itang macapal á lulam:

Qñg pigabacana
caring ya sinilang

Siniro ing aldo maluat nang mipampan.

Queta itang Virgen at maulang Reyna
Milaco ya lungcut, mesayá ya lupa...

Anac ning Balen cu
ngatana, ngatana

Pugayan yang *Sulú*, tina macaslag ya.

*Miliquez
Jany...*

MALAYA

Pagtumaila raca calulung dalaga:

¿Nanu ing buri mu?

¿Bisa cang kundiman, ó caniang musica-ng

Malabis mayumu-ng

Lulual q̄ng lira na ning Musa Malasia?

...? Paquiramdaman mu:

Matudtud! matudtud! malagung *Malaya*

Q̄ng bamung é aquit daraptan da queca.

Q̄ng duyan mung guintú caring ca magjilig

At ing dasayan mu

Malambut dang bulbul ding maputing sisnes,

At caniang malilung

Lalam na ning mangga carin ta idalit

Ing tagulele mu-ng

Bagayan cítara, lungcut ampon tan̄gis

Canita ding tacsil balang mangaligquig.

Ilugue meng buac mung macaba't matuling,

Tacpan meng canuang mu

Q̄ng ban é mayaquit yang bigung pagbitquil:

Ya ing maguing bungbung

Q̄ng calinisan mu alang calmang Virgen,

Canita mipampan

Q̄ng panlalauera't ya ing maguing tabing

Q̄ng calubasan mung picailian ding tacsil.

Cabang yang opalo-ng sicat ning Alaya

Panayan teng sunlag,

Pagcapilitan mung painaua ca. sana:

Ipiac mo ding mata,

Tiu pá capitan̄gan ing ben̄gi sisiuc pa

Pagcapilitan mu-ng

Matudtud.. ! matudtud.. ! malagung *Malaya*

Q̄ng bamung é aquit daraptan da queca.

Andres Bonifacio!

Icang qñg buntuc da da detang lacsá-lacsá-ñg
taung gugulisac

Maniáúad casñgáuan ampon catimauan
carin Balintawac:

Ica, ica naman ing caladuang bacal
Nitang *Katipunan* á biglang sínintang
Caring talicalá ning quecang balayan.

Ica ing minunang mi-acdac at miladlad
caniang banderana-ñg

Misnang sayá cule nindung Filipinas,
ica ing caladua't

Ica ing sinulsul qñg malangñing ubat
A maluat nang binang qñg salu sisicap...
Pangacalucú na dacalang meyapas.

Meteca... ua, tutu...! lalam ning palacul
ding cabud campí mu!

At uli na niti lalu cang meragul
caring cadayá mu...

É bala ing mate...! nung yang pacalabung
Qñg dutdut á dutung á manayang ambun
Ing daya mung metacqñg beitan mung gabun!

Dapot capilan man. . é maté! Ali ya!
ing caladuang bacal:

At anti ning icang tune caladua na
nitang katipunan ..

Ali, eca mete! ;Baquet sa mateca
Nung qñg capilan man epa meuala ca
Qñg quecang balayan? Mabie carin queal

ING BANDERA

Luid ca balayan! Luid ca tibuan cu!
Luid ca dalagang sipuac na ning aldo!
Baquet malungcut ca? Nanung tatanġis mu?
Oyan yang coronang talagang bandí me!

* *
Gueuá miya caretang palalung busilac
At misnang calagung masamiung bulaclac.
Y putung me Virgen ning cacung paninap
Uli ning quecaya, bandí meng matuyag.

* *
Lon me yang aldo quean libutad-da
Ding atlung batuin, dean... ding tanda na-ng
É maculim i n ning quecang bandera...
Niang bandera mung alá pang musing na.

* *
Carin... quetang ilang á nung nula mete
Ding micatapang mung quiquiacan pa nġeni,
Yan... yang banderang panlualu qġg puri.
Ya ing pemašat mu qġg carelang bangque.

* *
Bistat macanian man... ing saring putí na
É mirinan musing! at iyang azul na
É mirinan dinat, aguiang ing lutu na
Lalu pang milusuc qġg dayang bibura...

* *
Melupig ya...! ua..! Bistat macanian man
Ére adacurac ding quecang quesalang.
Éya mipisali jéya meguing sangca!
Qġg quenu mang Judas ning catampalasanan.

* *
Yang mal mung banderang maquí atlung cule
Simban de't guinalang ding mabie at mete:
Ya ing meguing saput caring meangú bie
At iya naman nġening pandung ding mabie.

Yang bandera... ya ing taudá ning balayan!
At iyang miayanib caring mamalayan:
Nung alang banderang tandá ning dangalan
Alang balen namang sucat parangalan!

* * *
Yniá balayan cung magdulap qñg cayap.
É ne tutulatan micasat qñg burac...
Iyang bandera nang malagú't matindang
Nitang Maria Clarang mete qñg pagsalbat!

* * *
Luid ca balayat! Luid ca tibuan cu!
Luid ca dalagang sipuac na ning aldo:
Oyan ing coronang talagang bandimo
Yputung me caniang comangting canuan mu!

MARÍA CLARA

Qñg babo ning batung timpac da't pinatan
qñg metung á aun, ating maniambitan,
paldas yang babay-ug comangui canuan,
ing buac nang macaba sabug-sabug neman.

— — —
Luang mibabaya itang mamalisbis
caretang pisni nang mapulat't maquinis:
ali ya mingutngat juetang queang tangis
ing salu nang mitmu babuatne ning saquit.

— — —
Detang simpre-vivas caretang bitis nang
lantana't melanği, mangangayungcung la,
ding rosang maputing qñg aun pinlara
mauini musio la't lalanging bulung da.

— — —
Itaning cutcutan ume neng mipante,
mipatag at subli qñg sadia nang asque,
ing carin micutcut á metung á bangque
alicabuc niámu ó abung tinase.

— — —
Ala nang mamapá canitang cutcutan,
balamu ding sablá anti reng quelinguan,

dapot pangā benging ume capitangan
metung yang anino, carin maniambitan.

— — —
Ya y Maria Clara, ya ing aninona!
ning Hada ning benging paldas mengulila...
ing bigung babay... at calulung biena-
ning *Noli me tangere*, yang mamapā quea.

— — —
Ding sablâ .. ding sablâ .. quelinguan dane ngan
ing bigung petera carin Bagumbayan,
dapot yang larauan ning queang balayan...
yang Maria Clara, ene acalinguan.

— — —
Oyar! macasucub babo na ning aun,
oyan! tatangisya qñg saring pagmalun:
pasaguina nala qñg luang maguing danum
ding lantaug sampagang qñg bangque midaun.

— — —
Oyan...! dirina nong bie, panat á bulaclac
dirina nong cule lantang siempre-vivas....
larauanang bigú niting Filipinas
icáng é quinauang cñg Pete ring balas.


— — —
Calinguan deman... Ua! mangalinguan laman
ding sablang campina at quecaluguran,
dapot tin tumangis babo nang cucutan
itang Maria Clara! itang Maria Clara!
Ene acalinguan!





CULE





CULE

DALIT NING ALIPAN

Metung cung ulilang miugse qñg dayat malat ning Oceáno: nğara qñg ding pipunancu libu-libu lang Arian, dapot acu, ibat qñg aguisinğan cu alipanacu at meragulcu qñg casaqutan. Nğara qñg bandi cu nğan yang malapad á labuad, deang mangatas á bunduc á maquipatná qñg bigá at yang caqueuanan á malabung; bistaman..... yang bandi, yang cayatinan, yang sablá sablang pigcalamna cacu ning Dios, bubuis cu nğan, antimo ing metung mung maquisamac á casicatlu qñg bunga.

Reyna ning Malasia ing tagurí cacu. ¿Macananu yang Reyna ing alang sasacupan? ¿Macananu yang Reyna ing alang cayarian? Macatacut á súnú á lalung paganacá qñg calmána ning alipan! Dapot nğeni, atin cung cacaluguran, pengacuanana cung camalan, bandi at cabiasnan! Mapaliaring tuto?

Ing casaqutan leco nacu capaniualan, ding talicalá caring bitiscu inalilanong sampaga, dapot sampaga laman talicalá larin at masaquit lang patluran. Diosco...! Dios da ding alipan, alaláyan mucu!

* *

Dacal ya pánamuyut: nğana qñg idala nacu qñg cataluctucan at pabatio ne cacu carin ing alaya! Alben cu! Lucubanacu canu caring malapad nang baguius, antimo ing Aguila caring malutub na, bacung é manamdam pali!... Nğana qñg dinanacu qñg verde at guintú

nang bulbul, bacu canung mipatná quea. Caragul á ligaya! Pamintuanque, nung tutú ing mayap nang nasa, at nung ali... yang Dios ning catutuan yana ing bala quea...

* * *

Itang acbung milabasha! Mitdá na itang asuc! yang banua sasalane, dapot malimputan cu nù pilubluban! Queni, queni quilub ning salucu balamu ating aduang mipapagal, iniá cacarug ya. ¡Eca quiquiac Sultana! Balabalan me ing galutgalut mung manto, samsamanme carela! é mu pabustan ing pisugalan deng antimo ing túnica nang Cristo; Reyna cana mang anti ila, dapot epa miras ing panaun mu.

Yang milalablab á sulung tatando caring anang na ning aslagan, gabacana yang dulum... Acaquit mo? Yang bigang busilac, yang rosa at guintung micapatulug quea, yang pandung nang azul ning banuang masaya... at yang libu libung cule, antimo ing tindag na ning ópalo... yan!.. yan ing mitabi qñg dulum! Tandoca Sultana! yatugame ing canuan mu Virgen nang malinis ning calinisan, pagumasdan mo ding bulaclac, yang verdeng bulung da ding dutung... sasaguiua na't maatda na carela itang manimusio culiauan apalingcut qñg sayara...! Yang musica... yang dalit... yang buang á malime miraras anga quean queca... yan... ya ing "Dalit na ning catimauan."

¿.....MALICMATA?

Qñg Dr. Pedro Joven, Presidente na ning Sociedad Instructivo Recreativa (Baculud)

Oh! ing benging ita, éya macalinguan! Metung ya caring bengi nang masaya at masampat ning tampuc ning Capampangan: bengi ne ning tauhi nang aniversario ning Sociedad Instructivo Recreativa á inampang ning Presidente na. Detang comanguing sílfides á mamalug qñg malat ning sala, qñg susuluddang piña, jusi, gaza at sutlá, libu libung cule, anti mo ing qñg Pinanari ing

ilalantang da, nḡening tanḡarano nitang maputing sa-
lang babie sulú, balang tindag at quislap...

Metung á samiung manene, malambut at pijican
sasalinganḡal queta qḡg siduan: ya ing banglura ding
rosas, sampaguitas, ilang-ilang, champacas, at mia-
yaliua pang bulaclac á pacabili caring micasampat á
buslú, á, nḡening pisamutana ning anḡin caring mala-
pad nang pacpac, ému balung tunguen á bau, uling
alang laguiú at alá namang cabau, nun é nù ing que-
tutubú nang samiú ning timtiman á dalagang fi-
lipina.

Leguan, sala, cule at bulaclac, agpanḡana ning mis-
nang lambis á música, niang musicang pasayá qḡg
sablá á macapagnmulalang pemaguiú ra caring pitung no-
tas ning pentagrama. Oh! cayumuna ning musica! lalu't
laluna nung lulual caring batal da ding mamung sire-
nas á mig canta quetang benging ita, ému balu idalana
ca qḡg aliuang yatung pauang poesia: qḡg paraiso ding
huries ning Profeta á mitmung malicmatá

Quetang macatilijan cung pamagumasid, dimdam co-
ding aduang misisitsitan siping cu't magumasid mu
namang anti acu; nḡana ning metung careti.

—Insanu ing poesia?

—Ing poesia... deang dalagang comanguing anac
ning Aslagan... yang sasabug á sala .. yang libu libung
cule... yang malambis á música .. at...

—Nung ica:á poéta ca, insanu caniang sampat á ma-
catipun ing tigtig qḡg Lira mu?

—Ing leguan nang ..

—Nang... ninu carean?

Tirune ing metung á babayng majinjin á lalabas na-
man canitang ume lucluc qḡg metung á suluc.

Metung yang dalagang timtiman á picabaluan á
cayapan: quetaug lupa nang mámú at malinis, balamu
mayayaquit macasiro ing leguaning caladuana, ing
panibulus nang pilubluban á ena pa icuung misingan
ning mamulang á capagnaragulan.

—Baquet? nḡana ning cucutang.

—Ua, uling ému bucuḡ ing macatipun quea ing

Handwritten signatures: Rueda, Cudde, Cudde
leguan da ding anac ning Filipinas, mayayaquit na-
man qñg lupa na ing catimtimanan da ding dalagang
capampangan.

Tutu pin: itang dalaga ya ing presia, uling
macapaminsan nğan quea, ing poesia ning tibuan cung
Filipinas at ning beitan cung Capampangan!

DING ROSAS NING ABAC....

Saslag ya ing aldo: at cabang misasapuac ya, qñg
verdeng bulung ding dutung gagalgal bitin bitin ing
malino ambun á petac ning bengi: ing banuang culim-
lim sasalá ya: ing manene angin titiup, dapot qñg
lumie na, lalat á babayantuc na itang saguiná at ma-
limadmad nang dicut ning caparangan. Ding sangara
ding tanaman minatná la, barang tangapan ing lane
na ning Miglalang á atiyu carin... Quetang malapad
á marangle. misasapuac lang mipnung bie, anti n.o ing
timan ning metung á dalaga... DING ROSAS NING
ABAC...

.

Saslag ya ing aldo: at cabang misasapuac ya... carin,
quetang marayú, carin ya ing gutad nang malapad ning
quealan calma, ning alang patugut á pamaquipagcal
qñg bie na ning tau: ing mitabnú tabnú at mianib
anib á casaqitan á pamaquilabana qñg calma na! Ding
áliuá maili la: ding mumuna ó detang tavanğis, palca-
ran da ing biera, at detang maili... cacalinguan da qñg
ila macatili la namang tumangis. Iti ya ing yatu...
ing sablá-sablá maqui catumbalas nğan, bucuð mung
é mapupupus, ing sayára DING ROSAS NING ABAC... á
anti mong malagung Virgen, ilang mumunang mamalitá
qñg mayap á calmá.

.

Saslag ya ing aldo: at cabang misasapuac ya, ding
ayup mipapatlalu la gale at ding matuling á anino mig-
ari quilub ning quebucas, mipapaglulu lang mumuli ca-
ring luquib da: panginlagan de sala ing aldo, dapot

balang licuanda, mesintang nğan, mepauy at menğanat, bucu d mung DING ROSAS NING ABAC... ilang é mepanat, at maninggayá larin caring tangque ra.

* * *

Saslag ya ing aldo: at cabang misasapuac ya, ing sablá micuculayan qñg guintú nang aslag: ding mariposas, ding tanaman, ding bunduc at caqueuanan, pasisayá la nğan; at ing tau, ing Ari na ning sablang lelanğan, carin qñg palalung masuluc ning pilublubana, babie yang pasalamat, uling qñg panaslag na, ing sablá tatanggap nğan qñg calamna, qñg lugud na't pacalulu, uling caring sablá, saslag ya... Dapot miras ing gatpanapun... tacap ing silim, ing sablá lungcut na naman; ing sablá tamle nğan, uling ding anino ning benging malumbe at daralung, pasicálat lang pasibayu... bucu d mung masayá at é milalaco baglu, DING ROSAS NING ABAC... detang mal á bulaclac á cayasquera ding timimanang dalaga ning balen cu... ding dalaga nang comanguí ning Malasia.

FELIPA

Mamulaclac la ding tanaman quilub ning mulajan mu, at nģening ing abagat atdána nong banglu ding pacaticum dang tampuc, ibulaclac na noman balang salingalnģal at pasamiú, angga caretang sampagang alang hau.

Nģening pagumasdan mu iti, uculan mu, qñg ing abagat pagdala na cang banglu, at ding bulaclac naman, mayumung lugud.

¡Iting sablá queca nģan, Felipang bulaclac á misapuac libutad ding lupa mung bulaclac!

Ing sablá queca nģan: abagat, sinta, bulaclac at cayanacan... Nanu ing yumung miguít pa qñg yumung iti? Bistaman, eca lubus á tuk! ¿Nanu ing calu-

luugcut mu? Marajil acaquit dacang tatangis, mag sasariling macasalucbabá caring maputí mung gamat

Qñg misan á yaldo iquit dacang matula, dapo matulang matula, misan mu naman ita. ¿Apaninap mu ing samiung capilan man é macacaliguan? Dapot itang tula sinaguli mu queca, antimo ing sayá nang sagásaguli ning taung manamdám: alang mitatagan á bacás

Ing aldo páitas ya. Ing metung á patipating maputí linimparanaca. Itang ayup á talimjagá, balamu, maninap ya namang lilimpad qñg cacarinaning pamagtinap-tinap.

Sabian mu Filipa ¿Ému pénamdaman capilan man ing malumeme limpad ning metung á taguimpan? Ua: mecad panga bengi, ngening ing bulan masala ya, ngening ing maputí nang quilap ning aslag na, maquiquit queca qñg macabuclat á auang. Ua: mecad ngening ing Aslagan titiman ya at ngening ume na neng ilangtang ing culiauanang bungbung qñg mabilug á yatu, uling iti, ya ing horas ning pamanaguimpan.

Mapanaguimpan ca Filipa? dapot ninu ing filipinang é managuimpan! Ica cabud, ngening titipa ca qñg mulajan, yá á mo ding bulaclac mu, balang metung careti, balamu misisinup yang hada-ng é mayayaquit á babie bie, cule at samiú carela.

Ngening bubuang ing angin... ¿nanung sasabiana niti á sisitsit na caring panamdamu?

¡Lasa ning caladual! ¡Dapot é bala! é bala ing misapican ca qñg burac ning caumisan, uling ing malino mung canuan, paquilala niarin ing virgen mung púsú at timtiman mung ulaga!

Caladua na ning beitan cu... ¿Qñg catataulian matdaca qñg pamibabalangquid na ning pauaon? Écu paniualan, uling ing panaun, palto na ing matulid mu!

Sampaguita.

Bulaclac ning ilang! sampaguitang pijican ning marimlang marangle, ica ing masamiu nang larauan ning Balayan cul

Lubas ca man qñg masayang cule at qñg bulubulean dang bulung ding canelias, rosas at magnelias, dapot mispuac cang mabanglu at alang succuc.

Balamu calaraman qñg queang malati mung tampuc, mipapaguiu ing dacal á banglung pangangaririan dat pingangalipnai. ding lupa mung bulaclac...dapot yang tutu!

Ica, malating sampaga, emu misan meguing sacsi nanaca ning pangisnaua nang saldac ning metung á dalagang alang calmá á ngening sasalicut nat ena buring pamatiag quenu man ing daralanang lungcut, ing sangapana't sipsipan qñg mabubutnul nang pangisnaua, ing. banglu mung é pagcait, canita ena ajalata ning ninuman ing tatacas á sucac á lub quilib ning salu na.

Ica, panagaulan mungan ing sabla: ibat qñg «tocador» nang maulaga ning metung á mayacayan á dalaga, angga na qñg malucana namang altar ning pacacalulu á nung nune daralanginan ing metung á Virgen á pagsantungana.

¡Mecapipilan sinabit naca qñg buac nang matuling at macaba ó caya pitungitunging gueuang cuintas banang panagaulan ing batal at salu nang malugud ning dalagang camanguí: ¡Mecapipilan naman ing tingal nacang pepasibayu carin, quetang pibiliana queca, bana naca mang maguing tandá ning metung á panagacu ó pipangacuanan?

Ngara ing dalaga aquilala me panugali caring capad nang bulaclac: ing mapad qñg «violeta» é

macayungyung qñg nanuman: ing mayaga qñg “rosa” talipandas ya’t mapagmaragul at ing qñg “sampaguita”, mamû ya’t timtiman, iniâ caring dalagang filipina, bijira lamû ding é mapad qñg sampaguita.

Nung paniualan iti, cutnan me ing metung á bab y qñg agap nang bulaclac, abalu me cayuyung yungan.

—Ing violeta?

Matamle ya panugali ó marimlá ya pilubluban qng-nanuman.

—Ing rosa?

Mapagmaragul ya’t maqui catalipandasan ó talacasauá ya qñg nanu mang bague á picudtà na.

—Ing sampaguita?

Mamû ya’t timtiman, pijican ya’t mapanamdaman at lubus á capanibulusan.

Iniápin, ica, sampaguitang lili, ing larauanaua ning dalaga ning balayan cu, uling qñg sablâsablâ mu, carin la cacuang uangis ding anac nang comangul ning Filipinas, lalut laluna qñg capijicanan mu’t catimtimanan.

ING AZUL

Ing azul., oh! ya ing color na ning banua, ning catimtimanan at capurian.

Color ne ning pangalalu, ning lugud at sinta, uling ing pangalalu babie ne ning lugud at manibat ya qñg sinta.

Ing color azul, mamili yang babagayana, ere bague ding talipandas, ding salauayan at masebian, uling ya ing color na ning catimtimanan.

Ing metung á babayng macaganing azul, balamu metung yang silfide-ng macatalbug qñg danum, at cacaue ya uaring mamalug macabalabal qñg pandurg nang malino ning Oceáno.

Y Venus nang Médicis, pininta neng macabalabal qñg túníang azul, at itang larauan á piping mapagmaragul, balamu lalacad yang macacalale paitas mumuquiat qñg alapap, qñg metung nang aslag ning bulan á tinangad qñg gabun Macabalut-ya uaring encages, encages á malino á lalung pajinjin, quetang majinjin at maputlá na nang cule ning azul nang túnica.

Ing dalagang filipina, buri queng aquit maragau'a caniting masampat á cule á cabangal na't caraque ning color ning bandera na. È que buring aquit qñg gáning malutu, uling iti ena bague ning catimti-manana; at cadua ing quetutubû nang capijicanan, babau'al neng pi it macaquit da'a, qñg dayang tutû ning casalang man ó cacaluguran.

Ing panugalina malinis at maputing antimo ing sampaguita, iniá macananu nang buring aquit ing tangisana ning aliua?

Ing azul á majinjin á pemaltacan platino anti ya uari ing banua nang alang ulap ning Filipinas, at ing dalagang filipinang misusulud canita, ya ing mabie nang larauan ning balayana. Qñg catintimanana, qñg quealanang calma, qñg cayapan at capibabatan, macapaiguit ya caring babayng lupa na qñg aliuang sulip.

Alá nang masanting at macayagpang caniting macapagmulalang babayng antimo ing poésing diquil na quea, ning metung á poétang malayo:

Nuan ca babay-ng «comangui»
qñg cayapan mu ugali;
dalaga cang sari «puti»
indu cang alang ca-uri.

Libutad ning calungcutan
atin cang matamle timan,
qñg nanumaog casaqitan
macaquit cang ipanlibang.

Qñg quecang panga-dalaga
quilub balé sampaga ca.
qñg panga-indu mu, ica-ng
mausta na mang Reyna.

Manupata't quilub bale
qñg caqueuan at marangle,
ica ing queang caramé
ning apili mung cacasi.

Iti ing babayng filipina, at iti ya ing buri cung
aquit macaganing azul: qñg azul ning bandera na,
qñg azul ning banua na ning balayana, qñg azul ning
catimtimanan, at qñg azul ning pangalulu, sinta at
lugud...

BOUQUET

I.

Ding rosas ning Mayo.

*Nanan mo ding bucu
Nung uarit culda la:
Nanan mong sampaga
Nung alang banglu ra:
Nanan me ing rosa
Aguiang malagû ya,
Nung detang succuc na
Paniugatan daca.*

Lulub ya ing Mayo .. mamitbit yang bulaclac: qñg misusumangid papalsut no ding micabanglung bucu, ban salingalngal ing banglu: cuculayano ding azuce-nas at magnolias, at pibablasana noman qñg malaré nang cule, ding rosas nang pusiauuan ning gatpana-pun: ding camelias nang matamle ning verano, de-tang mamayuspus á sampagang linánat ning aba-gat, pasaguianong miuman: pibablasano qñg pa-lalung masayang cule, balang maningayá.

Ding sampaga atin la namang panaun: ing prima-vera, ing tiup nang malimadmad ning Mayo á magda-lang samiû at cule carela, dapot ing ligmuc mu qñg qñg calungcutan, ing pepasimsiman mung ma-yumung lasun qñg metung á copang garing: ing inaguiag mu qñg capalsintan, alá neng primavera, alá neng panayan á panaun at qñg metung á amanu alá neng Mayo at bulaclac.

Agaganaca mo? Mayo mu naman canita, yang bulan caring pilacanang aslag, paibabá yang tun-gal ditac; carin... quetang marayu... ing mayumu at malambis dang tigtig ding orquesta á papaid ning angin malale miraras quecata... Macalucluca

qñg lele nang usdungan ning auang, pagumasdan
daca,, canitang bengi balamu ica ing angel ning
catajimican, ding matá mu macalaue la quetang
màrayú, balamu mó uari atin caig pagumasdan
carin. Nanung isipan mu canita?

Itang titindag á batuín á pagumasdan mu, yámú
ing maqui balung lubus... bistat acu aguiang ecu
abibitasâ balamu au ulan cu; Buri mung sabian co?
Qñg balacu mibabata ca't maquipagcal qñg alimbuyú
ning caladua, miguguliutan ca pilubluban canita,
uling qñg casumangid mu, saug yang malalam á
nung nú naca tinulac biglâ ning calma mu, at qñg
casumangid namán ing angel ning capalsintan, lalad-
lad no queca ding malaguayanang baguius; dapot...
ghaquet malungcut ca quetang benging ita? Écu bu-
ring paquibaluan, at capilan man ecu buring abalu.
Itang ému pamibulad guinalang cu angga ngeni, bistat
ing palispalis nang lacad ning yatu, biclat neng ma-
cacale itang tabing á tatacap quetang calijiman...
delanacu qñg catutuan.

Dios col! Lalat misapuac la ding alang calmang
bulaclac, biglâ rang melanat, ngeni malangi nala; bista
man, emo pigaganacan, eco isubli queca, uling aguiang
alâ lang paganaca cacu, nún emu itang benging ma-
lungcut... éco pañintangan antimo ing depatan mu!

Balicdan mu ing depat da ding gamat mu, lon
mu ing sinirara... dininan mucung sampaga, dapot
ding pepatalan mu, deta mung sucsuc da.

*Nanan me ing rosa
Aguiang malagú ya,
Nung detang sucsuc na
Paniugatan daca:
Nanan mu ing sinta
Aguiang mayumu pa,
Nung itang lasuna
Macamate queca.*

II

Dalit ning Sirena.

Carayu na ning napun caniting ngenel! Napun... malagung taguimpan, māmû at macule, at ngeni... matamle, macalunus at macapangablal! ¿Baquet cabud nacu mipabusal qñg anti queting dalumdum? Mitdâ ya itang sulû, at licuana cung macapalibutad qñg alang capupusan á bengi... Inîâ.. lipanglipang, mamulang, maninap, ing caladua cung bigû, manintun yang ditac á sala, itang ditac á sulung cabud na mitdâ quea!

Qñg misan á bengi... ua; quilub ning palalung malagung poesia at busal na nitang milalablab á sulû... carin, queta qñg alapap... metung yang anino... ing anino ning palalung malagung babay, ing anino ning sirena ning capitangan bengi.. quildas neng macacalale ing metung á lira-ng guintu, at caibat nang ménilanílan, silbag na qñg manene at marimlang angin, ing malambis nang música, ding masaya nang notas ning mayumung dalit, dalit á macalimbuyû, macagunâ qñg quenu mang alang calmang mecaramdam.

¿Bisa cang sampaga...?

Ua, dinan daca,

Dapot misingat ca

Uling sucsucan la:

¿Bisa ca qñg sinta?

Caniti man ... ua:

Dapot ing yumu na

Maqui camandag ya.

Ya ing dalit ning Sirena.. caibat na nita, silbag no qñg canuan cu, cabang matatd. ya, ding sari saring sampagang miayaliuâ sami, dapot balag

dimput cu, paniugatan dacu't tatampalasanan caring
mang alai rang sucsuc!

Tinucnang ing música: mitan itang dalit, at yang
bulan á macaquit canita, biglá yang mitacpan á
sala. Acu... mecalacuan cung maninap, tatagal bu-
sal ning dalumdum á alang capupusan quetang
mitdang anino!

—¿Bisa cang sampaga...?

Ua, dinan daca,

Dapot mimingat ca

Uling sucsucan la.

—*Nanan me ing rosa*

Aguiang malagu ya,

Nung detang sucsuc na

Paniugatan daca.

—¿Bisa ca qñg sinta?

Caniti man .. ua:

Dapot ing yumu na

Maqui camandag ya.

—*Nanan mu ing sinta*

Aguiang mayumu pa,

Nung itang lasuna

Macamate queca!

III.

Yumu at... mirra.

Ing "Rosa de Alejandria"

é imalago? Yang cabas na...

qñg cule ampon samit na

titipunano siping na

ding magalo mariposa,

dapot pangalapit dana

isabit no qñg sucsuc na...

itang cabugasucan da

marajil yang camate ra!

(PERLA, ZAFIRO, RUBI.)

Y Becker ing poeta ding poetas, ing pupuri ca-
ring sampaga ing magumasid at daralit qñg natu-

raleza, ngana qñg ing babay at ing sampaga miyaya-bas la, atin lang *banglu at yumu* bistat quilub na niti macasalicut noman ding *sucsuc da't mirra*.

Ing sampaga, qñg málusuc ó manene nang cule, qñg samiú nang isisinup qñg tampac at qñg manin-gaya nang asque, agcatanaca panamdám, bameng pingalipnan at pagmulalan Ing babay... yang palalu nang mal á mutiá ning lelangan, qñg masalingal-rñgal nang caralangnan, qñg pijican at majinjinang panugali, qñg leguan at mal nang catimtimanan y atag nacang ducu at samba quea.

Deting aduá sucsucan la: eca macaquit *rosa-ng* alang sucsuc, at enacaman macatuclas *babayng é minie sucá á lub*. Pauá lang atin sicanan á mita-taguyud qñg tau: ita, ing *banglu na at cule*, at ini, ini naman ing *leguana't catimtimanan*. Insanu cani-ting aduang iti, ing macamate cacu? Liguran que at pepacamal ing metung á *rosa*, at ing *rosa* tiniric no cacu ding mangalaí nang sucsuc. Ing metung á babay... itang babay-ng bucud cung á pingalipa-nan, sicsacana nacu caring mataram nang tiune..., pinilit nang pepayalduc ing *mirra-ng* lalung mapait...

Malambat nacung babaltang qñg malát ning ca-biguan... Capilan pa mirinan capupusan iti...? Ali! Ngeni iquit què... pequisabian nacu... mebugtú la ding *sucsuc* qñg pusung daraya, ing mapait á *mirra* meyumu, at ing banua nang malimputan ning calmá cu, mebuclat ya.

Éne subling miulaman?

*É bala ing saquit
É bala ing lasa,
É bala ing sucsuc
É bala ing mirra:
Buri que ing rosa
Aguiang masucsuc ya,
Nung itang yumu na
Ya ing payalduc na.*

IV.

Ing larauan...

*Ing larauan, larauan ya:
Pipi yang alang quimut na,
Iniâ é apaqwi anti ya
Qñg tutung maqui caladua.*

(P. A. FAJARDO.)

Qñg busal ning catajimican, ding pán'manman cu balamu macaquit lang metung á babay-ng lalabas qñg bilungánang malungcut ning biecu. Éne anino, metung yang babay-ng maputlang antimo ing garing, macagani yang maputi, maputing maputing maiguit pa qñg busilac nang puti ning azucena.

Ing bulan pasalane timan, cacalugurane ning bulan iniápin malagû yang anti ya.

Ngening ing sulû rang undap undap ding batuín mabnâ nang matdâ at maibug neng malabab ing alaya, lumabas ya arapan cu, guguyud ne ing macaba nang sáya, ing sáya nang sutlàng azul, malino antimo ing jusi. Canita balamu ing Ninfa nang malagû ning Oceania, libutad ning malat nang alang capupusan ning Malasia.

Ya. . malungcut yang binâ, balamu atin yang agaganacang macapalumbe quea: mengari ya qñg metung á dalagang macabidbid caring talicalang sampaguitas... Caring labi na quiquiac at maniambitan ing metung á dalit, ing dalit na ning malsintang lulucubana ning aliuang éna palsintan. Quetang lupa na, quetang canuanang masala, macagulis ing metung á taguimpan á mete... ing matamle nang bacas ning mepanat á cayacan á milamang lamang mû qñg calmang éna apanginlagan.

Magalingaldo na: ding rosas, ding sarisaring bu-

laclac, pagmulan dano canitang bubuclat ding macaticum dang tampuc... bisa nang sumála, magaling-gagapan ya, eya bisang dasnana ning sulú... tatacut yang mitagaran qñg dangat nang maputlá ning aldo. Lalauanacu at ngening á pagumasdanang lalauan quianaman... matdá ya

Itang babay... ica: ica, antimo itang quetang panaunang masayá ning pamicacaluguran ta, icang cabud na mitdáng antimo ing batuín ning munag, bacung mibusal qñg pisac á alang capupusan...! At nanu ing licuan mu cacu? Metung yáng larauan, ing larauan mung píping é bubulad at mapagmaragul... dapot, eme pigaganacan; sisinup queng masinup queni... queni busal ning salucu, *aguiang éque apaqui anti qñg tung maquicaladua.*

V.

Sinta't poesía.

*Tangapan mó deang bulaclac, aguiang lanat
la, dapot acu ing sinese guinambul carela.*

¿Buri mung isalita cu queca nung nanu ing SINTA?

Ing SINTA, ya ing pamiagumagum na ning anggang malagû, ning anggang masampat, ning anggang mayumu, ning anggang maula: ya ing pamitipun tipuna qñg malating lulanan, ning malambis á poesía, ning mayumung banglu at masayang cule. Uli na niti, ngening palsintan daca, palsintan cu ngan queca, ing anggang malagû, ing anggang masampat ing anggang mayumu at ing anggang maula, uling atiu ngan queca, ing malambis á poesía, ing palalung masalingalngal á banglu at ing misnang casayang cule!

Deang sampagang acaquit mu, yang verde esmeralda na niang masayang marangle, yang maputing

bigâ-ng balamu malino túl á papatdâ caring mapali nang aslag ning aldo, yang banuang zafir á cabang pagumasdan me balamu acaquit mu ing ligayang tatacpana... yan... yang sablâ, ya ing POESÍA, ya ing SINTA, at ing Reyna na nian... ica: uli na niti, palsinta daca, uling ica murin ing SINTA.

Yang dalit ding ayup á magpataue lipálipacpac caring saguiuâ rang sanga ding dutung, yang buang nang malale ning cêfiro, yang lijim dang tagulele ding úlû at batis, yang músicas á lulual mayayacuâ caring guintû nang cuerdas ning LAUD ning HADA ning cabengian... yan... ya ing POESÍA, ya ing SINTA at uling icang HADA na niang anggang leguan, palsintan dacang maiguit pa qñg pamalsintana ning metung á caladua qñg angel nang talaingat.

Bisa capa?

Ing SINTA, lasun yang «misnang cayumu,» iniâ bistat macamate ing camandag na, dacalang mau-ng bisang simsim qñg yumu na aguiang balurang mausta ing icamatera; iniâpin ngening palsinta daca... bisa cung mate, écu pigaganacan ing mate qñg mayumung lasun ning pamalsinta mu!

Ing SINTA, mapali yang maiguit pa qñg apí: detang anggang dinurup qñg altar na at sinamba caring bitis na, matatampus la qñg pali nang miralacdac... maguing abú la! Dapat á pagumasdan me ing cambubulag, yang malating mariposang mamialungan qñg mapali nang lalab ning metung á sulo? É bala ing maruluc ya pacpac! É bala ing mate ya qñg pali! pipilitanang susungabau ing lablab á macatacut... balamu mo uari, yagcat neng pilit paimate ning salang macamete quea!

Ing malsinta macanian ya paman, éna pitatacutan ing mate ya, éna pigaganacan ing maruluc ya qñg pali ning pamalsinta na... at acu... bisa cung mate maruluc malsinta!

Uli na ning páli na, eme pialungan... macatibicang mapalit matampus qñg lablab na: ing apí

ning sinta éne durulucan ing catauan, nune ing caladua; iniápin ingatan me, banacang é dulucan qñg lablab na.

VI.

¡Luâ at paguinaquit!

¡Calungcut na ning patingapun á alang aldo! Qñg cule nang maputlá ning panaun mumusig nğan ing sablá. Ding bulaclac, tinicum do ding tampuc da balang é salimuyac á samiû: ding rosas tatangis, la't maglunus, dícû ro ding tangquera, balamu tatacut lang miculayan qñg cule nang manimusió ning banua.

Acu man malumbe ya ing caladua cu... sugatan ya! Tatagal cu gulut na ning metung á anino at pangalapit cu... mitdá ya! Mengari cu qñg daracap mari-posang magparangalan quetang mialagung cule ding pacpac na: pangatalana mebating nğan itang santing, at ing mitagan caring taliri cu, ing bulu nanamung macapangaplas...

Qñg busal na ning pamag tinaptinap, balamu, ating mamapá cacu: metung yang malagung Virgen, magdala ya uaring dactal á bulaclac qñg metung á buslung quintû at caras na arapan cu, silbag nong piguisan; sinalingalingal ing banglu, quinislap ing cule, cumá cu sang metung, metung yang «Sampaguitang» malatî, maputî yang anting busilac, dapot pangatalana melanat ya; bauan que, mebating ya banglu, buri que sang isinup, dapot tiniric no cacu ding mangataram nang sucsuc. ¡Ecu balung ing «Sampaguita» atin ya na mang sucsuc!

Itang Virgen pagumasdana cu, maili ya qñg calmâ cu, at iniang balicdan que, limbug caretang labî na itang masayang tula, at ing minalili... écu na balu... melabug cu panlalaue...

Mitdá ya qñg acaquit cu: darayu cu quea, dapot

bala mu atin sicanan á mitutulac cacu, bacung tuquí qñg gulut na.

¿Mituquí cu caya? Dacalang sucsuc ding paca-sa-labat qñg daralanan cu, sugatana cu!

Acung áti-na mibabata era cá paguinaquitan,... baquet icang é tinangap cacu, nun é mu pacamal, pamalcaran mucu?

Ing tula ena sisiro qñg lupa cu at ing bie cu éna sasayá qñg nanu mang siglá .. ¿Baquet angga ing dicut qñg daralanan mu pamalitá na ca cacu?

Balucu qñg ngening capitangan bengi cabang ing buac mung matuling, macalugue ya qñg maputing ulunan, mimisip ca: dapot, nanu ing isipan mu? Isipan me ing malagung bulan á mumumá qñg canuan mu caring bubug nang aslag?

Bálû cu qñg queang malinis mung canuan, mēco na itang malungcut á pamigunam napun, at balu cu naman qñg atin cang tinaptinapan á ému balung pamalaguiuan.

Acu balu cul. . Mequenil tuquica cacu carin.. la cuan mu iting malapad á marangle á nung nuyamamamate dimla ing púsû.

Ah! itang carin aliua napin. Banua yang masayá at ing cule nang zafir é mamaco, éne tatacpan ning lula! Itang carin masayá ngan; ding sibul na bubulung da ing amanung mayumung paquiramdaman, at ing panépane nang angin, magdalang músicang malambis, antimo ing tagulele ning patipati. Ing culang mú carin, ing bulan... Iniápin joh Virgen! ica ing maguing bulana ning banua cung masayá.

Mequenil... isalicut mucu queang salu mu, bacung damdaman ing cacarug nang lijin... *Ilumud mu cu quean quilub na, uling buri cu ing malumud, at mate macanian!*

Ing Escarapela

Qñg bilungana ning' bie cu.

Qñg misan á gatpanapun.. ua: caduá nanang aldo ibat ning labanan: carin queta qñg Pangaranan-á nung nula carin ding sibul á daralit, ding magtu mailang batis, magugulu la ding tau; detang me-magsantung carin, miadia langang maco, pigaganacán dang dasan da ding calaban, itang carinan á era na acuang ipanlualu ding bunduc á pacapatulug at ding sugatan á katipunan á macatagan pa carin

Nula ume? Mibalic la qñg balen á licuan dang atina caring gamat da ding casalang?

Pagumasdan cu ngan iti, angcupan dacu uari salung macaquit canita, balamu qñg canuan cu ating macapatan á batung mabayat, misná yang cabayat... écu miatná.

Tungal ditac mamaco la: itang masayang Pangaranan, itang saguiuang marangle á yapa ra ngening masala ya ing bulan ding hadas ning caqueranan, tatangis ya, tiniguila dalit ding batis na.. detang ulû nang malino, metuling la danum, tinucnang la siuc, mepipila sayâ... Ay! ua, uling ing lira ding musas ning poesía malaya, meumil ya't mengasingtang, enaca macacuang notas á masiglâ caring cuerdas nang daralung!

Nula ume?

Aquit milang pasibayo?

Itang pamipamun, yanà uari ing catataulian?

Detang sundalus á payat meputlâ qñg danup at pamaquilaban, ela bubulad, lalon dong mamaco detang pengari ra't capatad, cacaluguran at capalsinta,

quequilala at quetubale qñg sinaguling panaun; ela bubulad, dapot maguinaquit la caring mamaco...

Ding mamaco at lalacuan, quiquiac la, caniang tangis á é sisiro caring mata, dapot mangutcut qñg púsû at papate qñg caladua!

Mipatangis cu naman.

Baquet?

Ecu balu: lijim nang é mataruc ning pamibiebie na ning taul!

Ing bengi sasalaque ya: itang matuling nang bungbung ning silira, tatacpano ding tauli nang aslag ning painaua nang aldo: mamuna ing gatpanapun.

Qñg metung caretang garetá, macasaque ya ing metung cung caquilala, tuquian que, ipatnube que angga qñg sacan... dapot... baquet? Ali, mitagan cu... ecu bisang quiac pasibayu at saca... dapot... mecad iti, yanamû ing tauli ming pami-iquit!

Angga mû qñg sacan... carin... ing catataulian á adios...! Nung matecu qñg labanan... nung maquia-saua ya... iti yanamû ing tauli ming pamipamun.

Sulung! sulung...!

Lebasan mi ing balen: detang bale á melambat minampun quecami, malungcut la naman... pacasara la!

Sulung!

Miraráyû cami: márayû naque qñg cabalenan, bisa cung mibalic, dapot... sulung! mengari cu qñg Judío errante qñg Biblia, sulung...!

Ing sala na nitang batuín, ing panlalaue na nitang Virgen, tataguyud na cung pilit: sulung! . . .

Balu cung énacú palsintan, ébala...! sulung!

Mabebengi... mebengi: caministilan ing manlayunan, maroc ing lungub qñg sasacupan da ding americanos nung bengi, macatibi ing apagcamalian do ding é maquilaban.

Carin, qñg metung á malucang balé pinaud, carin que sinalangí, selilung mi carin ing quebucas.

Siniuc ing bengi, guinagâ la ding culaýu at mialiua-

pang musicas ning calumbayan... caibat na nita me-
yabac.

Tungal ditac itang batuin, malalabug ya, ing pan-
laluena nitang comanguing Virgen, miraràyũ qñg
canacu: yana ing horas na ning pamicaواني!

Ya mumuli ya qñg licuana at acu mibabalic nacu-
man qñg lalacuan cu...

Miquit queng pasibayo? Tabalu...!

Nanu ing licuana cacu? Ala! ali, atin pala, metung
yang *Escarapela*, cacule ne ning bandera ning bala-
yan cu, gueuane caring taliri na, dapot éque abili qñg
cupia cu, éque apanagaula qñg buntucu, cabang ma-
canian cu, uling pengacu cu quea qñg éque isulud
angang écu mag Capitan

Ding casalang pánas la uaring mangalugus: qñg
misusumangid cu macabuntun la ding bangque... ca-
paliana ning labanan! Itang sapa Purac, melutu ya
qñg dayara ding maputi..

Acu man sugatana cu, sasaguese daranac qñg ca-
tauan cu ing dayang manibat qñg sugat á biclat da
ding bálas.

Ditac na cami mú, ualu nalà catau ding mabie qñg
siping cu... ding maquilaban!

Maguing lunù nacu, quiquiput que bili at ding casa-
lang cucubcuban da cami... Dios co! Écune aquit pasi-
bayu...!

Yang corneta...! ua, ya ing corneta ning General...
piglauana cami.

Milaganap ing acbungan: ding masican pa caretang
sundalus cu biuat dacu't selilung lalam ning metung
á malabung á mangga, at saca.. écuna balu meualacu
panamdám, quepatdan cu; oh! ecu na balu.

Camulat ding matacu, ing acaguisingan cu siping cu,
ing General, ing caluguran cung General.

— Teniente, Capitanaca, ngana canacu niti.

— Salamat General ...!

Cabucasana nita alâ na cung casaquit saquit, balamu écu mesagat, binilî cune qñg cupiacu *Ing Escarapela...* Capitana cu canu...!

Mepupus ne queni ing historia ning *Escarapela*? Tabalu, mecad ali yapa: atiu mú, sisinup quiámung antimo ing metung a mutiang sucát pacamalan, pablasang ibat ya caring gamat na at tandà ne ning balayan cu.

Tabalu... uling ing metung á dapug, marajil maliari, aguiang acaquit meng mitdâ, mitatau yàmû quilub, at é mate iti, anggang éna aguisan itang sucát nang dulucan

MIRTO...!

Bulung á mebugtu qñg metung á libro de memorias.

Jueves (10 Julio 1902.)

Metung yang bale maputi... pinaud ya atap: cata-lindiquingana magparangalan la ding sarisaring bulaclac: ding violetas, rosas at gardenias.

Carin... ing metung á malating silid... macabuclat yang baguiâ auang... itang auang á durungdung caretang sampaga... dapot alá yang tau, alang macatando, iniâ pin detang bulaclac malungcut la, macarundung lang mânayang laue, qñg laue na ning masipag á jardinera

Nuya carin ing lilingap careti..?

Ninu..?

Metung yang dalagang comangui... comanguing malacalo, antimo ding virgenes nang Luna... nang Resurrección Hidalgo, ding pintores ding virgenes Malayas.

Ding búcû nitang matamle mulajan, eno mibubulaclac... malalanat la bayu ing panaun... éla malilingap!

Ding bulaclac na, mangatagtag la qñg tangque... manimusió la't mamayuspus... papamayuspusano ning alicabuc á dirinat quetang malinatnat dang bulung!

Nuya carin ing *Mirto*?

Ing *Mirto*... yang sampagang majinjin á uagâna ning sinta, mamayuspus ya naman.. magdalamjati ya't quiquiac, tatangisane ing salunan á jardineña.. tayu quetang suluc!

Baquet tatangis) ca sampagang alang calma?

Ing guinu cu masaquit ya.. éne mitatandauân yang auang, at quean... quean libutad na niang silid, carin ya masaquit ing caluguran cûng dalaga!

Salunan ya: bistaman macanian malagû yaring anti ing bulan... anti ing bulan á tatacpana ning maputing gazas .. ning malino biga, iniá malungcut ya asque, aguiang tatangarana't susuluan ning bulan ing timanang salunan!

Dios co! éme pá cacuanan, éque buring mate!

Baquet macanian cuneng pilsintan? Ali ! Bugtuan que qñg salu ing larauana aguiang dumáyâ pa, mánasaquit nacung tutú,.. cucutcut ya aldo aldo, antimo ing metung á sucsuc á malaing macatiune..

Masaquit ya!

Calulung *Mirto* quiáca atin cang matulid tumanngis... nung acu masias nacu pilubluban, tatangis cu naman... dapot ali! Éya mate! éna cata lacuan... ó alang Dios á maquiramdang qñg aclis ta!

Mirto! Mirto! Dalit ca yabemu ing tula mu qñg canacu... cacayap ya... Acaquit mo? Yang bulan caibat nang menimû lalput yang tunggal ditac á sala qñg bigang matuling á sasalabat caring aslagana... caibat nian... isiro naneng mabilug ing malinang nang lupa.

Mayap ne...!
Ating Dios!
¡Sasalpantaya cu!

AZUCENA

Ing *Azucena* metung yang sampagang tutúbû at mabibie qñg pali, dapot maputí yang maputí, anti mo ing calinisaning metung á dalaga, iniápin ausan deng *Virgen ding bulaclac*.

Ecu balu baquet palsintan que iting bulaclac: ¿mecad galang uling ya ing larauanang masamiû ning metung á Virgen á lelangana ning mumulang cung pamagtinaptinap?

Itang babay ó angel, maputí yang anti mo ing azucena, qñg maputlang puting pijican á pajinjin lalu qñg timtimanang asque.

Ausan queng *Azucena*, caniang masamiû nang la-guiû ning *Virgen ding bulaclac*, uling iti yámû ing macabague quea.

Y *Azucena*... itang malagung babay ng misapuac busal ning paninap, balamu metung ya caring virgenes á linûal qñg cincel nang Miguel Angel, itang escultor ning leguan; mitmû yang poesía, itang caladua nang anac, iniá pin ing anggung malagû, ing anggung masanting, ing anggung majinjin, atiu ngan quea.

Misapuac ya qñg mapali nang labuad ning Malasia, dapot ing pali ning aldo na, ene icuang inumá itang canuanang maquinis, iniá eya miculayan qñg cule nang comangui.

Iquit que misan... magyúyû ya qñg metung á duyan á linála caring pitungitunging bulaclac, lalam ning metung á bálag ning malabung á «madreselva.» Carin, balamu metung yang princesang susuyuan da ding é mayayaquit á damas.. princesa ne nitang malating

licuban á cacarinan da ding sampagang mibulaclac
sasalingalngal á samiu qñg panlalaue na.

Itang malumeme músicang misnang yumung lulual
caring arpas eólicas, babagayana itang malele yùyù
ning duyan: detang damas á macapaliguid siping
nang antimong anino mie matdá, pagtumailá re qñg da-
lit ding musas malayas, banong iladlad malaguá ning
Dios na ning tudtud, ding malaguayanang pacpac
quetang timtiman á dalaga

Paburen queng matudtud... paburen queng ma-
ninap qñg palalung malagung cule, ecu balangca-
ran ditac man ing yumu ning paniglip na, dapot...
tanuran que qñg pangatudtud na, canita abuangan
co ding dabpang yamuc quetang maputlá nang lupa,
bayang é miguising.

*Matudtud! matudtud!
Malagung Malaya,
Uling qñg tudtud mu
Tin babante queca.*

Ing Reyna ding mariposas

Ecu balu baquet pamanamdaman cu qñg músi-
c ng malumbe, masisindacu: malulungcut cung alang
sangcan, balamu uari detang notas á piunéune ra
canitang música, sasaingsing la't tatangis, daralung
la't maniambitan.

Ing pami-isip cu idála na nacu canita qñg yatung
é picabaluan á nung nú ing sablá macatabing ngang
matuling, matamle at sisiguc: carin dasan que ing
metung á maputlang babay, antimo ing cule nang
malungcut ning garing, macapalucluc ya arapana
ning piano, lalauane ing partitura ning metung á
romanza-ng matuling mu naman. Balang nota-ng
bigtû na caring taliri na, ngungulangul ya uari, ba-
lamu ding notas nang magjingalu ning kundiman.

Itang babay, paldas ya; ing macaba at macasalbag nang buac, balamu ing bungbung ning mebalu; éya tatangis, éya manyambitan: ing anggung lungcut na lulual ngan caretang notas, mipáralan ngan quetang romanzang titigtigàna.

Paninap man ó tutù, itang babay macapangablad ya, écu balu nung nanu ing atiu queang binang macapanasag, mamagcat qñg lunus... qñg lugud at calang-alang.

Itang babay, mete ne ing púsû na, mabibingbing ya qñg saquit á panamdamana, at caretang notas ning piano, carina daralung ing macapangaligquig á lumbe na.


Cabang titigtigane ing piano, lilimparan de ding mariposas á matuling itang canuanang macarungdung, balamu uari ing lablab ning metung á sulung piangaban dang susungaban balang maruluc qñg apí na.

Reyna ding mariposas, bistaman macanian, écu nang qñg malungcut nang pamigunam: itang p... balamu mete ne, éne quiquimut quilub ning sabla melangi la ding uyat á macataid babie bie... alápin ing sablá, ing sablá sablá canitang dalaga mapusio ngan at manimutlá angga na ing músicang titigtigana.

Quiaca, quiaca babay: écu buring paquibaluan ing tatangisan mu, màcaguiû ing darame cu queca qñg nanu mang lungcut, qñg nanumang saquit cayabe mucu. Nung buri mu ing dayacu, nung buri mu ing biecu, ibie cungan queca écasa malungcut...

Ácaquit mo? Yang banua sasalane, galingaldo na malapit niang malabab ing Alaya.

PAMIBULÉBÚLE





PAMIBULÉBULE



TAGULÉLE

(QŊG CAMATAYANANG CRISTO)

.....
¿Baquet magdilidili ya ing masayang balayan...?
¿Mebalu ya ing guinu ra ding Cayarian...? ¿Ing Prin-
cesa ra ding provincias mebijag ya't mealipan...?

Ding dalaning Sión pacapaldas la, mimin la ngan
á saya... ding micatibe nang pasbul mengalasac la't
mengasintang... ding Sacerdotes na, ngungulangula't
magbitquil at ding micalagú nang Doncellas gabac-
ga'ac la imalan, mengabalag la sanggul, gulugulu la
buac.. ing Sión ing guinu na ning yatu mapupuput
ya qŋg lumbe!

¿Macananu neng ticpan ning Guinu qŋg pisac at
dalumdum, ing anac nŋg Sión?

Inugse ne manibat banua, ing labuad ning Israel
at éne guenaca qŋg horas na ning alinlangan...

At ing malagung anac ning Sión mebating ya lagú,
meualà ya diua. Ding Principes na mengari lang tupang
é macaquit pastulan, sinulung lang alang sicanan
caring tutuqui carela.

Ding anac ning Sión á pacaganing púrpura.. ding
mamangan caring pinggan á guintú... ¿baquet daralung
lang lubas at danupan?

Ing mabilug á balayan, magbitaul ngungulangul

maniauad canan! itang maningning á purpurang pabalut caring catauan da... detang pinggan á guintung pibibilian da qñg miayaljuang pamangan, panlibera námû qñg capirasung tinape, balang maulu danup!

Macatacut Dios co ing gagamu qñg alang calmang Jerusalem! Ding cacaluguran menginlagla caretang queyabiayan da, ding anac caring pengarira at ding pengari pamaten do ding pigcasaqitan dang beit á peparagul dang supling. Quilub na ning Pisamban ding Sacerdotes na at Profetas, mangaragsâ la't mangayabual qñg pataram ning muâ mu... ding caralangnang Doncellas, ding mangaticdi nang cabaintaunan, pamanapuas do qñg pataram .. ¿Quenu raca paquipara anac ning bigung Jerusalem? ¿Virgen á anac ning Sion, ing ligalig mu maragul pa qñg dayatmalat at é mata-ting antimo ing danum na...! ¿Ninu ing maplac canian?

Ding Profetas mu inulan daca paintungul dalagang alang calma, dapot émo siacasu at pepailumud ca qñg saya.

Oh! icong anggang daralan pagumasdan yu saguli ing lungcut ning Jerusalem at sabian yu nung ating iquit yunang casiran á anti iti!

¿Iti ing Ciudad nang pecapili ning Maestro? Balang linabas macaquit caniti, dicu re ing buntuc da, ere buri mang aquit ing balayan á meguing ari na ning camalan at leguan, uling ding palacios na, ding palacios nang bubug, bacas na mû ing macatagan carela.

Magpacasauâ ca't magpacasayâ anac nang Edom á manucnangan qñg labuad nang Hus: quecaman miras ing panaun, ing caliz á macalasing midaiti ya na man caring labi mu, canita lasing ca at busal ning lasing mu malúbas ca qñg sablâ sablâ.

Ticdo ca alang calmang balayan, y tugtug mu qñg púsû mu ing danum ning pamanisi, igauang mo ding gamat mu qñg arapaning Guinu, alang alang muman caring anac mung mamamate danup!

Ing babay

Ing babaing malagú, ya ing panagaula na ninsamang catipunan, anti mo ing bulaclac qñg saguiuang marangle at ing batuin qñg maralum dum á banua.

Ing lenguan, á pamalaguiuan tamung mal nang pamuti ning catauan, anti mu naman ing cayapan, ya ing mal nang panagaula ning caladua.

Ing babaing malagú, metung yang Sultanang dactal á alipan, dapot sampaga nemang pijican qñg metung mung aldo; iniâ pin ing putung nang corona saguli yámû quea at ing banglung sasalimuyac na, anti na mung dinam, pablasang agad nang mapauî.

Sultanang mainâ at sampagang pijican, ¿macananu mung pagmaragul ing sagasaguli mung cayapan? Nung ing naturaleza dininana cang leguan, ing panaun á é mangini, samsamanang agad queca at ing nanu mang bague sagasaguli mû ó é magluat «mura mung binâ alaga.»

Nung aquit taya ing babaing malagû, qñg éta sasarían á pagmulalan taya dapot itang tula tang mecaquit quea agad mung malumpauî, ngening apagumasdan ta mu qñg itang catutubû nang lagû, itang panagaula ó nanu mang cayapan á dinam námû, pagmaragul na: iniâ ing pami-isip tamu, magpaunana qñg panaun at lubasan taneng tunggal ditac quetang pagmairing nang cayapan. saclon tana ing dasanang banua, palanatan taya púsû, papangalumpisan ta itang maquinis nang balat at caibat na niti, itang dalagang labi pamung siam á banua, silipan taya, qñg malabugnang bubug ning quetuan, mecad éta bulu, mipamulala tamu, mipagulsac ta't mangaligquig, uling itang babay-ng malalam na mata, surísúrî na balat, quetang napun nacadua na, é nacata burî mang lauan, pablasang calulu ta mumû, éna catâ bague ning lagû na, aliua itamu ing agap na; ing pa-

nintunana ing metung á Rajah ó mabandi't mayacayan maca palayo quetang catauana.

Caniting bague, datang tana pacauan, calunusan tane itang mapagmaragul á aguilaug mengapacli pacpac, itang babaing cucucúcû nang balamu ena milacad man, uling ing tisis, sigasig at miayaliua pang saquit á babie na ning panaun, miagnan agnan linapit quea. . pacua- nan tane pin, lalu't lalu na nung aganaca tamu qñg que- tang caralangnana, metung yang hadang mapagmala: qñg balang delanana, sasalingalngal ing banglu, qñg balang dilpac na, lalsut la ding bulaclac á miayaliua samiú at cule. .

Calulung Sultana! ngeni, lipasna ngan quea: detang mata nang quetang minuna, pasaguian dangan ing sabla, ngeni mengaslac nala, itang cule rang rosa ding pisinâ na, ngeni mialilan qñg pusiauan, nanu patá, ala nang macatagan nanuman quea, nun éna ing bacas na.

Calulung babaing Sultana qñg misan á aldo, bulac- saca-saquirap samantalanen yu ing... panaun éyu binang pacataluctuc. uling ing panaun anaco pacpac.

Cajinjinan ning babay, antimo ing capuriana, ya ing tana nang malagung bandi.

Qñg cajinjinan, carin mú masasaul ing capangadi- rian á marajil dang daraptan ding babaing é mayap.

Ing mayap nang tala-úsuc ning babay, ing pilublu- bana, uling ing pilublubana ning tau, capilan man é ya mamialit.

Ing babay ng malagû pasayano ding mata, dapot ing babaing mayap yagguiaug nacang malsinta quea.

Ing calapit na lub at mamunang pilubluban, ilaco naca nasang é mayap, uling itang pamanibasa na at capanibulusan, ya ing mamagcat bameng igalang.

Ing pamaquiabiayan qñg parang lalaqui, babie cas- ngauan, dapot ing qñg babay, sampat at sayâ...

Ing caministilan qñg babay, ing mayumung pama-

niabi, malagad at matimbang, uling ing masimpac macasnuc ya, pablasang caniti, carin naman marajil ing dactal a salitang alang laman.

Ing dila na ning babay, ya ing maroc nang casalang, uling qñg dactal nang salitang ena balu catuturuan, carin me aquilala qñg carocana.

Nung caring babay macamulang ing pamanuquî ra qñg moda, é sucat pagmulalan, pablasang qñg balang modang tiqian da, balara miraragdag la lagù at su subli la qñg anac. Carela ing moda ya ing balitang batis ning alang capupusan á cayanacan, bistat caring queraclan careti, itang batis, batis ne ning capirayanan.

Ding babay-ng mangasintang, éno sinintangan ning mali nang amuyut ning sinta, nune ing agcat nang é tapat ning capagmar gulun.

Alang pangit á babay, nung balu uang dalan ing pangababay na.

Ding babay-ng mibirubiru qñg sinta, mengari lang anac á mamialungan pataram: mangasugat lang malalam.

Ding anam á babay macapaniabilang miagnan at macapicabalu la busal na nitang alingongo, dapot ding lalaqui, alila aguiang aduâ lamu.

Ing metung á babay macaterac ya quilub ning cabucas aguiang maquiput ya sapin: ua, uling ing teracan ya ing maragul nang diling agap ning metung á babay.

Ing babay-ng talipandas, metung yang rosa-ng panagtagana ning sinta, iniâ alang mitatagan quea, nun émû ding sucsuc na.

Tutú yang malagú ing capatac á luâ caring mata na ning babay-ng mayap, dapot qñg talipandas, anti mo ing luâ na ning Sirenang bisang manam-palasan.

Ing samiú na ning metung á saguiuang bulaclac á magparangalan libutad na ning mulajan, mengari qñg samiú na ning babay-ng tintiman, magparangalan mu naman, libutad na ning nanu mang ligalig ó casaquitan.

— —

Nung ing bulaclac lubas ya qñg banglu, ngening sapulane ning masican á angin, ó tangarane cayang panatatan ning mapali nang aslag ning aldo... quetang cule nang maningning, alang mitagan nun é na mú ing malangí nang tangque. Ing babay-ng malagung alang cayapan, macanian ya naman, nung dasane ning ligagalig at quealan calma, alá nang mitagan nun éna mú naman ing bacas nang manimusió nitang leguana.

— —

Nung ing sampaga maqui samiú ya, é bala ing palanatane ning pali, uling ing banglu na é mapapauy, mapabating; salicbubu. . ua, icalat na ning angin, mapapat angga qñg banuang azul, di pot balang capuriana, pabangluanang lalacuananang quetang samiú. Ing babay-ng mayap at tintiman é bala ing mirasan pang sindac, quealan calma ó nanu mang alimbuyú, mapapat ang capuriana é matda at malumpauy, anti mo ing banglu na ning metung á bulaclac.

— —

Ing babay-ng talipandas, mayumu yang antimo ing casalanan, iniá sucát yang panginlagan ban é macalasun itang yumu na.

— —

Ing babay-ng malagú, ya ing panagaula na nin-samang aguman, antimo ing bulaclac, busal ning malanging marangle.

— —

Ing metung á babay, nun émusá ing dila na, mapaliari yang santa at á bili me qñg metung á altar, bameng carin dalarginan.

— —

Tibubus cu pamaniuala, qñg ing metung á babay,

macapaniabi, ya aguiang alá yang dila; dapot ing écu paniualan aguiang isumparapa, qñg ing babay-ng maqui dila maca-pagtajimic ya.

—

Nanu ing leguan?

Y Platon ngana, qñg ya ing aslag na ning catutuan at sinag na ning capagnasan.

Y Lamennais qñg balac na, ngana naman: qñg ing leguan ya ing managuiag qñg mabilug á panamdám.

Y Monlau, ngening sanacana iti, ngana: qñg, me tung á banding maulagang dili qñg angang bandi, uling manginu ngan quea ing sablá.

Acu, nung sabian cu ing cacu, ngacu qñg ing leguan nanuman ing asque na at lalu't laluna nung atiu qñg babay, daralanaca qñg catasan, bacang misip uagas at mapuri, pablasang atin yang sicanan miyungyung qñg mabilug tang panamdám, at uli na niti, qñg geganaganá tamu.

Ing babayng malagû, aduâ ing leguana: ing lagû-nang talaga, at ing pangababay na.

Ing lagû na ning babay; pequialimbauárana qñg sablá: qñg aldo, qñg bulan, caring sílfides, hadas, qñg banua, caring bulaclac at mariposas.

Caniting miayaliuang paquitulad da quea, canacu mo ing lalung tapat, ing qñg bulaclac. Qñg miayaliuâ nang asque ning sampaga, manibat qñg anti yapang butil á lunsut qñg tangque, pamagbúcû na't pangabulaclac na nang misnang banglu, angga qñg pangalanat na't pangalangí cacuanana neng uangis ning babay.

Ing banglu na at sampat ning babay, ing capuriana at cayapan,

Ing panagaula na't sampat ning sampaga, ing cule na't samiú, at ing babay, ing cayapana't catimtimanan.

Ing metung á sampagang misusulud qñg micasampat á cule nung alá yang banglu, buri taya mung acaquit, dapot é ganap ing tula tamu, uling itang

santing na, éna cayabe ing banglung caministilan.

Ing babay bistat misusulud ya qñg palalung masampat á leguan á pigcalam na quea ning naturala, nung alá yang cayapan at catimtimanan, anti ya naman ing malagung bulaclac a ulila qñg banglu: panagaula ya mú

Ing leguan, bisat malusuc, pamuti mù qñg sagasaguli, uling ing panaun sintanganang agad; dapot ing cayapan at catimtimanan, lalung lulusuc qñg panaun, uling sesesayana.

Ing babay-ngating cayapan, ya ing talagang malagû, lalut lalu na nung cayagpang napa ing catimtimanan, at iting aduang bague qñg balacu, ya ing tutû nang leguan ning babay.

Miayaliuà.

pecapun á é biasang mutus qñg balen á una mayap yapa ing pastul caring tupa na, lu nong idala quetang malabung á dicut.

pecapun á é biasang minalal memili caring pecapun, tutû yang alang calma, uling ing cabutan-gana nita, babpa quea.

Ding Presidente Municipales á macaluc luc manaya nang sueldu balang mapupus ya ing bulan, mengari lang lintang laug á sisipsip qñg daya na ning balen á pagpunan da.

Ding maestros caring escuelas á é magcapilit qñg pangabiasara ding tuturu ra, maragula paquibatan qñg balen at qñg conciencia ra, uling careti macapaniuala, ing paintungul ning ba'ayan da.

Ing pecapun á alang balung inalal na ning balen, mengari ya qñg santus-santusan á burac á gueuarang

emialungan ding anac: caibat deng belabalan qñg
apa, binilî qñg carro at linimbun, misan dania
nú siran.

Ing cacaluluana ninsamang balen, manibat caretang
ecapunang é biasang mucul qñg icanauana.

Ding cacaluguran atlu lang bague: detang tutú,
etang birúbirú at detang pasuclab, dapot sucat
angang panginlangan deti, uli nitang sabling.

Alang mayumung sacdal

A é sunlam capilan man.

Ating atlung cayarian queti qñg yatu: ing caya-
riana ning leguan, ning guintú at cabiasnan; dapot
ting sablá sasacupana ngan ning cayarianing ca-
natayan.

Ing sulung atiu mumuna, dactal ya agtangan qñg
nacatauli.

Ing babay-ng mayap maganacá at malagú á yaus
tayang metung á angel: bistat qñg leguan, nune ma-
casamut ing ganaca at cayapan, mayaus ya namang
angel, depot angel ning carocan.

Ing dila, dactal yapa sisiran carang apat á elementos
á mipapamisan, uling deti ing sisintangan da ita mung
macalague, dapot ing dila mengariyang ulad á ma-
matat, angga pusung macasalicut á tatampalasanana.

Ding Naciones civilizadas, paitulutan dacang ma-
nasbuc at sumulat himaua qñg panamdaman mu, pa-
blasang caniti, cavin mababalu ing panamdamana
ning balen.

Ing balen á macapasicang, mengari ya qñg me-
tung á dapug, atiu quilub ing api na.